

अपरंच

राजस्थानी भासा अर साहित्य री तिमाही

● जुलाई-दिसम्बर 2013 ●

सलाहकार मंडल

मोहन आलोक, गंगानगर

नंद भारद्वाज, जयपुर

डॉ. आईदान सिंह भाटी, जैसलमेर

ओम पुरोहित 'कागद', हनुमानगढ़

डॉ. नीरज दइया, बीकानेर

प्रधान संपादक

पारस अरोड़ा

संपादक

गौतम अरोड़ा

संपादन सैयोग

शंकरसिंह राजपुरोहित, बीकानेर

डॉ. मदन गोपाल लढ़ा, महाजन

प्रह्लाद राय पारीक, हनुमानगढ़

गौरीशंकर, जोधपुर

ओम नागर, कोटा

मुखौळ : महेन्द्र प्रताप शर्मा नोहर

रेखाचित्र : किरण राजपुरोहित 'नितिला' जोधपुर

अंतरजाळ अंक संचालक : डॉ. नीरज दइया बीकानेर

टाइप सैटिंग

प्रिंटिंग हाउस जोधपुर

साज सज्जा : रमेश व्यास जोधपुर

सगळा पद अवैतनिक

सदस्यता

अेक अंक रौ मोल : 20 रिपिया

अेक बरस रौ मोल : 70 रिपिया

तीन बरस रौ मोल : 200 रिपिया

आजीवन : 1100 रिपिया

इण अंक रौ मोल : 40 रिपिया

प्रकासक

अपरंच प्रकासण

A-360, सरस्वती नगर, बासनी, जोधपुर 342 005 (राज.)

दूरभास : 0291-2720796, 7877982810, 9413961800

e-mail : apranchrajsthani@gmail.com

web : www.apranch.wordpress.com

विगत

□संपादक री बात

साहित्यकार री जिम्मेदारी बधगी है
पत्र-पत्रिकावां ई सैयोग करै

गौतम अरोड़ा 3

□पंचामरत

चेत मानखा, इंकलाब री आंधी, उछाळी
माटी थनै बोलणौ पड़सी (पारस अरोड़ा)
धुण रे पिंजारा, धरती अब पसवाड़ौ फेरै
धर कूचां, फूलियै री मां (रवि पुरोहित)
उडीक रौ गीत, प्रीत बिना क्यांरी जिनगानी, गा लेवूं
पूरौ गीत, कुण के है बौ, बौ ई सागी (चेतन स्वामी)
दिवलौ, कतना दन और ?, कतनी बार मरूं,
अणबांच्या आखर, गीत (नन्द भारद्वाज)
बोलै सरणाटौ, थारै लांबा जोडूं हाथ
कठै सूं ऊपजै आ आग, हूणिया (नन्द भारद्वाज)

रेवतदान चारण 5

गजानन वर्मा 10

किशोर कल्पनाकांत 15

रघुराजसिंह हाड़ा 20

हरीश भादाणी 25

□लेख

कहाणीकार अशोक जोशी 'क्रांत'

डॉ. नीरज दइया 29

□काव्य-गोस्टी

हस्तिनापुर, बासीपण रौ पौधौ, कीं नैनी कवितावां,
फाट्योड़ी पगथळियां, थारौ पतियारौ
दादीसा री हवेली, पगडांडियां
स्वाद
आऊंजी-भाऊंजी को गीत
गरीबी रा झाड़

अशोक जोशी 'क्रांत' 35

उगमसिंह जागरवाळ 36

डॉ. आईदानसिंह भाटी 37

अतुल कनक 40

हरदान हर्ष 41

□अकेल काव्य-पाठ

दरद, कविता, रोटी, बीतियोड़ा बगत में नारी,
आज री नारी

डॉ. रमेश 'मयंक' 42

□जात्रा-वृत्तांत

म्हारी गोवा जात्रा

पुष्पलता कश्यप 44

□लघुकथा

जीवण साथी

उर्मिला माणक गौड़ 50

□कहाणी

उदासी रौ कोई रंग कोनी हुवै

मदन गोपाल लड़ा 52

□कवितावां

कुराणा सुपना
मिनखपणौ, चावना
बोली इमरत, बोली ज्हेर
छा बसंत जावतौ

कुमार अजय 58

दुष्यंत जोशी 59

बिहारी शरण पारीक 60

दीपचन्द सुथार 61

□हिन्दी री लांबी कविता

समरगाथा (राजेश जोशी)

उल्थाकार : पारस अरोड़ा 62

□समाचार/रपट

गौरीशंकर निमिवाल 99

□आपरा कागदा सूं

102

संपादक री बात

साहित्यकार री जिम्मेवारी बधगी है, पत्र-पत्रिकावां ई सैयोग करै

आज प्रदेस अर देस मांय चुनाव रौ माहौल है। लोकतंत्र रै मांय चुनाव रौ अेक ईज ओपतौ उद्देश्य व्हे 'जीत'। अबै इण जीत सारू काई करणौ पड़ै, इणरी कोई सीमा अर वैचारिक प्रतिबद्धता नियत नीं है। इण सारू धरम, व्यक्ति, फासीवाद, जोड़-तोड़, धड़ेबंदी अर झूठ-फरेब रौ ई स्यारौ लेवणौ पड़ै तौ जायज है। अेक बगत हौ जद अेक रेल दुरघटना री जिम्मेवारी लेवता थकां भारत रा पैलड़ा रेल मंत्री श्री लाल बहादुर शास्त्री आपरै पद सूं त्यागपत्र देय दियौ हौ अर अबै वौ जुग है जठे राजनेता बयान देवै कै घोटाळै री जांच चल री है-इस्तीफै री जरूरत ही नीं है। फकत आरोप है अर जे घोटाळौ ई करणौ व्हे तौ 30-32 करोड़ रौ क्यूं करूं, 200-500 करोड़ सूं कम तौ घोटाळै री श्रेणी मांय ई कोनी। अै सब राजनीति रै मांय मूल्यां रौ ह्रास है, बयानबाजी अर उणरी भासा रौ गिरतौ स्तर राजनीति मांय उपज्योड़ै अहंकार अर गैर जिम्मेवारी रा प्रमाण है।

राजनीति सूं आपां समाज कांनी आवां तौ देखा कै समाज रौ अेक घणौ छोटौ हिस्सौ कै वरग राजनीति रै इण गोरख-धंधै रै मांय है। संस्कृति अर समाज मांय मूल्य अजै भी जीवता है अर वारी जड़ां गैरी है।

आपां लारलै दोय अंकां मांय साहित्य जगत मांय वैचारिक प्रतिबद्धता, लेखक आंदोलन री जरूरत अर अकादमियां रै राजनीतिकरण री बात करी। लारला दिनां प्रदेस री राजस्थानी भासा, साहित्य अर संस्कृति अकादमी, बीकानेर मांय पुरस्कारां नै लेयनै जकी उठापटक व्हे है उणरौ मूळ कारण भी वैचारिक प्रतिबद्धता अर लेखक आंदोलन री कमजोरी अर अकादमी मांय बधती राजनीतिक नियुक्तियां है। अै सैं कीं साहित्यिक राजनेतावां रै मांय मूल्यां रै ह्रास रौ प्रमाण है।

अठै म्हें आ बात सांपड़तै कर दूं कै जिण तस्यां सामाजिक मूल्यां री जड़ां गैरी है, उणी भांत साहित्यिक मूल्यां री जड़ां गैरी है। राजस्थान री संस्कृति अर साहित्य लोक सूं जुड़्योड़ा है अर लोक हमेसा नीति अर मूल्यां रौ पोसक व्हे।

आ राजस्थानी साहित्य जगत सारू अेक चिंताजनक अर सरमनाक बात तौ है ईज पण इणनै साहित्यिक मूल्यां रै ह्रास रै रूप में नीं लेयनै साहित्य जगत मांय बधती पुरस्कार लोलुप

संस्कृति अर कुंठित साहित्यिक राजनेतावांरै अहंकार, गैरजिम्मेवारी अर वॉरै मांय राजनीतिक नियुक्ति रै कारण राजनीतिक मूल्यांरै ह्रास रै प्रभाव रूप लेवणौ चाईजै । राजस्थानी साहित्य रै मूल्यांरी जड़ं गैरी है जिणनै सरबश्री शिवचंद्र भरतिया, गणेशीलाल व्यास 'उस्ताद', कन्हैयालाल सेठिया, अन्नाराम सुदामा, भूपतिराम साकरिया, हरीश भादाणी, रघुराजसिंह हाड़ा, सांवर दइया, पारस अरोड़ा, ओंकारश्री, मोहन आलोक, नन्द भारद्वाज जैड़ा लोग सींची है ।

पण अेक जिम्मेवार साहित्यिक पत्रिका होवता थकां इण पूरै मामलै नै साहित्य जगत रै सांम्ही अेक सवाल रूप राखण री जिम्मेवारी सूं म्हेँ खुद नै अळगौ नीं राख सकूं ।

साहित्य अकादमी री कार्यकारिणी सभा रौ गठन, उणसूं मिलती सहायतावां, पळै आगीवाण पुरस्कार, युवा लेखक पुरस्कार, अनुवाद पुरस्कार, भासा सम्मान, प्रवासी लेखक सम्मान सै माथै अलग-अलग विरोध रैयौ, पण अनुवाद पुरस्कार रै मामलै रौ कोर्ट ताई पूगणौ अर पळै तीन कार्यकारिणी सदस्यां रौ इस्तीफौ, अकादमी री पूरी कार्यशैली माथै आंगळी उठावै ।

हालाकै अटै तीनूं कार्यकारिणी सदस्यांरै इस्तीफै मांय आपस मांय कोई समानता कोनी सिरफ वारौ काल अेक है पण तीनां रा कारण, पृष्ठभूमि अर चिंतावां न्यारी-न्यारी है । अनुवाद पुरस्कार रा तीनूं निर्णायक अनुवाद रै खेत्र रा ख्यातनांव नाम कोनी । हां, आ बात पूरी प्रक्रिया माथै सवाल खड़ौ करै ।

खैर, इण सारू कोरा अध्यक्षजी नै जिम्मेवार टैरावणौ भी ठीक कोनी । हरेक नै राजी राखणौ- मेंढकां नै तोलण रै मुजब है । औ काम इत्तौ आसान कोनी । पळै अकादमियां मांय आ बंदरबांट अर जोड़-तोड़ भी कोई नुंवी बात कोनी । आ तौ बरसां सूं यूं ईज चालती आयी है अर आगै भी चालैला, इण बार अखबारबाजी अर साहित्यिक राजनेतावां री गैरजिम्मेवारी रै चालतां घणी चवडै रूप सांम्ही आई है ।

अपरंच, सै जुड़योड़ा पखां सूं निवेदन करै कै मूंछां नीची राख 'र साहित्य-हित मांय इण पूरै मामलै में ठावा निरणै लेय 'र राजस्थानी साहित्य जगत नै जगहंसाई सूं बचावौ । अटै साहित्यिक पत्रिकावां भी जिम्मेवार होयनै काम करै ।

अबै बात आपरै कागदां री-

आपरा कागद म्हारी हूंस मांय घणौ बधापौ कर्यौ अर आर्थिक अबखायां व्हेता थकां ई म्हेँ अपरंच नै सांतैरै रूप राखण री हिम्मत करी है । आदरजोग बी. एल. माली 'अशांत' साब लिख्यौ है कै संपादन टाबरां रौ काम कोनी । आप बजा फरमायौ है, मायत सारू टाबर हमेसा टाबर व्हे, आप सांम्ही म्हे हमेस टाबर ईज रैवूंला, पण आस करूं कै आप मायत बण टाबर नै गोडाळियां सूं पगां चालणी सिखावोला अर जरूत मुजब सैयोग भी करोला ।

औ अेक छमाही अंक है, अंक री सामग्री आपरै सांम्ही है ।

राजस्थानी साहित्य रा थंब श्री विजयदान देथा 'बिज्जी अर अपरंच परिवार रा महताऊ हिस्सा श्री ओंकारश्री अबै आपां रै बिचाळै नीं है, पण वारौ सिरजण अमर है । अपरंच रौ दोनूं जुगपुरसां नै निवण ।

-गौतम अरोड़ा

● पंचामरत : अेक

रेवतदान चारण

रेवतदान चारण रौ जलम सन् 1923 में संवत् 1981 री चैत सुदी अेकम रै दिन जोधपुर जिलै रै गांव मथाणिया में हुयौ। सरुआती भणाई मथाणिया में कस्यां पछै जोधपुर वि.वि. सूं बी.अे., अेल-अेल.बी. करी। सन् 1939 सूं 1947 तांई स्वतंत्रता आंदोलन में भाग लियौ। आपरी कवितावां जन-जागरण रौ महताऊ काम कियौ। आपरी कवितावां मंच रौ मान बणी अर जनता री जबान चढी। आजादी पछै राजस्थानी भासा नैं सबळी ओळखाण दिरावण वाळा कवियां मांय सूं अेक। आप इतै बुलंद स्वर में कविता-पाठ करता कै हजारं री भीड़ में ई माइक री जरूत नैं पड़ती।

आजादी रै पछै ई करसां अर मजूर संगठनां रै हक-हकूक री लड़ाई लड़ी। समाजवादी विचारां सूं जुड़योड़ा रेवतजी सन् 1960 सूं 1977 तांई मथाणिया रा सरपंच रैया। वकालत रै अलावा गांव में खुद री खेती रौ फारम। रचनाऊ दीठ सूं आपरी तीन पोथ्यां छपी। धरती रा गीत (1951), चेत मांनखा (1957) अर उछाळौ (1989)। उछाळौ नै साहित्य अकादेमी, नई दिल्ली रौ पुरस्कार मिल्यौ। इणरै अलावा ई केई संस्थावां सूं मान-सनमान अर पुरस्कार मिल्या हा। आपरी कवितावां रौ अंगरेजी में ई अनुवाद व्हे चुकौ है। जनकवि रेवतदानजी चारण 17 जून 1997 नै देवलोक सिधारगा।

-पारस अरोड़ा

चेत मांनखा

खेत खड़ण नै हळ ले हाली,
जद करसां री टोळी;
कितरा दिन तक सबर करैला,
माटी हंसनै बोली;
रे बंदा चेत मांनखा चेत, जमानौ चेतण रौ आयौ!

इण माटी में सौ-सौ पीढी, मरगी भूखी प्यासी;
भाग भरोसै रह्यौ बावळा, प्रीत करी आकासी;

कदै तौ पड़ग्यौ काळ अभागौ, गिण-गिण काढ्यौ दोरै;
कदै तौ ठाकर लाटौ लाट्यौ, कदै लाटग्यौ बोरै;
कदै तौ बेरी दावौ पड़ग्यौ, कदै आयगी रोळी;
कितरा दिन तक सबर करैला, माटी हंसनै बोली;
रे बंदा चेत मानखा चेत,
जमानौ चेतण रौ आयौ!

मांग्या खेत मिळै नी करसा, मोल चुकाणौ पड़सी;
मोल्यां मूंगी इण धरती रौ, कौल निभाणौ पड़सी;
सांमी छाती जे कोई आयौ, जोर जताणौ पड़सी;
खेत खड़तां हळ जे रोक्यौ, हाथ कटाणौ पड़सी;
लोई बिना रंग नीं आवै, धरती पड़गी धौळी;
कितरा दिन तक सबर करैला, माटी हंसनै बोली;
रे बंदा चेत मानखा चेत,
जमानौ चेतण रौ आयौ!



इंकलाब री आंधी

अंधार घोर आंधी प्रचंड
आ धुआधोर धंव-धंव करती
आवै है उर में आग लियां
गढ कोटां बंगलां नै ढहती!

बैताळ बतूळ्यौ नाचै है, जिणरै आगै संदेस लियां
राती नै काळी पीळी आ, कुण जाणै कितरा भेख कियां
वै संख बजै सरणाटां रा, कोई गीत मरण रा गावै है
डंकै री चोट करै भींतां, बायरियो ढोल बजावै है
विकराळ भवानी रमै झूम, धरती सूं अंबर तक चढती
अंधार घोर आंधी प्रचंड, आ धुआधोर धंव-धंव करती
आवै है उर में आग लियां
गढ कोटां बंगलां नै ढहती!

नींवां रै नीचै दबियोड़ी, जुग-जुग री माटी दै झपटौ
ले उडी किलां नै जड़ामूळ, पसवाडौ फेर लियो पलटौ

तिणकै ज्यू उडगी तरवारां, गोचै रौ रूप कियौ भालां
रूखां रै पत्तां ज्यू उडगी, वै लाज बचावण री ढालां
वा पड़ी उखरड़ी में बोतल, मद पीवण रा प्याला उडग्या
मैफिल रा उडग्या ठाट-बाट, वै महलां रा रखवाळा उडग्या
वै देख जुगां रा सिंघासण, रडवडता पड़िया ठोकर में
वै देख हजारां मुकट आज, उडतोड़ा दीसै अंबर में
वै ऊंधा लटकै अधरबम्ब, नहिं झेलै अम्बर नै धरती
अंधार घोर आंधी प्रचंड, आ धुआधोर धंव-धंव करती
आवै है उर में आग लियां
गढ कोटां बंगलां नै ढहती!

आंधी आ अजब अनूठी है, डूंगर उडग्या सिल उडी नहीं
सिमरथ वै ढहग्या रंग-महल, हळकी झूपड़ियां उडी नहीं
उड गयौ नवलखौ हार देख, मिणियां री माळा पड़ी अटै
उड गई चूड़ियां सोनै री, लाखां रौ चुड़लौ उडै कटै
उड गया रेसमी गदरा वै, राली रै रंज नहीं लागी
आ फिरै कांमेतण लड़ाझूम, लखपतणी मरगी लड़थड़ती
अंधार घोर आंधी प्रचंड, आ धुआधोर धंव-धंव करती
आवै है उर में आग लियां
गढ कोटां बंगलां नै ढहती!

अंधकार मत जाण बावळा, इंकलाब री छया है
इण भाग बदळिया लाखां रा, केई राजा रंक बणाया है
रे आ वा काळी रात जका, पूनम रौ चांद हंसावै है
रे आ वा वाल्ही मौत जका, मुगती रौ पंथ बतावै है
रे आ वा भोळी हंसी जका, के मरती वेळ्य आवै है
इण धुआधार रै आंचळ में, इक जोत जगै है जगमगती
अंधार घोर आंधी प्रचंड, आ धुआधोर धंव-धंव करती
आवै है उर में आग लियां
गढ कोटां बंगलां नै ढहती!



उछाळी

सज्जो अेक संघट्टण पंथ पलट्टण, राज उलट्टण आज बढौं मन में मिनखापण नैण सुरापण, खांदै खांपण मेल कढौं तपै अम्बर भांण धरा किरसांण, पसीनै रै पांण'ज पाकत खेती पण मूँछां रै तांण कियां करड़ांण, बिना घमसांण कोई लाटलै खेती !

ढांणी रै ढांणी अखंडी व्है उच्छब, गाळ कसूंबौ रै ढोल-ढमंकै डंकै री चोट त्रंबाळ घमंकै, धरती रा किरसांण धमंकै सज्जो अेक संघट्टण पंथ पलट्टण, राज उलट्टण आज बढौं मन में मिनखापण नैण सुरापण, खांदै खांपण मेल कढौं !

जाणै केहरी गेह सूं आज कढ्यौ, जाणै मेह प्रचंड तूफांन चढ्यौ जाणै बीज पळापळ मेह चढ्यौ, जाणै तीड धरातळ घेर चढ्यौ जाणै पंछी झपट्टण बाज चढ्यौ, जाणै बीज कड़कत गाज चढ्यौ सज्जो अेक संघट्टण पंथ पलट्टण, राज उलट्टण आज बढौं मन में मिनखापण नैण सुरापण, खांदै खांपण मेल कढौं !



माटी थनै बोलणौ पड़सी

मूंन राखियां मिनख मरैला
धरती नेम तोड़णौ पड़सी
करणौ पड़सी न्याय छेड़लौ
माटी थनै बोलणौ पड़सी ।

कुण धरती रौ अंदाता है, कुण धरती रौ धारणहार ?
कुण धरती रौ करता-धरता, कुण धरती रै ऊपर भार ?
किणरै हाथां खेत-खेत में, लीली खेती पाकै है ?
किणरै पांण देस री गाडी, अधबिच आती थाकै है ?
कहणौ पड़सी खरौ न खोटौ, सांचौ भेद खोलणौ पड़सी
माटी थनै बोलणौ पड़सी ।
मूंन राखियां मिनख मरैला
धरती नेम तोड़णौ पड़सी ।

थूं जाणै है पीढी-पीढी, खेत मुलक रा म्हे खड़िया
थूं जाणै है काळ बरस में, भूख मौत सूं म्हे लड़िया
थूं जाणै है सिंघासण में, हीरा-पन्ना म्हे जड़िया
थूं जाणै है कोट-कांगरा, म्हेल माळिया म्हे घड़िया
म्हारी खरी कमाई कितरी, लेखौं थनै जोड़णौ पड़सी
माटी थनै बोलणौ पड़सी ।
मूंन राखियां मिनख मरैला
धरती नेम तोड़णौ पड़सी ।

आ बात बडेरा कैता हा, धरती वीरां री थाती है
माटी अै करसा झूठा है, यांरी तौ काची छाती है
ठंडी माटी रा मुड़दा है, दिवलै री बुझती बाती है
माटी रा म्हे रंगरेज हां, ज्यां कारण धरती राती है
जे करसा मोल चुकाता व्हे तौ, धड़ नै सीस तोलणा पड़सी
माटी थनै बोलणौ पड़सी ।
मूंन राखियां मिनख मरैला
धरती नेम तोड़णौ पड़सी ।

जद मेह अंधारी रातां में, तूटोड़ी ढांणी चवती ही
तौ मारू रा रंगमैलां में, दारू री मैफिल जमती ही
जद वां ऊनाळू लूआं में, करसै री काया बळती ही
तौ छैलभंवर रै चौबारै, चौपड़ री जाजम ढळती ही
इण भरी कचेड़ी देण गवाही, ऊभा-घड़ी दौड़णौ पड़सी
माटी थनै बोलणौ पड़सी ।
मूंन राखियां मिनख मरैला
धरती नेम तोड़णौ पड़सी ।



आप अपरंच नै सदस्यता शुल्क, विग्यापन अर आजीवन चंदौ नीचै लिख्योड़ै ठिकाणै
माथै मनीआर्डर कर सकौ या नीचै बताथै मुजब सीधौ बैंक में जमा करा सको :

श्रीमती हेमा अरोड़ा

A-360, सरस्वती नगर, बासनी, जोधपुर 342 005 (राज.)

स्टेट बैंक ऑफ इंडिया : खाता सं. 31631771578

रिपिया जमा करा र 9413961800 फोन माथै सूचना करौ ।

● पंचामरत : दो

गजानन वर्मा

राजस्थानी गीत अर लोक संगीत नै समरपित जगचावा गीतकार गजानन वर्मा रौ जलम 23 मई, 1926 नै रतनगढ (चूरू) में हुयौ। आपरौ समूचौ जीवन गीत अर लोकसंगीत रै ओळवै राजस्थानी भासा, साहित्य अर संस्कृति नै समरपित रैयौ। शिक्षा अर पत्रकारिता रै मारग धर कूचां धर मजलां बगता पेट रै खाडै नै भरण रै जुगाड़ में आप ग्रामोत्थान विद्यापीठ, संगरिया में जटै अध्यापक रूप टाबरां री संभाळ करी, बटै ई पोथियां सू सनातनी नातै रै सीगै पुस्तकालय अध्यक्ष रै रूप में ई सेवा दीवी। बाल भारती, बीकानेर अर रामपुरिया बाल निकेतन में ई वर्माजी शिक्षक रूप में छह बरसां लग अलख जगाई। आं ई दिनां आप बाल-रंगमंच री थरपणा ई करी।

बीकानेर सू प्रकाशित 'नई चेतना' पत्रिका रौ संपादन कारज ई आपरी श्रीकीर्ति नै बधायौ। राजस्थान इष्टा रा आप संस्थापक सचिव ई रैया। पुतळीघर नाट्य संस्थान, नई दिल्ली रा संस्थापक संचालक रैवता थकां आप अमरसिंह राठौड़ नाटक ई सिरज्यौ, जिकै नै अखिल भारतीय प्रतियोगिता में सिरै पुरस्कार सू आदरीज्यौ।

राजस्थानी री नेन्ही फिल्म 'हळदी रौ रंग सुरंग' रौ लेखन कारज नवै मूल्यां री सिरजन री साख भरै, तौ राजस्थान साहित्य अकादमी अर संगीत नाटक अकादमी रा सदस्य रैवता थकां आपरी सेवावां री साख आज आखौ राजस्थानी समाज देवै। राजस्थानी भासा, साहित्य, संस्कृति, कला अर नाट्य री केई संस्थावां सू आपरौ जुड़ाव रैयौ। अच.अम.वी. ग्रामोफोन कंपनी आपरै केई गीतां रा कैसेट्स ई आमजन तांई पूगता कर्या। वीणा कैसेट्स ई आपरै गीतां री अेक सी.डी. 'बाजरै री रोटी' नांव सू जारी करी।

घूरां रा बोल, चौमासा, बारहमासा, सुहागरात, मीरां बाई आद केई निरत नाटकां रौ लेखन, निरदेसन अर संगीत निरदेसन ई आपरै सुधी ग्यान धकै जस पायौ। कवि-सम्मेलनां में तौ आप मंच-लुटेरा कवि रैया है, सागै ई आजादी परब माथै दिल्ली रै कवि सम्मेलनां मांय भी राजस्थानी रौ परचम फहरायौ। 'झांसी री राणी' अर 'सुण दिखणादी बादळी' जैड़ा गीत आज ई लोगां रै होठां तिरस जगावै। आपनै देस-प्रदेस री केई संस्थावां सू पुरस्कार सम्मान ई मिल्या। लोकगीतां सारू केन्द्रीय संगीत नाटक अकादमी पुरस्कार, राजस्थानी भासा, साहित्य अर संस्कृति अकादमी सू मान-पानै सू आदरीज्या। इणी भांत मीरां स्मृति संस्थान चित्तौड़गढ़, हिंदी साहित्य सम्मेलन प्रयाग, राव बीकाजी संस्थान बीकानेर आद केई-केई संस्थावां सू आदर-सम्मान ई करीज्यौ।

आपरी छपी थकी पोथियां में : हिंदी गीत संग्रह (स्पंदन), धरती री धुन, सोनौ निपजै रेत में, बारहमासा, चौमासा, हेलो मार सुण सिणगार, हळदी रौ रंग सुरंग आद खास है। 'बाजरै री रोटी' नांव सू वीणा कैसेट्स सू जारी वारी गीत-सीडी घणी चावी हुयी। आपरी 'पगड़ी' कविता री सीडी री योजना ई बण्योड़ी ही पण काळ री गति कुण ढाबै ? अमर गीतकार वर्माजी रौ हंसलौ 17 मई, 2012 नै वारी देही रौ सागौ छोड दियौ। लोकमन रै कुशल चितैरै नै शत-शत निवण।

-रवि पुरोहित

धुण रे पिंजारा

धुण! धुणक धुण धुण
 धुणक धुण धुण रे पिंजारा, रुई पिंजारा धुण!
 धुणक धुण, रुई पिंजारा धुण!
 सोनै रौ थारौ बण्यौ पींजणौ, रूपे री है तांत
 तुणक तुण तुण
 धुणक धुण धुण रे पिंजारा, रुई पिंजारा धुण!

पोह रौ पाळौ पड़ण लागग्यौ, स्रम सूं मुंह मत मोड़
 डांफर बाजै मांणस कांपै, भरौ रजाई सोड़
 भोळिया सुण!
 धुणक धुण धुण रे पिंजारा, रुई पिंजारा धुण!

आली-गीली ल्याव कामड़ी, रुई काकड़ खावै
 कामचोर कद जीवै जमीं पर, अड़क मौत मर जावै
 बता कुण कुण ?
 धुणक धुण धुण रे पिंजारा, रुई पिंजारा धुण!

मिनखां में तू मिनख अकलौ, हिम्मत मन ना हार
 सात्यूं सुर तैरै अक तार में, धरती नै सिणगार
 कांम नै गुण!
 धुणक धुण धुण रे पिंजारा, रुई पिंजारा धुण!

चन्नण रौ थारौ बण्यौ पींजणौ, रेसम री है तांत
 तुणक तुण तुण
 धुणक धुण धुण रे पिंजारा, रुई पिंजारा धुण!

धरती अब पसवाड़ौ फेरै

काळी-पीळी आंधी आई, खंख चढी असमान रे
धरती अब पसवाड़ौ फेरै, जाग मजूर-किसान रे

कुदरत लाल गुलाल उडावै, पंछी गीत सुणावै रे
मेड़ी बोलै आज मोरिया, बादळ ढोल घुरावै रे
तरवर झुक-झुक मुजरो लेवै, अन्नदाता भगवान रे
धरती अब पसवाड़ौ फेरै, जाग मजूर-किसान रे

हरियल थारा खेत खड़्या है, ढांढा चर-चर जावै रे
इमरत भरिया अड़क मतीरा, आज गादड़ा खावै रे
चेत बावळा चोर लुटेरा, लूटै है धन-धान रे
धरती अब पसवाड़ौ फेरै, जाग मजूर-किसान रे

मंड में बोलै आज लूंकड़ा, सौ-सौ छैन दिखावै रे
बोड-बिलायां फिरै कूकती, भोळा मिनख डरावै रे
धरती रै बैस्यां नै स्याणा, बेगौ आज पिछाण रे
धरती अब पसवाड़ौ फेरै, जाग मजूर-किसान रे

छोटौ धान बडौ है दुसमण, आज कातरौ खावै रे
टीडी-फाकौ नुवै धान नै, देख-देख ललचावै रे
बैस्यां नै धरती में गाडौ, खाई खोद खदान रे
धरती अब पसवाड़ौ फेरै, जाग मजूर-किसान रे

रोज रुखाळ पूंजळी बाळद, आज ठगां री आवै रे
आंधा पीसै आज जमीं पर, बहरा मौज उडावै रे
खोटण ले लै हाथ भायला, बांध झूपड़ा-छान रे
धरती अब पसवाड़ौ फेरै, जाग मजूर-किसान रे



धर कूचां

उठ भाई फूस फूस बुहार, धर कूचां भाई धर मजलां
अळी-गळी करदे गुलजार, धर कूचां भाई धर मजलां

धरती ऊपर पड़्यौ कूटळौ, मिनखादेही लाजै
स्वारथ गेल बावळी दुनियां, बेगी-बेगी भाजै
फुरसत मिलै न यार, धर कूचां भाई धर मजलां
उठ भाई फूसा फूस बुहार, धर कूचां भाई धर मजलां
झाडू ल्या साचौ हथियार, धर कूचां भाई धर मजलां

ऊंच-नीच रौ लोग लगावै, हियै न राखै लाड
अै सगळा मिनखां रा बैरी, गैर परै-सी गाड-
न धरती नै दरकार, धर कूचां भाई धर मजलां
उठ भाई फूसा फूस बुहार, धर कूचां भाई धर मजलां
ल्याव फावडौ कुळ सिणगार, धर कूचां भाई धर मजलां

जात-पांत रौ लियां घेसळौ, फिरै माधिया भाई
चौडै-धाडै ठग बण बैठ्या, रापा-रोळ मचाई-
झूठा साहूकार, धर मजलां भाई धर कूचां
उठ भाई फूसा फूस बुहार, धर कूचां भाई धर मजलां
ल्या दंताळी आ मोट्यार, धर कूचां भाई धर मजलां

थे धरती रा पूत लाडला, साची कहतां हरखां
मिणत-मजूरी खरी कसौटी, आता-जाता परखां-
थे हौ कांमणगार, धर कूचां भाई धर मजलां
उठ भाई फूसा फूस बुहार, धर कूचां भाई धर मजलां
कुटम-कबीलौ आज सुधार, धर कूचां भाई धर मजलां



फूलियै री मा

तनै टेवटौ घडाद्यूं
तनै पैजणी पहराद्यूं
तनै बाजूबंध ल्याद्यूं, मेरै फूलियै री मा
नागौरी-बळदां नै बेगी पांणी पाय'र ल्या

तनै कांगसी मंगाद्यूं
तनै आटी-डोरा ल्याद्यूं
माथै हींगळू लगाद्यूं, मेरै फूलियै री मा
करां हळसोतियौ तूं छाक लेय'र आ

तनै अंगरखी सिंवाद्यूं
तनै कांचळी मंगाद्यूं
तनै घाघरौ रंगाद्यूं
पीळो पामचौ बंधाद्यूं
ऊपर मोरिया छपाद्यूं मेरै फूलियै री मा
कसिया-गंडासी मेरै हाथ देती जा

तनै बिछिया घड़ाद्यूं
दांतां चूप चिमकाद्यूं
मोल्यां बोरलौ जड़ाद्यूं मेरै फूलियै री मा
नागौरी-बळदां नै बेगी पांणी पाय 'र ल्या

तनै टेवटौ घड़ाद्यूं
तनै पैजणी पहराद्यूं
तनै बाजूबंध ल्याद्यूं मेरै फूलियै री मा
नागौरी-बळदां नै बेगी पांणी पाय 'र ल्या



राजस्थानी साहित्यिक तिमाही पत्रिका

राजस्थानी गंगा

संपादक : डॉ. किरण नाहटा, डॉ.

गिरिजाशंकर शर्मा

मोल : अेक प्रति 15 रिपिया, सालीणा :

60 रिपिया

प्रकासक : राजस्थानी ज्ञानपीठ संस्थान

द्वारा हिंदी विश्वभारती अनुसंधान

परिषद्, नागरी भंडार, बीकानेर 334001

राजस्थानी री मासिक पत्रिका

जागती जोत

संपादक : रवि पुरोहित

मोल : अेक प्रति 10 रिपिया, सालीणा :

120 रिपिया

प्रकासक : राजस्थानी भासा, साहित्य

एवं संस्कृति अकादमी, बीकानेर

करमीसर रोड

मुरलीधर व्यास कॉलोनी, बीकानेर-4

● पंचामरत : तीन

किशोर कल्पनाकांत

बाळपणै रौ नांव- नंदकिशोर, पण समझ अपडतां ई कल्पना रौ धणियाप करता-करता किशोर कल्पनाकांत बणग्या। आखी उमर 'कल्पना' नै सिरजण रौ आधार देवण मतै ई गुजार दिन्ही। इसड़ा सुक्यारथी इण भोम माथै कम जामै। जलम री तिथ सावण सुदी दसमी, संवत् 1987 रै मुजब 4 अगस्त 1930 है।

राजस्थानी भासा-साहित्य रा पुरोधा किशोरजी नैनी बाळवय मांय ई साहित्य-सिरजण रै गेलै उतरग्या, पछै तौ लारै मुड़नै जोयौ ई नीं। 'निर्याम', 'सागर', 'ओळमों' आद छापां रै संपादन सूं संपादक रूप खासा ख्यांतीला अर बाजींदा होया। भांत-भांत रौ काव्य-सिरजण कर अजस्र भाव धारा रा लूंठा कवि होवण रौ विड़द पायौ। बियां तौ साहित्य री लगै-टगै सैंग विधावां मांय पारंगत हा आप। लगोलग छह दसक तांई साहित्य सिरजण कर्यौ। हेलौ, मानखौ हेला मारै, सुण सिणगार, कूख पड़्यै री पीड़, कुण के है बौ, निवण-निवण शिव, मरवण तार बजा, देखै जिसी चितारै अर किशोर गीता आपरी ठावी काव्य-कृतियां है। 'गीतां रौ बांवल्यौ' अेक कहाणी संकलण त्यार। दस बारै देसी-विदेसी लिखारां री पोथ्यां रा ओपता अनुवाद ई कर्या। कोई चाळीस सूं बत्ती संस्थावां सूं सनमान-पुरस्कार आद सूं आदरिज्योड़ा। साहित्य जगत रा प्रेरणा-पुरख किशोरजी इतरा मनगरू हा कै हर कोई बारौ सनमान अर इज्जत करतौ।

कीं बरसां री मांदगी पछै 6 फरवरी 2002 रै दिन आप सुरगां सिधायग्या। राजस्थानी साहित्य जगत सारू बै आपरा घणमोला ग्रंथ अर 'ओळमों' जियांकली चावी पत्रिका री धरोड़ छोड र गया।

-चेतन स्वामी

उडीक रौ गीत

बरस बादळी, बरस बावळी! मोद मनावं अे
तूं बरसै तौ म्हे सगळ्या रळ, मंगळ गावां अे

उडीकै चातकडै दो छांट, इनरिया कद बरसासी रे
उडीकै धोरां तपती धूळ, बादळ कद धुपवासी दे'

उडीकै पंछीड़ां रा नैण, मेवला बरस्यां सरसी रे
उडीकै, खेत खड़्या करसां री झोळी कद तूं भरसी रे
बरस घटा, घिर उमट-घुमट, म्हे अन निपजावां अे
तूं बरसै तौ म्हे सगळा रळ, मंगळ गावां अे।

टहूकै मोर्या हेला मार, कळायण तूं कद आसी अे
बणां में हिरणियां री आंख, बावळ घणी उदासी अे
खड़्या रोही में सूखा टूंट, बिचारा लेय उबासी अे
उडीकै ओढण हरियळ पाग, बादळी कद बंधवासी अे
उडीकै रीता डाबर डै'र, बरस म्हे भर-भर जावां अे
तूं बरसै तौ म्हे सगळा रळ, मंगळ गावां अे।

सुंवारै खेतां-मांहली भोम, सजीवण बीज उगावण अे
हरखती किन्यावां रौ कोड, उंगेस्यौ घर-घर सावण अे
जुझारू ऊभा काटण सीस, काळ रौ ऊभौ रावण अे
कळायण, बरस्यां औ संसार, बणै आछौ मनभावण अे
बाजारौ-मोठ-मतीरा, ग्वार-काचरा-फळी उगावां अे
तूं बरसै तौ म्हे सगळा रळ, मंगळ गावां अे।



प्रीत बिना क्यांरी जिनगानी

प्रीत बिना क्यांरी जिनगानी
अैळी जावै उमर जुवानी।

होठ फरूकै बोल न पावै
मन री मन में ई रह जावै
गीत बिना क्यांरी जिनगानी
जीवै गुपचुप छानी-मानी
प्रीत बिना क्यांरी जिनगानी

मन री चींत बतावै किणनै
तन रौ बींत बिंतावै किणनै
मीत बिना क्यांरी जिनगानी
मरम कियां जाणै नादानी
प्रीत बिना क्यांरी जिनगानी

जूण-जूध है इबछळ यारौ
जग रौ तौ ऊंधौ ई धारौ
जीत बिना क्यांरी जिनगानी
हास्यां कुण करै मिजमानी
प्रीत बिना क्यांरी जिनगानी



गा लेवूं पूरौ गीत

अधबिच में छोड'र बात, इयां मत जावौ
गा लेवूं पूरौ गीत, प्राण! थम जावौ।

ओजूं तौ ढायी आखर ई कथ न सक्यौ हूं पूरा
मन री मन में कद तक राखूं? है अरमान अधूरा
निभ तौ जावणदयौ रीत, प्राण! थम जावौ
अधबिच में छोड'र बात, इयां मत जावौ।

कितरी मनवारां कर गावूं अेकर सुणल्यौ मन री
नैनी-सी है बात प्यारी, पण है घणा जतन री
इतरा दिन अणसुणी करी पण आज सुण्यां ई सरसी
पीड़ायीजी परतीत, प्राण! थम जावौ
अधबिच में छोड'र बात, इयां मत जावौ।

सात्यूं-सुर तौ खड्ड्या अमूझै राग झुरै अणगायां
भासा में बंध सकी न ओजूं प्यार तणी आ माया
किस्यै आस्रै कथूं खड्ड्या है ढायी आखर गूंगा
अणबोल्यौ है संगीत, प्राण! थम जावौ
अधबिच में छोड'र बात, इयां मत जावौ।

सूळी उपरां जूण चढ्योडी, प्रीत चढी परवाणै
रसणा, रचना गीत उंगेरै पीड़ा नै पितवाणै
आज नहीं अणगायौ रैसी, रूं-रूं बोल उचारै
हे ला मारै मनमीत, प्राण! थम जावौ
अधबिच में छोड'र बात, इयां मत जावौ।

कुण के है बौ ?

किणनै बूझूं ? कुण समझावै ?
जिकौ रात-दिन चैन दिखावै
कुण के है बौ ?

काई हैर कटै सूं आवै ?
कुण प्रेरै, फुरकावै गावै ?
मनड़ौ क्यां सारू उकसावै ?
केठा क्यूं न समझ में आवै ?
कुण के है बौ ?

पात झरै मन रूख तणा क्यूं ?
पाछा उलरै जण-कणा क्यूं ?
पैलौ, प्राण बायरौ के है ?
हालै-चालै बौ कुण के है ?
क्यां सारू, के करै-करावै ?
कुण के है बौ ?

करणी केर कटै सूं आयी ?
कुण ? वाणी नै क्यूं उचरायी ?
कुण है जिकौ नैण री दीठी ?
कुण उंगेर दी बातां मीठी ?
उणनै कुण अरथा'र बतावै ?
कुण के है बौ ?



बौ ई सागी

बौ तौ बौ रौ बौ ई सागी !
जाणणियौ बाजै बडभागी

प्राणां तणौ प्राण है बौ ई
सगळी ओळखाण है बौ ई

वाणी-तणी जिकौ है वाणी
बौ ई बौ तौ है साच्याणी
बौ मन रौ मन जोगी-जागी
बौ तौ बौ रौ बौ ई सागी ।

कानां तणौ कान है बौ ई
सांभळ! महागान है बौ ई
नैणां तणौ नैण जाणलै
इण परवाणै तूं पिछाणलै
बौ त्यागी, भोगी, अनुरागी
बौ तौ बौ रौ बौ ई सागी ।

जाणणियै रा है पौबारा
नीं जाण्यां तूं जलम दुबारा
जाण्यां मरै नीं जामै कोई
अणजाण्यौ बण जावै बौ ई
नीं जाणणियौ है निरभागी
बौ तौ बौ रौ बौ ई सागी ।



पारिवारिक राजस्थानी मासिक

माणक

संपादक : पदम मेहता

मोल : अेक प्रति 20 रिपिया, सालीणा :
201 रिपिया, आजीवण : 2101 रिपिया

प्रकासक

माणक प्रकासण

मानजी रौ हत्थौ, पावटा, जोधपुर
(राजस्थान)

राजस्थानी रौ सालीणौ छापौ

बिणजारौ

संपादक : नागराज शर्मा

प्रकासक

बिणजारो प्रकासण

पिलानी

जिला : झुंझुनूं (राजस्थान) 333031

● पंचामरत : चार

रघुराजसिंह हाड़ा

हाड़ौती अंचल रा चावा अर मोवणा गीतकार रघुराजसिंह हाड़ा, आधुनिक राजस्थानी कविता में आपरी न्यारी ओळख राखै। 31 मार्च 1933 नै झालावाड़ जिलै रै चमलासा गांव में जलम्या रघुराजसिंहजी आपरी जवानी रा दिनां में राजस्थानी मंच पर जबरौ नांव कमायौ। वै मुलक रा तमाम बडा नगरां अर हलकां में कवि-सम्मेलनां में आव-आदर सूं बुलाईजता रह्या अर वां आपरा मोवणां गीतां सूं राजस्थानी कविता री जोत नै पूरै गुमेज सूं जगायां राखी। वारा गीतां में राजस्थानी लोकजीवण री अबखायां, पारिवारिक रिस्तां री हिंवळास अर ओपमा रै साथै लोक-संस्कृति अर कुदरत रै मनोरम सरूप री अेक निरवाळी छिब देखण नै मिळै। वारी काव्य-भासा में हाड़ौती री आंचलिक मिठास पण निरवाळी खासियत मानीजै।

रघुराजसिंहजी 34 बरसां ताई राजस्थान रै शिक्षा विभाग में अेक शिक्षक अर प्रौढ शिक्षा अधिकारी रै रूप में लोकसेवा री लूंठी जिम्मेवारी निभाई अर इणी सेवाकाळरै दरम्यान मुलक रा काव्य-मंचां माथै अेक चावै गीतकार रै रूप में आछौ नांव कमायौ। वारी राजस्थानी काव्य-पोथियां में 'अणबांच्या आखर', 'घूघरा', 'फूल केसूला फूल', 'हरबोलौ' अर 'हरदौलै' घणी चावी अर चरचा में रही। राजस्थानी रै साथै हिंदी में ई वारी केई पोथ्यां छपी अर खास चरचा में रही। वारी साहित्य सेवा अर राजस्थानी में खास योगदान सारू वानै राजस्थानी समाज, मुलक री केई ठावी साहित्य संस्थावां, राजस्थान साहित्य अकादमी, उदयपुर अर राजस्थानी भासा, साहित्य अर संस्कृति अकादमी, बीकानेर कांनी सूं मांण-सम्मान ई बरोबर मिळता रैया।

-नन्द भारद्वाज

दिवलौ

हिवड़ा उमग्या, गीत गूंजग्या, हरख चढ्यौ छै थ्वार कौ।
कितनी देर उजाळो देगौ, दिवलौ काची गार कौ ?

जगमग करै झरोखा, घी का दिया करै संचांदणौ,
झूंपड़ियां मं मावस रोवै, भरै निसासां आंगणौ
महंगा मोलां हांसी आवै, गेलौ रुज्यौ उधार कौ।
दिवलौ काची गार कौ ?

ई कोणा मं करी दिवाळी, ऊ कोणौ अंधेरग्यौ,
तन ढांक्यौ तौ सीस उघड़ग्यौ, जग ओळंबौ दे'रग्यो,
जुड़ै न ई मं अरे थेकळौ, आंचळ झीणा तार कौ
दिवलौ काची गार कौ ?

कोरी रूई सुळग रही, पड़तां ई रमग्यो तेल रे,
परथम पासो ऊंळो पड़ग्यो, रीत निभाई खेल रे,
मन की चींती सूं जुड़ग्यो, जाणै गठजोड़ौ हार कौ
दिवलौ काची गार कौ ?

हाट, हथाई, पोळ, पणघटां, हींडां हाथ पसारती,
महनत को परताप दिवाळी, लिछमी ले रही आरती,
धन पर जोत निछावर होगी, रोवै चाक कुम्हार कौ।
दिवलौ काची गार कौ ?

आसा कै चौराहे बैठी, ले सांसां कौ सायरौ,
हेत उजाळौ करै, बुझातौ चालै छळकौ बायरौ,
झरतै नैणां चौक पुरायौ, सूण साध घरबार कौ।
कितनी देर उजाळो देगौ, दिवलौ काची गार कौ ?



कतना दन और ?

कतना दन और ? अस्यां कतना दन और ?
तासां का ताजमहल, ये भींतां रेत की,
ब्याळूं की बेरां, कोरी बातां खेत की,
यौ नटबौ बेबस-
ये खाटा अर अधपाक्या बोर ! कतना दन और ?

हांडी पै जाळा क्यूं पूरे छै मांकड़्यां,
चूल्हा की पांती में धूं देती लाकड़्यां,
भूखा ही बैठ्यौ रै-
भोळा टाबर मूंडा धो'र ! कतना दन और ?

पाताळां पाणी की आडी झुक झांकबौ,
मिठबोलां मेघां कौ, डूंगरिया डांकबौ,
भाटौ ज्यूं-कौ-ज्यूं-
पण घसगी या ऊमर की डोर! कतना दन और?

छानै सै जा झाकै, सूरज भंडार में,
कोई की अंगणाई, तड़पै अंधार में,
मिनखां ई रहणौ छै-
कतना दन बण गूंगा ढोर? कतना दन और?

आऔ चूरौ पाड़ां, ई बादळ महल में,
तणग्यौ क्यूं राखौ छौ, रूई का फहल में,
यौ खटकौ मटज्या-
पण चाहीजै झटका में जोर! कतना दन और?
कतना दन और? अस्यां कतना दन और?



कतनी बार मरूं

कतनी बार मरूं, म्हुं कतनी बार मरूं?
उगता सूरज ज्यूं उठ, पाछी कतनी बार गरूं?

जद जनमूं जद वाही पीड़ा,
वै का वै नरकां का कीड़ा,
ऊही ढोबौ बोझ टनां कौ, कुण पै भार धरूं?
म्हुं कतनी बार मरूं?

या चौमेरूं फीकी हांसी,
झूठा अपणापण की फांसी,
सैं संझ्या चमनी कौ बझबौ, कतनी बार डरूं?
म्हुं कतनी बार मरूं?

दौड़ा-दौड़ मचाता सावा,
मिंदरां-मिंदरां तपता आवा,

काची मटकी बेच ठगोरी, कतनी बार करूं ?
महूं कतनी बार मरूं ?

जे मांगै मीठी मनवारां,
नैणां-नैणां मद की धारां,
बेसोरम बण-बण केसूलौ, कतनी बार झरूं ?
महूं कतनी बार मरूं ?



अणबांच्या आखर

उडता पंखेरू मांडै आखर गगन पै,
गूंगी धरा पै कोई बांचै न बोलै रे ।
झालौ देवौ रे झीणै घूंघट कळियां,
आंधौ मुलक, कोई हांसै न हालै रे ।
गूंगी धरा पै....

पीड़ा हेलौ देवै, कोई बात न बूझै रे,
प्रीत की बावरी पळक नहीं पूछै रे ।
दमना जे दीखै वै पराया सबका ही रे,
देळ बिसवासै धणी द्वार न खोलै रे ।
गूंगी धरा पै....

पतझड़ कद आयौ अर कद चलग्यौ,
आमौ कद मोर आयौ अर कद फळग्यौ,
अब कै बसंत में कदेक बोली कोयल,
कुण विरहण हाय बैठी न हिंडोळै रे ।
गूंगी धरा पै....

बायरा गावै छै रे कै नसास ढाळै छै,
सूरज बाळै छै रे कै जगत उजाळै छै,
नाचै छै ये झरणां कै भटकै छै दर-दर,
न्हावै तो छै यां में कोई मन झकोळै रे ।
गूंगी धरा पै....

अपणां ही सुर में अपणां गीत गावणां,
अपणी ही रामकथा मुलक सुणावणां,
बोझ तौ ऊमर कौ ढोवै छै सारी दुनियां,
हेत कौ कळस बोझ्यां मर-मर डोलै रे।

गूंगी धरा पै....



गीत

सारा आंसू पीग्यौ ऊमर कौ रेतीलौ तीर रे,
तौ भी नहीं धुपी यादां की या धुंधळी लकीर रे।

उघड़ी मिली म्हानै पगथळियां गेला पै चौराया पै,
हाल घड़ी उठ चल्या अस्या सैनाण मिल्या हर छाया पै,
आसा का म्रिगजळ कै पाछै भटकै मन की पीर रे।

कदी नहीं आया म्हारै आंगण तौ तुळसी पूजबा,
सापनां कै दवारै भी आतां वै पग लागै धूजबा,
नीं मिंदर में मिलै न मूंडा सूं बोलै तसबीर रे।

कद की कोई बेल चमेली हाल न आया फूल रे,
कद का म्हारी पून्यूं ऊपर रह्या बादळा झूल रे,
कद सूं सिमट्यौ सांभ्यौ मन कौ पड़्यौ पचरंग चीर रे।

तातै तवै बूंद ज्यूं टमकै ये गीतां का बोल रे,
दो जुग बडी कहाणी बणगी, कहूं न तौ भी खोल रे,
कसकै तौ भी काढ न पाऊं यौ दोधार्यौ तीर रे।



● पंचामरत : पांच

हरीश भादाणी

जनकवि हरीश भादाणी रौ जलम 11 जून 1933 नै बीकानेर रै अेक मझलै परिवार में हुयौ। वारां बापूजी बेवा महाराज बेटै रै जलम सू पैली ई संन्यासी रौ भेख धारण कर परिवार री जिम्मेदारियां सू छेड़ै कर लियौ अर मां उणी बिखै में बेटै नै बेआस्रै छोड संसार सू ई विदा व्हेगी। मां-बाप री आ गैर-मौजूदगी कवि रै बाळमन में बरसां रड़कती रही। परिवार सू मिळती अगोलग उपेक्सा, अहोड़ां अर बेकदरी सू वारै मन मांय जिण भांत रौ असंतोस अर भौतिक सुभीतां सू वीतराग पैदा हुयौ, उणरौ कवि री कंवळी संवेदना माथै गाढौ असर पड़्यौ। भणाई अर बधती उमर रै साथै उण दरद नै आपरै गीतां अर कवितावां में इण भांत अंगेजी कै विरासत में मिळी संपदा वारै वास्तै गौण व्हेगी।

आपरै लेखण रै दरम्यानं जद वै समाजवादियां अर रायवादियां री संगत में आया तौ अेक नुंवी दुनिया अर निरवाळा विचारां सू वारौ सामनौ हुयौ। समूह चेतना रै लूठै विचार-दरसन कानी वारौ रुझांण बध्यौ, जठै निजू सुख-दुख कै खुद रै विकास रौ वारै वास्तै कीं खास अरथ नीं रह्यौ। वै आपरी चिंता छोड वां जरूतमंद अर पीड़ित लोगां री दसा सुधारण में इत्ता मगन व्हेग्या कै विरासत में मिळ्योड़ी घणखरी संपदा नै वां होळै-होळै उणी परमारथ रै काम में लगाय दीवी। जन-आंदोलणां में ई वारी भागीदारी बधती रही अर साथै ई स्नातकोत्तर शिक्षा कानी सू वारौ जीव उचटतौ गयौ। वारी लोकधरमी कवितावां अर जनगीत घणकरा उणी दौर री उपज मानीजै।

वां बरसां ताई मुम्बई, कलकत्ता अर जयपुर-बीकानेर में अखबारां, पत्र-पत्रिकावां अर गैर-सरकारी संस्थानां में कलम री मजूरी रा अलेखूं काम किया- प्रौढ शिक्षा अर साक्षरता मिशन रै पेटै अनौपचारिक शिक्षा माथै कोई दो दरजन किताबां लिखनै संपी। सन् 1960 सू '74 अर 1990 सू '93 ताई 'वातायन' सरीखी साहित्यिक पत्रिका रै जरियै जठै प्रदेश में नुंवा रचनाकारां सारू अेक साहित्यिक मंच त्यार करण रौ अनूठौ काम कियौ, उठै ई लोक महत्व रा मसलां नै लेय जन-आंदोलनां में भागीदारी निभायी अर जेळ जातनावां ई भोगी।

आपरी इण दीरघ रचना-जातरा में वां जठै हिंदी संसार नै कोई डेढ दरजन बेजोड़ काव्य-कृतियां दीवी, वठै आपरी मायड़-भासा राजस्थानी में ई 'बाथां में भूगोळ', 'जिण हाथां आ रेत रचीजै', 'काचर रौ बीज', 'हूणियै रा सोरठा' सरीखी किती ई नामी कृतियां रै माध्यम सू साहित्य में आपरी अेक न्यारी साख बणाई। आपरी सजळ रचनासीलता सू सींचण वाळै लाडलै कवि हरीश भादाणी सेवट 2 अक्टूबर 2009 रै पीळै परभात आपरी औस्था रै छीयंतरवै बरस में अचाणचक सदा सारू मून धार लीवी।

-नंद भारद्वाज

बोलै सरणाटौ

ऊभा चारूं कूंट
धुएं रा डूंगर
बोलै सरणाटौ !
डरतौ ऊगै, डर्यौ बीसूंजै
इकटंगियै बंधियोडौ
अकल सूरजडौ
साखी ही गंगौ
जद कुण भणै
लोहै रा कागद
बोलै सरणाटौ !
हाथ पखारै आंख चुगै
माणक-मोतीड़ा
धोरां रै समदरियै
पुरवा-पछवा
उतर-उतर फेरै आंध्यां रा झाडू
होड करै धीरज री सांसां
कियां करै गोफणिया हाका
बोलै सरणाटौ !
पगां मंडीजी
डामर री दुनियावां पसरै
मोडै-मोडै
आंगण ओढी लाज संभाळै
फाट्योडौ थाकेलौ
रोटी रौ चंदोमामौ देखण
पथरावै सोनल सपना
राज-मजूरी राजा करसां रा
रौळा ही रौळा....
कुण देखै
कुण सुणै
चूल्है रै सांम्ही बजतौ चूडौ
बैठा मिनख मटोठ्यां खावै-
बोलै सरणाटौ !

थारै लांबा जोडूं हाथ

थारै लांबा जोडूं हाथ
ऊन्हाळ्य थिड़ी-थिड़ी कर ऊभ
पगलिया ले लै रे !
थारी मावड़ लू बळता खीरां सूं
सींची सगळी रेत जी
थारी आंधी बैनड़ रा रौळा सुण
रूस्या रसिया खेत जी
पाळसियै में जंवर पूजूं
क्वारै हाथ कळसिया ढोळ दूं
म्हारौ जतनां चींत्यौ थाळ
तीज रौ घी-सींज्योडौ खीच
आमली ले लै रे !
थारै लांबा जोडूं हाथ....
म्हारी भातौ ले जाती भावज रौ
रूडौ रूप ममोलियौ
कोढी तावड़ियौ भरै चूठिया
घुरडै धिरै भतूळियौ
जे थूं बोलै बैरी थारै
ओळा और मखाणा घोळ दूं
म्हारै डोवै रांधी राब
राब में मौळी-मौळी छाल
सबड़का ले लै रे !
थारै लांबा जोडूं हाथ....
म्हारौ अणमण पिणघट खडौ उडीकै
सोनलदे पिणहार नै
म्हारी खूंटी चढियोडौ ईढांगी
जोवै है सिणगार नै
जे थूं बोलै तौ चौभाटै
रोटी पेड़ा ढाळ दूं

म्हारै आंगणियै रिमझोळ
मटक्यां मांड्योडी अणमोल
उतारौ ले लै रे !

थारै लांबा जोडूं हाथ....
ऊन्हाळा थिडी-थिडी कर ऊभ
पगलिया ले लै रे !

❖ ❖

कठै सूं ऊपजै आ आग

(अेक)

हड-हड हांसतौ चूलौ तौ
आपरौ चुड़लौ बजाय महकै
महकतौ-महकतौ बांधे मन
अर झाका घालती
टिमक्यरां नै हेला-हेल
बिठावै आपरी छीयां....

हेत रै हाथां
पुरस-पुरसती
कैवती ई जावै
भरौ ! भरौ नीं म्हारै सूं
थारलौ कुंभ !

रह्या अणबोल्या ई
पण पूछ तौ लेवूं ई-
कठै सूं ऊपजै आ आग ?

(दो)

कुण.... कद करसी
वां तपासियां सूं सवाल कै
भोमा रै कुणसै चौभाटै
होया बरफ री सिल ?

पांगरसी सांसां में ई
सांभ नै राखी चालण री हूंस

धिन-धिन भरतां रा पूतां !
आपै ई पैरियो कै दूजां पैरायौ
जैपुरियौ पग ?

चालतां-चालतां आय दूक्या
जगनाथ रै आंगण
अठैई ऊगती के
तापण री रळी ?

कुण कुरसी
वां सूं औ सवाल कै
कठै सूं ऊपजै आ आग ?

(तीन)

कुण पूछैला
वां खोजारां सूं सवाल कै
घास-फूस कै
लीर-लत्ता कै
पीळियै सूं डसीज्यां पानां
लाधिया ई नीं कठैई ?

कुणसी आंख सूं दीखी
मुळकती नींद
नींद में हिलरता सपना
अर वां माथै
ऊंधाय दियो तेल,
घस दी तूळी,
ताप लिया
बणाय जगरौ ?
कुण, कद करसी
वां सूं औ सवाल कै
कठै सूं ऊपजै आ आग ?
(अेक काव्य-शृंखला रा तीन अंस)

हूणिया

मंदिर-मस्जिद खोजतां, दीनी उमर गंवाय
हियै बिराजै सांच, खोल किवाड़ा हूणिया!

साच न बांमण-बाणियौ, ना ही छूत-अछूत
आखौ अकल सांच, मिनखाचारौ हूणिया!

अेक सरीखौ रगत है, अेकल हाडां देह
जीवां करां कळाप, अेक सरीसा हूणिया!

जात-पांत पूछै नहीं, देवळ अर रसूल
धरम ठगोरा बैठ, राड़ मचावै हूणिया!

आभौ आंरी अंगरखी, तावड़ियौ है पाग
हवा अंगोछौ हाथ, रेत पगरखी हूणिया!

थे नीं देखी मावड़ी, थे नीं देख्यौ बाप
हेला-हेल मचाय, थूक बिलोवै हूणिया!

हे त हबोळा खांवतौ, लैरां लेता बोल
कागां भर-भर चोंच, झील निचोड़ी हूणिया!

ताळ-तळायां नीवड़ी, जबरो पड़्यो अकाळ
चैरा-नैण निचोय, होठ पांणलै हूणिया!

अरचण घर दीसै नहीं, आंनै राम-रहीम
छेकड़ देहां खोल, साध पूरलै हूणिया!

भाटां तीरां तोप सूं, मच्या घणा घमसांण
जीग्या परळै बीच, सिरजणहारा हूणिया!

जिकां पळीता बाळिया, वांनै गिटग्यौ काळ
जीग्या काळ-अकाळ, सिरजणहारा हूणिया!

धूसा धंसग्या धूड़ में, तूत्यां समदर मांय
थारी-म्हारी सांस, बजै कबीरौ हूणिया!



● लेख

डॉ. नीरज दड़या

कहाणीकार अशोक जोशी 'क्रांत'

राजस्थानी कहाणी नै भारतीय कहाणी रै बरोबर ऊभी करणियां हरावळ कहाणीकारां में अशोक जोशी 'क्रांत' रौ नांव अवस याद राख्यौ जावणौ चाइजै। कहाणी-संग्रै 'आडंग' (2003) अर 'पावसी' (2009) रा कहाणीकार अशोक जोशी 'क्रांत' (2 अक्टूबर 1955-30 जून 2013) री कहाणी-जात्रा अकाळ मौत सू अधबिचाळै भलाई छूटगी हुवौ, पण जित्ती कहाणियां बै लिखग्या कूंत करियां कमती नीं लखावै। किणी पाठक री कहाणी सूं काई मांग हुवै? विचार करां कै कहाणी सूं वौ काई उम्मीद राखै? कहाणी में नुंवी बात, नुंवी बुणगट अर मन-रुचती भासा दाय करीजै। पाठक नै उणरै मन नै परस करणवाळी कहाणी चाइजै। वौ चावै कै कोई कहाणीकार उण रा सपना कहाणी में साकार करै। कहाणी री दुनिया में जथारथ भेळै वौ आपरी कल्पना रौ संसार ई देखणौ चावै। वौ हूस परवाण आपरी बात नै कहाणी में साकार हुवती देख्यां कहाणीकार माथै भरोसौ करण लागै। इण ढाळै अशोक जोशी 'क्रांत' नै म्हें पाठक रूप भरोसैमंद कहाणीकार कैय सकूं।

अटै अेक दाखलै रूप बात करणी चावूला। आं ओळ्यां नै बांचौ- "म्हें देख्यौ अेक डगदर बापू री छती माथै आपरी हथेळी राख र जोर-जोर सूं धचका देय-देय वारौ सांस पाछौ लावण री कोसिस कर रैयौ हौ। आखिर में डगदर वारी छती में वौ इंजेक्सन लगायौ जिकौ म्हें अबार-अबार लाय नै दियो हौ। पण उण रौ भी कोई असर नीं हुयौ। सायत बापू रौ सांस मूडै सूं निकळ्यौ हौ। वारौ मूडौ यूं रौ यूं फाटोडौ रैयग्यौ। भाख फाट चुकी ही।" (अढाई घर री चाल : पेज-63) आं ओळ्यां में कहाणीकार जाणै म्हारी आपबीती लिखी है। आ री आ सागण घटना म्हारै सागै हुयी। कहाणीकार जद किणी पाठक रै अंतस नैं सबद देवण लागै तद उणरी साधना सफल मानीजै। हरेक कहाणी किणी अेक पाठक री कोनी हुय सकै, पण जद उणनै आपरी देखी-सुणी-भोगी घटनावां किणी रचनाकार री कलम सूं आवती दीसै तद उण माथै उणरौ पतियारौ बधतौ जावै। किणी पण रचना में बांचणियै नै प्रभावित करणौ लाजमी हुवै।

अेक पाठक रूप म्हारी पसंद-नापसंद हुय सकै। कोई कहाणी बांचणी चालू कर र दाय नीं आवै तो अधबिचाळै छोड दूं... कहाणी रौ कस जोवण खातर बीच रा केई अंश छोड र

उणनै यूँ ही पूरी कर देवूँ। मन-माफिक भावबोध री कहाणी नै नीं जाण'र बांचण री टाळ कर दूँ, पण जद म्हें आलोचक रूप किणी कहाणीकार सूँ जुड़ जावूँ तो बांचण री दीठ कीं न्यारी हुवै। हरेक रचनाकार रौ आपरौ रचाव हुवै अर उणमें दुनिया हुवै। रचनाकार री उम्मीद रैवै अर आलोचक रौ फरज ई हुवै कै वौ किणी रचाव री पीड़ नै समझण रा पूरा-पूरा जतन करै।

औ असूल हुवणौ चाइजै कै किणी रचना अर रचनाकार री कूंत सूँ पैली उण खातर आदर री भावना हुवै अर आ सावचेती म्हारै आलोचक री जिम्मेदारी बधावै। खथावळ री जागा नेटाव जरूरी हुवै कै किणी रचना-पाठ में उणरौ कोई सबद-भाव अर अरथ कठैई हाथ आवतौ-आवतौ तिसळ नीं जावै। इणी घणै धीजै रौ अठै औ नतीजौ आज म्हारै साम्हीं है कै कहाणीकार अशोक जोशी 'क्रांत' रै रैवतां, म्हें फगत उणां रै कहाणी-संग्रै 'पावसी' में छपी अे दोय ओळ्यां ई लिख सक्यौ- "अढाई घर री चाल कहाणी रा केई-केई प्रसंग इण ढाळै आखरां में ढाळ्या है कै वै काळजै ऊंङे ताई पूगै। अेक बात भठै लारलै केई बरसां सूँ म्हें देखूँ कै आजकाल खासा कहाणीकार छोटी-छोटी कहाणियां ई लिख रैया है, पण क्रांत जिण ढंग सूँ मठार-मठार लिखै, उणरी न्यारी परख हुवैला।" (छेहलौ कवर पेज) घणी तकलीफ कै क्रांत रै रैवतां न्यारी परख कोनी करीज सकी। हाल उणां सूँ घणी उम्मीदां ही। राजस्थानी कहाणी रै सरूप नै जाणै वै डाइनामाइट लगा'र साव तोड़-फोड़ कर'र नुंवौ बणावण में लाग्योड़ा हा। 'क्रांत' सगळा रौ ध्यान तौ खींच रैया हा, पण आ कुण सोची कै काळ वां सागै अन्याव करैला। इण जात्रा बिचाळै भाई अशोक जोशी 'क्रांत' रौ जावणौ कहाणी रै खातै नीं पूरीजै जिसौ नुकसाण कथीजैला।

कहाणीकार मालचंद तिवाड़ी लिखै- "कहाणी किणी अबोट, रोजमरा री अबखाई सूँ अलायदै साच नै रूपायित करण रौ कला-कर्म है, या पैली सूँ हासिल कथाकार मिनख रै स्वगत फैसलां नै कहाणी विधा नै अेक परफोर्मा ज्युं बरततां थकां पाठकां नै पुरसण रौ सुविधाजनक तरीकौ? कथाकार नै आपनै हरमेस इण सवाल सारू खुल्लौ राखणौ चाइजै।" (पावसी : बहुवर्णी अनुभव लोक : पेज-7) स्यात इणी ढाळै रै सवालां सूँ आंम्ही-सांम्ही हुवतां क्रांत आपरै जीवण-काल में केई कहाणियां रची। उल्लेखजोग है कै हरेक कहाणी में नवी बुणगट अर अबोट कथानक आपरी हूस दीसै। क्रांत आपरै कथा-संसार में कथा-प्रयोगां री इसी दुनिया सिरजी कै उणरी सरावणा करणी पाठक-आलोचक री मजबूरी बण जावै। क्रांत री कहाणी-कला रै मारफत किणी कहाणीकार सूँ जिकी जिकी उम्मीदां पाळूँ वै अठै राखण रौ जतन करूँला।

'आइंग' अर 'पावसी' रा कहाणीकार अशोक जोशी 'क्रांत' री कहाणियां बीजै कहाणीकारां सूँ आकार-प्रकार अर बणगट में न्यारी हुवै। आपां नै वै जिण निरवाळी दुनिया में लेय'र जावै.... बठै पूयां पछै वा भूलीजै कोनी। आं कहाणियां रौ मन माथै असरदार रंग जमै.... अर बणगट री जिकी ओळूं बच्योड़ी रैय जावै, वा दूजै कहाणीकारां सूँ साव जुदा हुवै। परंपरागत बणगट सांम्ही साव नुंवी बणगट रा केई-केई दीठव 'क्रांत' री कहाणियां में देख सकां। जरूरत मुजब राजस्थानी भेळै हिंदी रो प्रयोग कहाणी-प्रवाह में ना तौ कठैई रड़कै अर

ना कठैई कोई अवरोध उपजावै। खळखळ बाजती धार सरीखी भासा में रची आं कहाणियां मांय सरलता-सहजता अर मिनखाजूण री नाटकीय भंगिमावां मिलै। अै कहाणियां जमीन सूं जुड़'र आगै बधण री हूंस पाळै-पोखै। जागासर मुहावरा अर कहावतां रौ असरदार प्रयोग आं कहाणियां री न्यारी खासियत मानीजै। सारथक अर सफल प्रयोग उणनै कैय सकां जिकौ अंतस मांय रचीजै, अर अेक सूं दूजै-तीजै अंतस री जातरा करतौ रैवै।

मन नै परस करती गजब री खिमतावाण कहाणी है- 'दाग'। इण कहाणी रौ नायक लेखक-मास्टर चावी कहाणी 'कफन' (प्रेमचंद) बांचण रै आनंद में डूब रैयौ है। कहाणी में कहाणी बांचण रै इण दीठाव सूं आ कहाणी चालू करीजै। जठै कहाणी 'कफन' खतम हुवै वठै कहाणी 'दाग' सरू हुवै। अठै सवाल जलमै कै कहाणीकार समानांतर पाठ री भंगिमा क्यूं राखै? फेर बांचण नै कहाणी कफन रौ अंश क्यूं? अठै कांई कोई अरथ जोड़णौ चावै? जे कैवां कै कहाणी 'दाग' में मिनख नै मिनख छळ रैयौ है। आ तौ जूनी बात है। छळ कद कोनी करीज्या? तौ अबोट कथानक रौ अरथाव कांई हुवै? अठै प्रेमचंद री जमीन सूं इण कहाणी नै जोड़'र जोशी परंपरा सूं जुड़ाव दरसावै। कहाणीकार कैवणौ चावै कै इतै बदळाव बाद ई कठैई हालत में सुधार मिलैला, तौ कठैई हाल सुधार बाकी है। इण ढाळै रौ समानांतर पाठ बियां तौ अेक नुंवौ प्रयोग कैयौ जाय सकै, पण असल में आपां प्रेमचंद री कहाणी कफन री ओळूं नै सागै लेय'र जद आ कहाणी बांचा तौ कहाणीकार ठेठ अंतस तांई पूग जावै। काळजै मरम पूगावण में दाग खातर कफन ई मददगार साबित हुवै। राजस्थानी में प्रेमचंद री परंपरा नै पोखणवाळा कहाणीकार इण कहाणी सूं सीख सकै कै परंपरा आधुनिकता में कियां ढाळै। असल में आ कहाणी अेक आदमी मतलब संवेदनशील मास्टर रै ठगीजण री कहाणी है। संवेदना रै साथै खिलवाड़ करतै सामाजिक जथारथ री कहाणी है। पढियै-लिखियै रै गुण अर अनपढ रै औगुण बिच्चै चालती लड़ाई अर ठगी री कहाणी है। कहाणी 'दाग' रौ अेक पाठ आपरै भेळै अनेक स्तर माथै घणा पाठ-अरथ चवडै करै। दाग फगत जोशी री ई नौ राजस्थानी री प्रतिनिधि कहाणी मानी जाय सकै।

कहाणी खातर नुंवी जमीन सोधण रौ काम नवा कहाणीकारां में अशोक जोशी 'क्रांत' करियौ। कहाणी में सेक्स री बात 'गळी जिसी गळी', 'भूख जिसी भूख' अर 'अठै सुख कठै' आद कहाणियां रै मारफत सांवर दइया उठावै तौ जोशी इणी कथ्य-परंपरा में प्रयोगवादी कहाणियां-'पतियारौ' अर 'मुट्टी भर आभौ' रचै। चावा-ठावा कथाकार यादवेन्द्र शर्मा रौ कैवणो हौ- "क्रांत आपरी इण कहाणियां में साथळ माथै थाप मार'र केई लुक्योड़ी बातां रौ भेद खोलै। वौ सच्चाई रौ निचोड़ बतावण रौ जतन करै।" (भूमिका : कहाणियां रै पेठै : पेज-8) नाटकीय ढाळै में रची लंबी कहाणी 'पतियारौ' बांचतां कहाणीकार सवाईसिंह शेखावत री 'कूपळ' कहाणी चेतै आवै। अठै पण गाय अर गोधै रै मारफत पेमा अर धापू घरबीती सुणावै। आ यौन-मनोविज्ञान सूं जुड़ी कहाणी लुगाई रै मन मांयलै पतियारै री पुड़तां होळै-होळै सांम्ही राखै। इण कहाणी री खासियतां री चरचा करां तो पैली तो विसय इसौ अबखौ, कै कोई हाथ नौ घालै जिसौ। दूजी- नाटक री आंट रौ रंग संवादां में पठनीयता। तीजी- पड़दैवाळी बात नै

संकेतां मांय ठेठ ताई निभावता थकां परोटणौ। बंतळ में घरधणी री कमजोरी नै गुजरात संदर्भ सूं घणी सावचेती सूं कहाणीकार राखै।

अेक दूजी कहाणी 'मुट्टी भर आभौ' यौन मनोविज्ञान सूं जुड़ी सही सोच नै उजागर करती विचारवान कहाणी है। लीक सूं हट 'र आ कहाणी नाटकीय अंदाज अर आपरै संवादां में चिड़ा-चिड़ी री बंतळ नै लेय 'र चालै। लारलै जलम री ओळूं नै अंवेरण री जोरदार बणगट इणनै अेक यादगार कहाणी बणावै। चिड़ी अर चिड़ौ नै नाटकीय रंग में रंगतौ कहाणीकार लारलै जलम री बात काढै अर प्रेम रौ साचौ अरथ यू राखै- "बात वा नीं है... म्हें तौ... म्हें तौ औ मानूं कै ताळी कदैई अेक हाथ सूं को बाजै नीं... इणी भांत प्रेम तौ अेक पवित्तर भावना है... इणमें कोरी वासना घणी घातक व्हें.... इण सारू अंतस मन रौ साचौ अर निकेवळौ प्रेम ही जीवण रौ मूळ आधार है।" (आडंग : मुट्टी भर आभौ : पेज-86) प्रेम अर वासना माथै इण ढाळै री कहाणी मिलणी साव ओखी है। खासियत अर तारीफ री बात आ है कै इणमें कोई नारौ अर फतवौ आपरी समझ रौ कहाणीकार कोनी प्रगटै, बस होळै-होळै बात मांय सूं बात काढै।

क्रांत आज री भ्रष्ट व्यवस्था, रिश्वत अर हरामखोरी नै संवाद-शैली री कहाणी 'जोड़-बाकी' में परोटै। कहाणीकार अठै भी खुल 'र आपरी बात राखै- जिणमें मिनख री मनगत अर परस्त्रीगमन री बातां है। इण कहाणी में मिनख अर भ्रष्टाचार नै अेकठ नागौ करीजै। इणी ढाळै संवाद-शैली रौ नुंवौ रूप कहाणियां- 'पतियारौ' अर 'मुट्टी भर आभौ' में देखण नै मिलै। कहाणी 'कापुरस' में रेल-जात्रा करणिया धणी-लुगाई रै बिखै री कहाणी है। कहाणी री बेसी खिमता इणमें नाटकीय हुवण सूं कैयी जा सकै। आ कहाणी अेक पासी अतिनाटकीय सरूप में रेल-जात्रा अर देस री बिगड़ती व्यवस्था सांम्ही राखै, तौ दूजै पासी किसमत अर संजोग री बात ई कैवै।

जद पैल पोत आडंग कहाणी संग्रै सांम्ही आयौ, तद सगळ इण साव नवै नांव नै लेय 'र सोचा-विचारी करी। लखायौ कै इणमें अंतस-दरद रै अळूझाड़ री कहाणियां मिलैला। मिनखाजून रै हियै केई-केई परतां मांय उमड़तै-घुमड़तै आडंग नै जोशी रचण री खेचळ करी ही। 'आडंग' कहाणी में लुगाईखोर आदमी री अणमाप अनैतिक-अमर्यादित वासना रौ चितराम मिलै। कहाणी 'झेर' में प्रगतिवादी सोच रै कारण मजदूर अर मालिक की जुगां-जूनी लड़ाई है, तौ कहाणी 'राड़ अर बाड़' में आर्थिक तंगी सूं तूटतै घर-परिवार रौ सरावणजोग चितराम मिलै।

पाठक नै संबोधित नाटकीय संरचना में लिखी कहाणी 'भाग' नुंवौ प्रयोग है, जिणमें भाई-भाई री लड़ाई अर भेदभाव री जूनी कहाणी नुंवै गाभा में सोवणी लागै। कहाणी में कहाणीकार अर सूत्रधार आदि री सिरजणा नाटककार-कहाणीकार जोशी री सिरजणा अर सोच रौ कमाल है। असल में इण कहाणी में टुकड़ा-टुकड़ा रचीजतौ साच, अेक मोटै साच नै सिरजण रौ काम करै। कहाणी री आ खासियत कैयी जावणी चाइजै कै वौ मूळ मुद्दे माथै घणै नेठाव सूं होळै-होळै पतियारौ सांधता-सांधता पूगै, इण बिचाळै रंग निर्देशक कै चित्रकार दाई कहाणी खातर जाणै भेळा करियोड़ा सगळ रंगां सूं बांचणियां री ओळख करावै। जिकी जूझ कथा रै मारफत भाग में साम्हीं आवै वा असरदार कैयी जावैला।

काई आज रै सामाजिक, आर्थिक अर राजनीतिक बदळाव सूं मिनख रौ अंतस बदळतौ जाय रैयौ है ? घर-परिवार सूं जुड़ी मा-बेटा अर बाप रै अंतस नै रचती तीन कहाणियां 'पावसी'

संग्रह में मिले। 'भाग' की बात आपां करी अर इण साथै ई 'अढाई घर की चाल' में बदळता आर्थिक हालात, बाप-बेटां रा बदळता संबंध अर पारिवारिक जूझ अर समझ नै अकेट परोटती नुंवी दीठ आं कहाणियां में मिलैला। 'अढाई घर की चाल' अर 'पावसी' कहाणियां में बूढा मा-बाप घर-परिवार की साख सारू खपै। मा-बाप की आ जूझ देखण सू जटै बडेरां रै हियै रौ उजास प्रगटै बटै ई समाज नै संस्कारां अर मिनखाजून की सांवठी सीख मिलै। गौर इण बात माथै पण करियौ जावणौ चाइजै कै आं कहाणियां में कहाणीकार कोई सीख आपरै बांचणियां नै सीखावै कोनी, वौ तौ बस कहाणी में नुंवा-नुंवा नाटक रचै। नुंवी बणगट अंकल संवाद में रचीजी मा की ममता की कहाणी 'पावसी', मायत रौ मन खोलण रौ जतन इणमें मिलै। डोकरी रै मूंडे बोलती आ कहाणी बुणगट रै मेळ माथै सांवर दइया की कहाणी 'थे कद मरोला' सू जुड्योड़ी है। आतम-संताप की आ अके बेजोड़ कहाणी है। 'भाग' अर 'पावसी' कहाणियां की मावां रौ न्यारौ-न्यारौ उणियारौ अटै देख्यौ जाय सकै।

शिल्पगत प्रयोग अर नाटकीय ढंग सू कहाणी 'पैदी-मात' ऑडिट अर इन्स्पेक्शन रै मिस हुवतै घोटाळा नै उजागर करै। आ कहाणी भ्रष्ट-आदमी की भ्रष्ट-आदमी सू लड़ाई की कहाणी है। राजनीति की अनीत अर जोड़-बाकी नै 'सत्ताखोर' कहाणी चवडै करै। कहाणीकार कोस्टक में कहाणी रै सरू में अर छेकड़ मांय खास टीप राखै, जिण सू कहाणी में नुंवौ रंग आवै अर कहाणी बांचणियां नै लखावै कै आ कहाणी फगत कोई कहाणी कोनी हकीगत है। सत्ता में परसरियोड़ो दोगलापणौ उजागर करतौ बगतौ कहाणीकार अके नुंवी दुनिया में लेय र जावै जटै धोळा गाभा आळा देसभगतां रौ साच, वां रा सूगला जोड़-तोड़, पखापखी आद बांचण नै मिलै पण सजीव भासा रै कारण अटै लिखणौ चाइजै कै देखण नै मिलै।

कहाणी 'बात करौ हौ भाई!' में तीन लघुकहाणियां नै अके सूत्र ओळी सू गूथणौ प्रयोग मानीजैला... तो कहाणी 'नीत' में अके सिरैनावै सू पांच रचनावां है। पांचां की न्यारी-न्यारी बात करां, पछै विचार करांला कै कांई कारण कहाणीकार पांच कहाणियां नै अकेट राखी। कांई अशोक जोशी 'क्रांत' कहाणी में नुंवो चोळकौ करण खातर अके कहाणी में अके की जागा तीन-पांच कहाणियां भेळी करै? अटै कहाणी नै आपरै परंपरागत रूप सू मुगती रौ सोच तौ है, पण कहाणी में अके सूत्र नै पकड़ता थकां उणी सूत्र सू दूजी-तीजी कहाणी भेळै राखणी-असल में मिनख रै प्रवृत्तिगत सोच अर बरताव नै देखण-दिखावण रौ जतन है। 'नीत' कहाणी में इण सबद नै नुंवी दीठ में राखण रौ जतन देख सकां। आं कहाणियां रै मारफत लघुकथावां नै अकेट करण रौ जतन हुयौ है।

कहाणीकार अशोक जोशी 'क्रांत' रै कहाणी संग्रह पावसी बाबत चावा-ठावा आलोचक कवि-कहाणीकार नंद भारद्वाज रौ कैवणो है- "लोकराज की अबखी जात्रा में आज जिका अणभव आपां रै साम्ही आया है, देखनै इचरज हुवै कै औ बगत अर समाज सेवट किण काटै पूग नै बीसूंगी लेवैला? मौजूदा समाज-व्यवस्था अर राजनीति में जिकी प्रवृत्तियां अर अबखायां परतख दीखै, जिण अन्याव अर अनीत रै साथै आपरौ नांव जुड़तौ देख लोग दर ई नीं संकीजै, उण समाज परिपेख सू कांई कांई उम्मीद बांध सकै? अके हळकी-सी उजास की किरण जे कटैई दीखै तौ वा साच अर न्याव सारू जूझतै उण मानवी रै अंतस में अवस दीखै, जिकौ उण

अबखायां रै बिच्चै ओजू उणी भांत जूझै अर आ उम्मीद जगायां राखै कै रात भलां ई किती ई लांबी हुवौ, अंधारौ किती ई गाढौ हुवौ- कोई रात, कोई अंधारौ सूरज री ऊगाळी नीं ढाब सकै। अशोक जोशी 'क्रांत' री अै कथावां बदळतै बगत अर समाज रै इणी साच नै आपां सांम्ही राखै।''

बतौर इक्कीसवीं सदी रै कहाणीकार रूप जोशी री कलम सूं जिकी कहाणियां निकळी उण मांय लोककथा अर कहाणी री जूझ कोनी। जूनी भासा अर बणगट रौ संकट कोनी। कथानक नै दुसराव री जागा कहाणीकार आपरै असवाडै-पसवाडै रै जथारथ सूं जद जूझ मांडै तद हरेक दांण कहाणी पकड़ण खातर आपरौ नुंवौ जाळ फैलावै। राजस्थानी कहाणी-जात्रा में नुंवा प्रयोग, नाटकीय भासा अर साव निरवाळी बणगट रै पाण 'आडंय' अर 'पावसी' रा कहाणीकार अशोक जोशी 'क्रांत' लूंटा कहाणीकार रूप जाणीजैला।



सी-107 ए, वल्लभ गार्डन, पवनपुरी, बीकानेर 334003

मुखौळ रा चित्रकार : महेन्द्र प्रताप शर्मा यूं तो अबार राजकीय उच्च मा. विद्यालय मांय प्राध्यापक है पण अेक लूंटा चित्रकार, साहित्यप्रेमी अर राजस्थानी भासा रै समर्थक रै रूप में भी आप ओळखाणीजै। आपरो जलम 9 फरवरी, 1970 नै नोहर तहसील रै खरसंडी गांव मांय व्हियौ। आप केई राज्य अर राष्ट्र स्तरीय अेकल अर सामूहिक चित्र प्रदर्शनियां मांय भाग ले चुक्या है। आप कला विसयां माथै लेखन भी करै।

हिन्दी-राजस्थानी मासिक पणिहारी

संपादक : चन्द्रेश बी. कुमावत
सह संपादक : महेन्द्र एन. वीरवाडिया
मानद संपादक : नीतू एन. परिहार
मोल : अेक प्रति 25 रिपिया, तीन बरस
रा : 830 रिपिया, पांच बरस रा : 1320
रिपिया, आजीवण : 5100 रिपिया
प्रकासक

पणिहारी मीडिया पब्लिकेशन
ऑफिस नं. 51, गोयल प्लाजा, कार्टर
रोड नं. 4, मेन कस्तुरबा रोड
बोरीवली (पूर्व) मुंबई-66

राजस्थानी साहित्य एवं संस्कृति परिषद् री द्विमासिक पत्रिका कुरजां

प्रधान संपादक : मनोहरलाल गोयल
संपादक : ब्रह्मदत्त शर्मा
मोल :
दो बरस : 200 रिपिया
पांच बरस : 500 रिपिया
संरक्षक : 5000 रिपिया
प्रकासक

राजस्थानी साहित्य एवं संस्कृति परिषद्
गोयल भवन, बिष्टुपुर, जमशेदपुर 831001

हस्तिनापुर

गंगापुत्र भीष्म
थानै
हस्तिनापुर नै
जबाब देवणौ पड़सी
क्यूं... ?
आखर क्यूं ?
उण बगत
थारी आंख्यां
पाथरीजगी ही
जदकै
थारै सांम्ही
सांप्रतेक होवणवाळी ही
नागी द्रौपदी ।

पितामह भीष्म !
थानै हस्तिनापुर नै
जबाब देवणौ पड़सी
काई अक द्रौपदी सूं
बध नै ही
थारी हस्तिनापुर ?
क्यूं ?
आखर क्यूं ?
थे औ पांतरग्या कै
जिणनै थे वचन दिया हा

जिण सारू थे
थारी जूण
तपतै धोरा दाई भोगी
वा भी
अक मां ही
अर
जिणरी कूख सूं जलमिया
अक मां ही
गंगा मां
अर
जिणनै थे नागी व्हेती देखता रैया
वा भी अक मां ही
हस्तिनापुर री
भावी पीढी री मां ।

गंगापुत्र भीष्म !
थानै हस्तिनापुर नै
जबाब देवणौ पड़सी
अक कुळवधू रै
हांचळ रै आंचल सूं
बधनै
कद होयगी ही हस्तिनापुर ?
यूं तौ थे

इणनै भी
अेकर बार
नागी करण सारू
उघाड़ियौ हौ
इणरौ चीर

वाढ्या हा
इणरा हांचळ
अेक इंद्रप्रस्थ
अर

दूजोडौ बचियोडै हस्तिनापुर रै रूप
काई इण सूं भी ठाडौ को होयौ नीं
थारौ काळजौ
जिकौ थे अेक
हाड-मांस री
हस्तिनापुर नै
सांप्रतेक देखणी
चावता हा नागी ?

गंगापुत्र भीष्म !
थानै
हस्तिनापुर नै
जबाब देवणौ पड़सी
कठैई

थारै सापित मन में
नागी लुगाई रौ
उघाड़ौ डील देखण री
लालसा तौ नीं जागी ही ?
कठैई थारी दब्योड़ी
कुंठित वासना
भभक तौ नीं गी ही
ज्वालामुखी दाईं
थानै
हस्तिनापुर नै
जबाब देवणौ पड़सी ।

गंगापुत्र भीष्म !
हस्तिनापुर
द्रोपदी
अर इतिहास नै ।
❖ ❖

उगमसिंह जागरवाळ दादीसा री हवेली

घर में अेक कांनी
दादीसा रौ कमरौ
दादीसा कैवै उणनै
आपरी हवेली !
हवेली मांय दादीसा री दुनिया
गीता-रामायण बांचै
करै पूजा-पाठ, फेरै माळ
सुणावै ग्यान री बातां
पोता-पोतियां नै
देवै घणी-घणी आसीसां
म्हारा दादीसा
म्हानै चोखा लागै
वै अर वारी हवेली ।

पगडांडियां

चालता-चालता ई मंड जावै
कोरी धरती माथै नुंवी पगडांडियां
चाल पड़ै रस्ता री कोर कानी
सेवट वानै मिलणौ है सड़कां सूं
मिलिया रैवैला नांव-निसाण
नीं तौ मिट जावैला वारा नक्स
चालता-चालता ई मंड जावै
कोरी धरती माथै
पगडांडियां ।
❖ ❖

स्वाद

वै ऊभा जोवै 'सोनार-किलै' री
झळमळती पीळी पांखड्यां ।
वांरी जबान माथै स्वाद रळकै, पेप्सी अर कोका रौ ।
गाइड सोधै है स्वाद वारै खुंजां में ।
इतिहास 'र' स्थापत्य रौ घोळतौ स्वाद
वौ टंटोळै वारा खुंजा ।
चिडियां रौ अेक दूळ निकळग्यौ है वारै ऊपर सूं ।
'सोनार-किलै' माथै घिर आई काळी घटावां
दुरिस्टां खोल लीनी है छतरियां
बिरखा रै स्वाद सूं अणजाण ।

सोनार किलै सूं अळगौ थार रै पसराव
आपरै खेत री पाळ माथै ऊभै अेक करसै
खोल लीनी है पिरासियै सूं भिंज्योड़ी आपरी बंडी ।
माटी री मैक भरतां आपरी फुरणियां
उण उगेरी राग मांड ।
उडीकती बेकळू रौ बदळग्यौ है स्वाद ।

रंगां सूं भविस बतावण वाळां रै बिचाळै
वधगी है बहस-
'स्वाद रौ रंग काळौ है' कै गोरौ !'
घणकरां रौ मत आसमानी रंग साथै हौ ।
'समानता' रौ स्वाद बांटणियौ
गाळियां काढै हौ धनपतियां नै ।

स्वाद मीडिया रौ चटकारां में
'टी.आर.पी.' सारू वै घडै
बिना हाथ-पग रा किस्सा ।
स्वाद बूढापै रौ बंतळ में
बंतळ रै बिचाळै आ जावै बेटा

बेटां री आंख्यां सूं अलोप व्हेगौ है बचपणौ
तिङ्कयौ है हेज रौ स्वाद ।
जवानी स्वाद सोधै गळियां-सडकां माथै
घर-आंगण उण सारू व्हेगौ है बेस्वाद ।

‘स्वाद’ री सारी सडकां अमेरिका कानी क्यूं जावै ?
काई सारी धरती व्हेगी है बांझ ?
अक तणियोडौ चैरौ विगोवै हौ अमेरिका नै ।

‘समै सगळा स्वाद बिगाड़ नाखिया है’-
चरचा चालै ही चौराहां रै ठीक अध-बीच ।

‘गिरस्थी रौ स्वाद बिगाड़ दियौ इण मॅगाई’
मॅगाई स्वाद बिगाड़ दियौ सरकारां रौ
संसद में चालै ही बहस मॅगाई माथै
नेतावां रै चैरां रौ बिगड़यौ हौ स्वाद ।

‘बिग-बॅग थ्योरा’ समझावता साईस रा टीचर
समझावै हा-
‘ब्रह्माण्ड भगवान रै नीं
भौतिकी रै सिद्धांतां सूं चालै ।’
सुण ‘र स्वाद बिगड़यौ हौ
‘आस्था’ अर ‘बिस्वास’ रौ ।

जबान रै स्वाद में भर-खपग्या सगळा गिरजड़ा
पारसियां रौ धरम संकट में है ।
पाठकां रै स्वाद में नमकीन भेळ रैयौ हौ
अक अखबार ।

महँ बचावूला धरती माथै मिनखपणौ
घोसणा कीनी ही कवि आपरी कविता में
आपरै आखर रै स्वाद में रमियोडौ हौ कवि ।

गाईड लेय आयौ हौ टुरिस्टां नै
सोनार किलै री बुरजां माथै

वौ फेरुं बडग्यौ हौ उणां री जेबां में
इतिहास रै रसीलै घोळ सागै ।

अंधारै में चमकण लागा हा, गोरहरै किलै रा बुरज
टुरिस्टां री नीली आंख्यां में
उतरण लागौ हौ 'इचरज रौ स्वाद' ।
'किण स्वाद रै पाण
सूतोडै इण थार रै सरणाटै में
रचियौ वां मिनखां
औ सोनलिया 'थार कंवळ'
'जरूर पीवता व्हेला वै
पेप्सी कै कोका जैडौ कोई पेय ।

सोनार किलौ त्रिकूट-पहाड़ी सूं करतौ बंतळ
लेवै हौ-
उणां रै इचरज रै स्वाद रौ स्वाद ।



'अपरंच' अंतरजाळ माथे

अबै आप 'अपरंच' नै अंतरजाळ (इंटरनेट) रै मारफत भी देख सकौ। राजस्थानी रा चावा-ठावा लेखक अर आलोचक डॉ. नीरज दइया (बीकानेर) 'अपरंच' रै अंतरजाळ अंकां रौ संपादन अर संचालन करै। अठै आप 'अपरंच' रा सगळा अंक पी.डी.एफ. लेय सकौ। अठै क्लिक करौ सा :

www.apranch.wordpress.com

आऊंजी-भाऊंजी को गीत

आऊंजी तौ बात बेई
साथ कोई चीते छा,
करम सूं सगत्यां ही आ बैठ्या भाऊंजी....

आऊंजी बोल्या कै
सूरज भळसावै छै
भाग ही न्हं फाटै
म्हां अशी जुगत करां तौ/
भाऊंजी नै हुळस 'र
क्ही- सुणो आऊंजी !
बुण द्या म्हां सूरज के
अनै- कनै सरणाटौ/
फ्हेली तौ हेत कौ
पतियारौ बंधावावां
फेर ऊं का म्हेलड़ा ई
जा 'र कतस्याऊं जी....

बायरो जे मूठी में
बांध ल्यां तो सगळा जस
अेक दिन आपणै ही
खातै मंड ज्यावैगा/
भाऊंजी की बात सुण 'र
आऊंजी नै सीख दी
'थोड़ा भी चूक्या तौ
मूंडा भंड ज्यावैगा/
ई सूं तौ चोखौ छै
थे उठी बांबी मं
हाथ द्यौ, म्हुं अठी
मंतर गुंजाऊं जी....

❖ ❖

3 ए-30, महावीर नगर विस्तार, कोटा 324009

गरीबी रा झाड़

गरीबी रा पेड़ नीं
झाड़ होवै
कंटीला
या फेर जळकुंभी
गुथंमगुथा
रिसता पोखर नदी नाळं में ।

पनीली आंख्यां
सुपनां री जगां
वठै थोर उग आवै
सब्जा बागां बिचाळै
आतंक मचाती ।
दो दिन कंवळी सरस झाड़
जड़ कट्यां उडै-फिरै
सीव लांघता
अंध दिसावां में ।

भगुळं रै हाथ पड़्यां
बवंडर
बणै हमेस
हंसती आंख्यां री किरकिरी ।

थक्या-मांदा
लू बिचाळै
उडता फिरै
गरीबी का झाड़
चूल्है री आंच सारू ।
❖ ❖
ए-306, महेश नगर
जयपुर 302015

● अकल काव्य-पाठ

डॉ. रमेश 'मयंक'

डॉ. रमेश 'मयंक' रौ जलम 23 दिसंबर 1954 नै हुयौ। आपरी भणार्ई अम.अ. हिंदी, अंगरेजी, अम.अेड., पी.अेच.डी. ताई हुई है। डॉ. मयंक हिंदी अर राजस्थानी दोनूं भासावां में सास्ती लिखता रैवै। आप केई भारतीय भासावां री रचनावां रा राजस्थानी में अनुवाद लगोलग करता रैया है। केई पत्र-पत्रिकावां में आपरी रचनावां छपती रैवै। हिंदी में अनेक पुस्तकां रै अलावा राजस्थानी में 'सोनै रौ सूरज', 'मिनख री मुळक' अर 'सिरजण परखता आखर' नांव री पोथ्यां छप चुकी है। दोय पोथ्यां छपण सारू त्यार।

दरद

मैं नीं समझूं अरथ
'राम-नाम जपणा;
पराया माल अपणा'

मैं नीं पसारूं पगां नै
गूदड़ी सूं बारणै,
ठंड सूं बचतौ
गेलै आवूं-गेलै जावूं
सत-नियम
मिनख-मरजाद निभावूं

मैं अभावां री
जियाजूण री खैंचल करतौ
फाटोड़ा गाभां नै
बार-बार सींवतौ
संतोस री सीळी वायरी
कोनी मैसूस कर पावूं
जरूरतां री चीजां
कठा सूं, किस्तरै मोलावूं?

पण, फेर भी
उतारणौ पड़सी
अभावां री फाट्योड़ी गूदड़ी
वो दिन-
सहन करणै री हदां नै तोड़णै रौ
आखिरी दिन होसी
खतरां सूं खेलणौ पड़ैगा
नुंवा मारग खोलणा है तौ
दरद झेलणौ पड़ैगा।

कविता

कविता-
जीवण रा कुरुखेत में
रोटी री गीता

कविता-
जीवण-जातरा में
आवण-जावण रौ चक्कर
पेट-भूख सूं टक्कर।

रोटी

रोटी- रास रचावै
रोटी- नाच नचावै
रोटी रा खेल-खिलौणा
घणा-घणा सलौणा
सगळ्यां री आडु में रोटी है
जिकी गाडी रा पड्डां सू ई मोटी है ।

बीतियोडा बगत में नारी

बीतियोडा बगत री नारी
पड्डा-घूंघटा में लिपटी
अ-अनार रौ नीं जाणती
रसोडा मांय चूल्हौ-चौकौ
फाचरी-छाणां-भूंगळी साथै
जिंदगाणी बितावती
आंख्यां-धुंवाडा सूं
आंधळाय जावती
जिंदगाणी- छाणां री भांत
कजळायती,
सासू-नणंद रा ताना तौ
सासरिया रा गीत-गाणा
घट्टी, परिंडौ, पिणघट
पाणी रौ बेवडौ
हमेस काम दर काम
बंधुआ मजूर सरीखौ अंजाम

कुण समझी-
उणरी कुंठा-दरद
सिसाडा रा इसारां नै
अपमान-धुतकारां नै

वा चिड़ी-चुप्प
गरदन नीची-अंधारौ गुप्प ।

आज री नारी

आज
नारी हुयगी खास
भणाई रौ उजास
गोडावाणौ राज है
पाछै छूट्यौ- घूंघटा रौ रिवाज है

साधन-सुविधावां सूं
काम-कमाई रा अवसरां सूं
तूट्यौ जूनौ मिथक
पगां री रेत रौ

अबै इण सारू
रसोई में- गैस-कूकर
मिक्सी, फ्रीज, वासिंग मसीन है
टी.वी., रेडियो री दुनिया रंगीन है
पण-

पीजा-बरगर री संस्कृति
केट-वाक ताई री प्रगति
धज्जियां उडावै
फैसन रौ भूत माथै चढ जावै
तौ-

हवा में उडण वाळौ
धम्म सूं नीचै आवै
दहेज देह रौ दानव
कन्या भ्रूणहत्या नै
घरेलू हिंसा- अत्याचार नै बधावै
चुनौतियां रा पहाड सूं
अगन परीक्षा सरीखा झाड सूं
मुगती सारू
मुट्टियां बांधौ
मजबूत बणावौ इरादौ ।

❖❖

बी-8, मीरां नगर
चित्तौड़गढ़ 312001

● जात्रा-वृत्तांत

पुष्पलता कश्यप

म्हारी गोवा जात्रा

अबकै मई रै महीनै में म्हारै गोवा, पूणै, लोनावाला, खंडाला, महाबलेश्वर अर शिरडी घूमण-फिरण री जचगी। जिकी रेलगाडियां में आरक्सण मिल्यौ वां में करवाय लियौ। आरक्सण लगैतगै डेढ महीनै पैलां करवाणौ पड़्यौ, क्यूँकै आं दिनां में गरमी री छुट्टियां हुय जावै अर सगळी गाडियां में अणमावतौ भीड़-भड़कौ रैवै। ठौड़ मिलणी अबखौ काम हुवै।

13 मई 2008 रा म्हारी जात्रा रणकपुर एक्सप्रेस सू सुरू हुई। जोधपुर सू म्हे चढ्या। दूजै दिन 14 मई रा बांद्रा उतरगा। गोवा खातर म्हानै कोंकण रेलवे री ट्रेन पकड़णी ही। आ ट्रेन सी.एस.टी. (छत्रपति शिवाजी टर्मिनस) टेसण सू जावै। इणरौ जूनौ नांव 'वीटी' है, टैक्सीवाळा ज्यास्ती करनै इणी नांव सू ओळखै। टैक्सी करनै म्हें वठै पूग्या। वेटिंग रूम में ठौड़ लीवी। वठै निपटनै सिनान-संपाड़ा कर्च्यां पछै नास्तौ कर्च्यौ। ट्रेन रात रा ही। म्हारै कनै आखौ दिन पड़्यौ हौ। सामान क्लॉकरूम में मेलनै म्हे मुंबई घूमण-फिरण बेई निकळ्या। मुंबई म्हे पैलां दोय बार गयोड़ा हा। सी.एस.टी. (वीटी) सू बस पकड़नै म्हे गेट-वे ऑफ इंडिया पूगा। आ जगै सी.एस.टी. सू घणी आगी नीं है। इंडिया गेट में म्हे बोट में बैठनै समंदर में अेक चक्कर लगायौ। वठै सू बस पकड़नै जुहू चौपाटी पूगा। चौपाटी में घूम्या-फिर्या अर भेलपुरी नै मसालैदार चाय रौ आणंद लियौ। वठै सू घूमता-फिरता म्हे हरे रामा हरे कृष्णा मिंदर देखण गया। मिंदर जुहू चौपाटी पाखती आयोड़ै है। घड़ाईदार इमारती भाटै सू बणियोड़ै औ मिंदर सांतरौ अर देखणजोग है। जुहू सागर तट रै मारग में, वीं रै सांम्ही पाड़े मच्छीघर है जिणमें अलेखू किस्म री मच्छियां आपां देख सकां। इण सू कीं ई आगौ नामी-गिरामी वानखेड़ै स्टेडियम आयोड़ै है। स्टेडियम बारै भीड़ हुयोड़ी ही। वां दिना सुपर सिक्स रा मैच चालै हा।

घूम फिरनै पाछा बावड़्या जणै सिंझ्या पड़गी ही। टेसण बारै सिंझ्या रा सड़क री पटड़ियां माथै सजियोड़ै हाट-बाजार सू जरूत रौ कीं सामान मोलायां पछै म्हे अेक आछै होटल में डटनै पेट-पूजा कीवी। टेसण पूगनै सामान लियौ अर कोंकण कान्या एक्सप्रेस प्लेट फारम माथै लाग्यां म्हे वीं मांय म्हारी ठौड़ ठावी कीवी। ट्रेन गोवा रै मडगांव ताई री ही। इणरौ जूनौ नांव मारगाओ है। इण मारग में गाडी केई सुरंगां सू हुयनै निकळै। रात रौ बगत हुवण सू जावती

वेळा म्हे आ सुरंगां नै नीं भाळी। पण वापसी में, मडगांव सू पूणै गया जणै गाडी नै अेक-अेक करनै आ सुरंगां सू गुजरतां देखी। कोंकण रेलवै दुनिया री सै सू लांबी ट्रेन है।

15 मई '08 मडगांव पूगनै म्हे टेसण पाखती होटल ग्रीन व्यू में अे.सी. रूम लियौ। कमरै में रंगीन टी.वी. हौ। होटल में लिफ्ट सेती अे.सी. बार अर रेस्टोरेंट रौ सुभीतौ ई हौ। होटल रै रिसेप्सन माथै घूमण-फिरण बाबत जाणकारी करुयां म्हानै ठाह पड़्यौ कै वटै सू दो फरलाग आंतरे सू लगजरी बसां जावै। होटलवाळौ म्हानै टिकट बुक करवाय लेवण री सलाह दीवी। वटै पूगनै म्हें बात कीवी। बतायौ गयौ कै गोवा रौ दोय रोज रौ पैकेज है। अेक दिन नोर्थ गोवा अर दूजै रोज सारुथ गोवा। सुबै नव बज्यां सू पैलां वटै पूगनै बस में मनचावी सीटां रोकणी हुसी। नौ-साढी नौ बज्यां छूट्योड़ी बस रात रा आठ-साढी आठ तांई पाछी लावै। हरेक ट्रिप सारू अेक सीट रा अेक सौ बीस रिपिया लागै। टिकटां करवायनै म्हे पाछा बावड़िया। होटलवाळौ म्हानै कैयौ कै विसराम करनै आज आप कैनकोना खातर बस पकड़नै पैलोलेम बीच घूम आवौ, भोत सोवणौ सागर-तट है। उतरती वेळा बसवाळौ सू छेहली बस रौ टैम बूझ लिया। अगरजै बस चूक जावौ जणै मडगांव आवणवाळी किणी टूरिस्ट टेक्सी नै हाथ देयनै ढाब लीजौ। कैनकोना खातर बसां बाजार सू हुयनै जायां होटल कामता पाखती म्युनिसिपल गार्डन रै सांम्ही बस अड्डे माथै मिळ जासी।

कमरै में बिसाई खायां पछै चाय लीवी अर हेठै उतरनै बस अड्डे कानी चाल व्हीर हुया। बस पकड़नै म्हे कैनकोना उतरगा। मडगांव खातर आखिरी बस रौ टैम म्हानै साढे सात तांई बताईज्यौ। गोवा रा बीच दुनिया रा सै सू खूबसूरत बीचां मांय है। पैलोलेम बीच घूम्या-फिरुया। बारै आवतां अेक ठेलै माथै चाय सागै गरमागरम आलू रै बड़ां रौ टमाटर साँस सागै सुवाद लियौ। आ टेला-दुकान अेक लुगाई री ही। बावड़ता म्हानै अबेर हुयगी ही। बस नाकै माथै पूगनै ठाह पड़ी कै स्यात छेहली बस निकळगी ही। मडगांव जावणवाळी किणी टूरिस्ट टेक्सी खातर म्हानै खासी ताळ ऊभनै बाट जोवणी पड़ी। छेकड़ अेक टेक्सी आवती दीखी। हाथ देयनै ढाबी। वीं में चढनै म्हे मडगांव मांय बजार में उतरुया। म्हारौ होटल वटै सू साव नजीक हौ। रात पड़गी ही। घणकरौ बजार बंद हुयगौ हौ। टेक्सीवाळौ म्हानै कैयौ कै अटै सै दुकानां बंद हुयां पछै ई दारू री खुली रैवै। अटै री कंटरी वाईन केजू फेनी घणी चावी। गोवा में दारू अर कैसिनो (जुवौ) रौ रिवाज मोकळौ। केजू फेनी काजू सू बणै अर गोवा में काजू निपजै। केजू फेनी रौ मेडिकल उपयोग ई है। गरम करुयां इणरौ अेल्कोहलिक अंश भाप बणनै उड जावै अर बाकी रैवै जिकौ जूनी धांसी अर दमा रै मरीजां खातर अक्सीर दवा है।

दूजै दिन 16 मई रा बगत माथै त्यार हुयनै म्हे नोर्थ गोवा टूर खातर लगजरी बस में ड्राइवर रै दूजै पासै दोयवाळी आगली सीटां कब्जै कीवी। होळै-होळै आखी बस सैलानियां सू भरीजगी। बस में गाइड सागै रैवै जिकौ माइक माथै सैलानियां रौ सुआगत करतां जरूरी निर्देश देवै। हरेक जगां खातर बगत री पाबंदी माथै जोर देवतां वौ कैयो, 'जित्तौ बगत आपनै उण ठौड सारू दिरीजै उणमें ई थानै पाछौ बावड़णौ है। अटै गोवा में आम (सार्वजनिक) जगावां माथै

धूम्रपान करणौ, थूकणौ अर पेसाब करण री सख्त मनाही है। इण खातर अेक सौ रिपिया रौ जुरमानौ भरणौ पड़े। लिहाजा इण बाबत सावचेती बरतीजै।’

जियां ई कोई देखणजोग ठौड़ आवती गाइड म्हानै उण बाबत सेंग जाणकारी देवतौ। नोर्थ गोवा रै टूर में म्हे वैगेटोर बीच, अंजुना बीच, कैलनगुटै बीच रै अलावा फोर्ट अेगुअेडा भाळ्यौ। किलै में लाईट हाउस ई है। पुर्तगालियां रै राज रै टैम इण में कैदियां नै राखीजता। वैगेटोर बीच भोत व्हालौ अर चावौ है। अंजुना बीच पथरीलौ है। अठै बारै कानी अेक रेस्तरां में म्हे लंच कर्यौ। कैलनगुटै बीच ‘समुद्री तटां री राणी’ बाजै। गोआ में मांडवी, तीराकोलु साल, चापोश अर तालपोना जैड़ी छोटी-बड़ी नदियां है। अठै री आबादी 12 लाख है। आथणै अरबसागर रौ मदमातौ नीलौ जळ, तौ उत्तर में कोंकण री हरी-भरी पहाड़ियां अर वन है। मांडवी नदी माथै बोट री सैर रौ लुफ्त लियौ जाय सकै। इण खातर अेक टिकट रा डेढ सौ रिपिया लागै। बोट रै डेक माथै कुरसियां लाग्योड़ी हुवै। आगै स्टेज माथै ऑरकेस्ट्रा अर लारै पाड़ै बार अर रेस्टोरेंट। रेस्तरां रै डागळै ई कुरसियां लाग्योड़ी हुवै। बोट सैलानियां सू काठौ भरीज जावै। ऑरकेस्ट्रा माथै धुनां बाजती रैवै। धुनां माथै तीन गोवा रा फोक डांस (लोकनृत्य) अर अेक पुर्तगाली नाच हुवै। बिचाळै सैलानियां मांय सू जोड़ा, जवान, छोरा-छोरियां अर टाबरां नै ई नाच वास्तै नूतै। लोग नाच-कूदनै खुद आणंद-मौज लेवता दूजां रौ मनोरंजन ई करै। बोट नदी में चक्कर लगावती रैवै। ओ प्रोग्राम लगैटगै घंटे भर ताई चालै।

कैमरो सागै हौ, आखी जातरा में सेंग ठौड़, जगां-जगां यादगार सारू म्हे मोकळी फोटवां खींची। म्हे हरेक जात्रा में कैमरो सागै राखां जिणसू यादगार पलां नै संजोया जाय सकै।

आगलै रोज 17 मई 08 नै साऊथ गोवा रौ टूर हौ। साऊथ गोवा में म्हे उण ठौड़ गया जठै अट्टारवीं सदी रै गोवा रै गांव री पुनर्रचना कियोड़ी है। इणमें प्रवेस खातर डेढ सौ रिपिया अेक जणै रौ टिकट लागै। इणमें गोवा री गोल्डन सभ्यता री पारंपारिक धरोहर संजोयोड़ी है। इणरा दोय हिस्सा है, आर्ट गैलरी सारू पचास रिपिया अर पुरखा रै मिनी गोवा खातर सौ रिपिया। पण टिकट अेकै भेळ्य लेवणा हुवै। जूनै बगत रै गोवा में औ दरसायौ गयौ है कै क्णिण भांत मिनख कुदरत सागै रैवतौ। पुर्तगाली जर्मीदारां रौ रैहन-सैहन, खान-पान रा तौर-तरीका, वारी जर्मीदारी रा कामकाज, न्याय व्यवस्था आद रै सागै अठै रै मूल वासिंदा रै कारोबार, हाट-बजार, काम-धंधा अर जीवण रा मूंडै बोलता चितराम, मूरत्यां अर दरसावां रै माध्यम सू उकेरीज्या है। पुर्तगालियां रौ राष्ट्रीय प्रतीक मुरगौ हुवण सू आं इमारतां माथै मुरगौ थापित कियोड़ौ। दरूजै बारै कुंडी है, कुंडी नै जोर सू बजायनै आवणवाळै गृहस्वामी नै आपरै आवण री खबर देवतौ। घर रौ सेवक छोटी ताखीनुमा बारी नै जिणमें ताड़ियां लाग्योड़ी, खोलनै आवणवाळै नै भाळ्यां पछै गृहस्वामी नै समचार देवतौ। आं भवनां में जूनी अेंटीक जिंसा जिकी वीं काल में बरतीजती, संजोयनै राख्योड़ी है। आं में रोसणी खातर लैंप, पाणी तातौ करण रा ठांव, बडी देग, छाजला, चक्की, हवा करण सारू हाथ रा पंखा, पलंग, बिस्तर, पैरण ओढण रा गाभा आद सै चीज-बस्त सामल है। इणमें पुर्तगाली जर्मीदारां री लुगायां रौ न्हावणघर है

जिणमें न्हावण रौ टब आद, ड्रेसिंग टेबल, घर री तहाड़त, टाबर रौ पालणौ.... रसोई जिणमें रसोई रौ सामान, डाइनिंग हॉल में डाइनिंग टेबल.... सुवण रौ कमरौ, कचैरी, तिजोरी आद सँग है। अँ इमारतां अेक तरै रा म्युजियम है। वठै अेक इचरजवाळी बात आ बताइजी कै अठै उण बगत रा चोर चोरी-छिप्यां नीं आवता। वै खबर देयनै आवता। घर रौ धणी कीं चीज-बस्त, गैणां-गांठा अर रिपिया-पईसा चोरां खातर घर रै अहातै में दरूजै बारै अेक ठौड़ मेल देवतौ। पछै घर रौ आडौ जड़ दियौ जावतौ। चोर माल लेयनै जावता परा। पण अगरजै वै संतुष्ट नीं हुवता तौ किणी ई रास्तै घर में दाखिल हुय जावता। इण मौकै घर रौ मालिक अर दूजा सदस्य मकान री छत माथै जायनै मोरचौ बांध लेवता। मकानां नै ठंडा राखण बेई लकड़ी री दोहरी छत बणती। घर में बड़तां ई छत मांय गन री नाळ खातर बणयोड़ा मोखा सूं चोरां माथै फायरिंग हुवती। आं म्युजियमां मांय टिकट देखनै बाड़ीजै। बारै चौकीदार तैनात है। हरेक बस रै ग्रुप सागै वठै री न्यारी-न्यारी महिला गाइड अंग्रेजी अथवा हिंदी मांय, जिण भासा री ग्रुप मंजूरी देवै उणमें सँग विवरण देवती अठै रा सै कमरा अर ठौड़ दिखावै। बिल्डिंग रै बारलै पाड़ै अहातै में मोकळी जर्मी है। इणमें अठै रा मूल वासिंदा रै जीवण-वैवार रा न्यारा-न्यारा दरसाव बणियोड़ा। लुहार, मोची, हाट-बजार, उधार अर लगान वसूलतौ जर्मीदार रौ कारिंदौ आद। काजू सूं काजू फेनी बणावण री प्रक्रिया। जर्मीदार री सवारी पालकी उठायं दोय आगै अर दोय लारै चालता कहार जिसा अनेकूं जीवंत दरसाव अठै परतख देखण नै मिळै। अँ दरसाव उण कालखंड नै ओळ्ळावै। मांय शहद, अचार-मुरब्बा अर कीं दूजी छोटी-मोटी चीज-बस्त कुदरती जड़ी-बूट्या आद री दुकानां ई लाग्योड़ी। अठै अेक कमरै में अेक बडौ जूतौ (बिग फुट) है। कैवत है कै अठै अेक महात्मा आयौ। वौ अठै तप कर्यौ। लोगां री सेवा करी। वारै दुख-दरद रौ भागी बणियौ। वारै संताप नै हरण रा कारज किया। इण संत री अठै अेक कहाणी है। औ फुट-प्रिंट उण महात्मा रौ है। बताईजै कै आपरौ जीवणौ हाथ इण फुट-प्रिंट माथै राखनै साचै मन सूं जे कोई मुराद मांगै तौ अवस पूरी हुवै। लोग अगरबत्तियां चास र ई लगावै। अगरबत्ती बेचणियां अठै ऊभा रैवै। इण फुट-प्रिंट रै लांबे सै 'क कमरियै सूं निकळनै आगै अेक लकड़ी रौ बांध अर पुळ-सो 'क बणियोड़ौ। अठै केई भांत रा पुसप, भांत-भांतीला फळां रा अर दूजा पेड़-पौधा अर पंछीड़ा रा माळ ई है। आछौ-भलौ बगीचौ लाग्योड़ी है। पाइप अर फव्वारा सूं सिंचाई हुवै।

अठै सूं व्हीर हुयनै म्हँ शांता दुर्गा मिंदर रा दरसण कर्या। औ शांति री देवी रौ मिंदर है। मिंदर भोत विसाल परिसर में अर शानदार बणियोड़ौ है। इणरै पछै मंगैसी मिंदर में भगवान शिव अर भगवान मंगैस रा दरसण कर्या। कैवीजै कै औ मिंदर लता मंगेशकर रै कुटुंब रौ बणायोड़ौ है अर अठै लता रा पिताश्री दीनानाथ मंगेशकर भजन गाया करता हा। मिंदर भोत भव्य अर देखणजोग है। मिंदर मांय पगोथिया चढनै जावणौ पड़ै। आखै मारग में ठेट मिंदर ताई प्रसाद, खाणै-पीवण रै सामान अर भांत-भांत री दूजी दुकानां ई लाग्योड़ी है। फळ-फ्रूट वाळा ई मारग में मोकळ्ळा बैठ्या रैवै।

वठै सू धकै जूनै गोवा स्रैर मांय जिणनै पूरब रौ रोम कैवीजै, 16वीं सदी रौ संत फ्रांसिस जेवीयर चर्च देख्यौ। औ चर्च भोत विसाल, भव्य अर अपणै में अनूठौ-अजूबौ है। लांबै-चवडै परिसर में घड़ियोड़ा पत्थर सू बणियोडै इण चर्च मांय प्रभु ईशू री सोनै री मूरत्यां है। डावी कान्नी संत जेवीयर रै सरीर री ममी बणायोड़ी अेक ताबूत मांय महफूज राख्योड़ी है। इणरै सांम्ही ई अेक और विसाल अर भव्य चर्च है। आ ठौड़ अर इण रा मोवणा दरसाव देखतां ई बणै अर जीव सोरौ हुवै। इण चर्च नै वर्ल्ड मैन्युमेंट रौ दरजौ मिळ्योडै है, आ घणी गरब री बात है।

इणरै पछै म्हे गोवा री राजधानी पंजिम यानी पणजी गया। मडगांव अर वास्कोडिगामा में रेल-मार्ग है पण पणजी में नीं है।

गोवा टूर मांय म्हे मीरामार अर कोलवा बीच गया। मीरामार सू 17वीं सदी रै अेगोडा फोर्ट री झांकी अर सागै ई समंदर रै आरपार हुवती लाईट हाउस री बीम यानी शहतीर नै ई जोय सकौ। औ अरब सागर री कंवळी रेती रौ सागर-तट है। कोलवा बीच गोवा रौ गरब है।

गोवा भारत रौ सुरंगौ नै निराळ्यौ टूरिस्ट प्लेस है। अठै हरेक मौसम में देसी-विदेसी सैलानियां री रेलमपेल लाग्योड़ी रैवै। गोवा नै टूरिस्टां रौ सुरग कैवीजै। नवंबर सू जनवरी माह में अै ज्यास्ती आवै। वां दिनां होटलां में जगै नीं मिलै। यूं ई अठै होटल मूंधा है। मई रै महीनै में ई मौसम अठै इतौ गरम नीं हौ। तावडै अवस आकरौ रैवै। समुद्री-तटां माथै उमस ई हुवै। पण बैवती मदमाती हवा री वजै सू छ्यायां में घणी गरमी मैसूस नीं हुवै। सिंझ्या पछै होळै-होळै मौसम टंडौ हुय जावै। सागर-तटां माथै मेळा-मगरिया रा सा 'क दरसाव रैवै। सिंझ्या पड्यां रौनक बेसी देखण में आवै। समुद्री तटां माथै दुकानां मोकळी। खावण-पीवण अर दूजौ सै तरै रौ सामान अठै मिळै। माळा-मिणिया, सीपियां, घोंघा आद रौ सामान, गोवियन हेट्स, नारेळ रौ पाणी, जूस अर चाय-काँफी आद री दुकानां ई लाग्योड़ी। बीच माथै मोटा-मोटा गेस रा गुब्बारा ई उडाइजै, जिका सू अेक या दोय जणा आभै मांय उडै। इण सारू शुल्क देवणौ हुवैला।

गोवा में होटल व्यवसाय मोकळ्यौ है। जमीं भोत उपजाऊ। थोड़ी जमीं हुवै तौ ई गुजारौ मजै में हुवै। अठै काजू निपजै। बजार में छिलकैवाळा काजू रा भाव दोय सौ साठ रिपिया प्रति कि.ग्रा. अर बिना छिलकै वाळै रा तीन सौ साठ रिपिया हा जदकै जोधपुर में पांच सौ सू ऊपर रा भाव है। काजू री गुणवत्ता ई बेसी अर साइज ई मोटौ हुवै। अठै लुगायां बजार में काजू रा ओडा लेयनै ई बैठै। अै गिणती रै हिसाब सू देवै, क्वालिटी सारू कठैई पचास रिपिया रा सौ तौ कठैई सित्तर रा सौ। पण अै काजू घटिया किस्म रा हुवै। दुकानां सू पैकबंद काजू मोलावणा ई सावळ रैवै। गोवा में आम री केई अेक्सपोर्ट क्वालिटी हुवै, पण मूंधा घणा।

गोवा में महाराष्ट्र, कर्नाटक, तमिलनाडु अर केरल री तुलना में भारत रै आथूणै घाट रा स्थल भोत कमती है पण औ हिस्सौ उत्तरादे अर दिखणादे हिस्सा नै मिलावण रौ महताऊ कारज करै। गोवा अंचल में पडण वाळै आथूणै घाट नै यूनेस्को री विस्व धरोहर स्थल सूची में

सामल करण बेई गोवा सरकार रै प्रस्ताव मुजब चमगादड़ री दुरलभतम प्रजाति 'द जाइंट इंडियन मास्टिफ' री अठै मौजूदगी इणरौ मुख्य आधार है। मधेई वन्यजीव अभयारण्य रै दायरै वाळौ औ छेत्र इण प्रजाति री, जिणनै ब्राउगटेंस फ्री टेल्ड बेट रै नांव सू ई ओळखीजै, विस्व में अकूकौ आश्रय स्थल जिको है।

विदेसी सैलानी बीच माथला होटलां अर अठै तंबू आद में रैवणौ पसंद करै। बीच माथै विदेसी जनानियां बिकनी में पड़ी रैवै। बाघा बीच जिकौ च्यारू कांनी सू पहाड़ियां सू घिरचोड़ौ है, वठै अ नजारा बेसी देखण में आवै। दिन रा अ मांय रैवै अर सिंझ्या पड़्यां बारै निकळर समुद्र रै किनारै आराम-कुरसियां में पड़ी रैवै। सत्तर रै दशक में गोवा हिप्पियां रौ ठिकाणौ हुया करतौ। आज देसी-विदेसी सैलानी अठै छुट्टियां मनावण आवै। गोवा रा मुख सहरै है पणजी, वास्कोडिगामा अर मडगांव। गोवा साइट-सिईग रौ पैकेज भलाई कठै सू ई लेवौ, वै ई सागी ठौड़ दिखावै। पणजी राजधानी हुवण सू ज्यास्ती मूंधौ है। इण सू वास्को या पछै मडगांव में होटल लेवणौ ठीक रैवै।

गोवा री दुकानां अर शो-रूमस में मॉर्डन लड़कियां आधुनिक पैरवास में काम करै। गोवा में हरियाळी सागै साफ-सफाई ई मोकळी है। गोवा किंग फिशर अर मैकडोवेल्स रा मालिक विजय माल्या रौ आवास स्थल है।

आथण रा दिन बिसिज्यां ताई म्हे म्हारै ठायै बावड़ग्या। आगलै रोज 18 मई नै म्हानै गोवा एक्सप्रेस सू पुणै निकळणौ हौ। कमरै पूगनै म्हे पैलां चाय पीवी। टी.वी. रा प्रोग्राम देख्या। पछै जीम-जूठनै सूयग्या।



पुष्पांजलि भवन, जूनै डाकखानै रै लारै,
लक्ष्मीनगर, जोधपुर 342010 (राजस्थान)

बधाई

- राजस्थानी सिरजणा रा थम्ब पद्मश्री चन्द्रप्रकाश देवल नै इण बरस रौ बिड़ला फाउंडेशन रौ प्रतिष्ठित बिहारी सम्मान दिरीज्यौ है, आप औ सम्मान पावणिया राजस्थानी रा दूसरा लेखक है, इण सू पैली डॉ. अर्जुनदेव चारण नै भी औ सम्मान दियौ जा चुक्यौ है, बधाई।
- श्री बी. एल. माली 'अशान्त' (जयपुर) नै मातुश्री कमला गोइन्का राजस्थानी साहित्य पुरस्कार, डॉ. मनोहरलाल गोयल (जमशेदपुर) नै रावत सारस्वत पत्रकारिता सम्मान अर युवा लेखिका सुश्री रीना मेनारिया (उदयपुर) नै किशोर कल्पनाकांत युवा साहित्यकार पुरस्कार दिरीज्यौ, मोकळी बधाई।
- बीकानेर री ऊरमावान महिला लेखिका श्रीमती मोनिका गौड़ नै वारी पोथी 'हथेळी में चांद' सारू गौरीशंकर कमलेश पुरस्कार दिरीज्यौ, हार्दिक बधाई।

● लघुकथा

उर्मिला माणक गौड़

जीवण साथी

मिसेज वरमा री उमर आई कोई सित्तर बरसां रे अेड़ै-गेड़ै है। वा बिना चूक्यां दिनूगै बगीचा में घूमण नै जावती ही। उठै दूजा ई केई लोग आवता हा। अेक दिन उणनै अचाणचक भुंवाळी आई अर आंख्यां आडी रात आयगी ही। उण पछै तौ उणनै कीं ठा इज कोनी 'क काई हुयौ।

होस आयौ तौ वा सफाखाना में ही। हुयौ यूं कै उणनै पड़ती देख 'र कविराजजी झट झाल ली। थोड़ी देर बगीचै री बेंच माथै सुवाण 'र उणरै बायरौ घालियौ अर पाणी रा छांटा दिया, पण कीं ई असर नीं हुयां वै उणनै सफाखानै लेय 'र आया।

डागदर सगळी तपास करनै बतायौ कै इणनै किणी बात रौ गम है जिकौ मांय रौ मांय खायां जाय रैयौ है। इणी कारण सूं इणरी आ हालत है। अबै इणनै अेकली मत छोडजौ!

कविराज जी पूछियौ, 'आप कठै रैवौ हौ ? चालौ म्हैं थानै घर ताई पुगाय देवूं। डागदर कैयौ है कै अबै इणां नै अेकली मत छोडजौ।'

तद वा कैयौ, 'म्हैं जावूंला परी। अबार पुगाय देवौला तौ काई होसी, रैवणौ तौ अेकली नै इज पड़सी।'

कविराज जी उणसूं बातां करी तद ठा पड़ी कै उणरै आगै-लारै कोई कोनी। तद कविराजजी कैयो, 'थारै तौ कोई है कोनी अर म्हारै होवतां थकां ई नीं रै बरोबर है। म्हैं अेकलौ इज रैवूं हूं अर काची-पाकी रोटी हाथां बणाय 'र खावूं।' पछै कविराजजी कैयौ कै क्यूं नीं आपां दोनूं साथै-साथै रैवां ?

'दुनिया काई कैवैली ?'

'दुनिया नै मारौ गोळी। आपां दुख पाय रैया हां, जद तौ अै कोई कीं नीं कैवै। दुनियां री सोचांला तौ आखी उमर यूं इज पड़िया-पड़िया सडता रैवांला अर मांय रा मांय घुटता रैवांला। पछै आपां कोई यूं इज नीं रैवांला। कोरट में जाय 'र ब्याव कर लेस्यां।'


'इण उमर में ब्याव ?'

‘हां इण उमर मांय। यूँ तौ आपां अेक-दूजै रौ दुख-दरद बांट नीं सकां। ब्याव रौ ठप्पौ लागियां पछै आराम सूँ रैस्यां। आपां दोन्यां रौ ई इकलापौ मिट जासी। जवानी रा दिन तौ मिनख कीकर ई काढ लेवै, पण जीवण-साथी री असली जरूत तौ बुढापै रै मांय इज पडै। और कीं नीं तौ कम सूँ कम अेक-दूजै रै सुख-दुख में आडा आस्यां अर बोलतां-बतळावतां बगत कीं सोरौ कटसी। आपां रिळ-मिळ काम करस्यां अर म्हनै ई रोटी सोरी हाथ आसी। म्हें रोज नवी-नवी कहाणियां, गीत, कविता लिख 'र थानै सुणावतौ रैवूला। आ बचियोड़ी जिंदगी तौ सोरी निकळसी।’

अर वा हामळ भर ली।



द्वारा माणक तुलसीराम गौड़,
मुख्य प्रबंधक, बैंक ऑफ महाराष्ट्र
बालाजी भवन, सब्जी मार्केट, पनवेल (नवी मुंबई) 410206



राजस्थानी भासा रै नवांतर साहित्य
री अनूठी छमाही पत्रिका
मरुधारा

संपादक : पं. मधुकर गौड़

प्रकासक

मरुधारा

ए-302, ब्ल्यू ओशन-1, महावीर नगर,
कांदीवली (प.), मुंबई 400067

उल्थै रौ राजस्थानी तिमाही छापौ
अनुसिरजण

संपादक : दुलाराम साहरण

सह संपादक :

उम्मेद गोठवाल, कुमार अजय

मोल : 25 रिपिया

प्रकासक

प्रयास संस्थान

प्रयास भवन, ताजूशाह तकियै रै सांम्ही,
धर्मस्तूप, चूरू 331001

● कहाणी

मदन गोपाल लढा

उदासी रौ कोई रंग कोनी हुवै

मोबाइल सूं बात करने म्हाँरे अंतस में कीं सौरप बापरी ।

ओळूं रै आंगणै केई लीक-लकोळिया दीसण लागग्या अर छिणेक में बगत रौ सुइयो सात बरस लारै जाय पूग्यौ ।

सात बरस पैलां जद म्हें भूमि नै लेय 'र जैसलमेर गयौ । ब्याह पछै हनीमून खातर कठैई नीं जा सक्यौ पण केन्द्रीय विद्यालय संगठन कला शिक्षकां रै इंडक्शन कोर्स रै ओळवै म्हनै अर भूमि नै हनीमून रौ मौकौ दे दियौ । राजस्थान री सोनल रेत रौ समदर सदीव सूं म्हनै आप कांनी खींचतौ रैयौ है । बियां म्हाँरा पुरखा ई राजस्थान सूं उठ्योड़ा है । लगैटगै सौ बरसां पैलां म्हाँरा दादोजी रुजगार सारू कानपुर गया अर बठैई बसग्या । पापा रौ जलम यूपी रौ है पण म्हाँरौ परिवार अजै ई राजस्थानी सीर-संस्कार कोनी बिसर्या । म्हाँरै बडेरं रौ गांव झुंझुनूं जिलै में है पण कॉलानी रा लोग म्हंनै मारवाड़ी रै रूप में ई जाणै । इण भांत मरुभोम री जातरा रै मिस म्हनै आपरी जडां सूं जुड़णै रौ मौकौ मिल्यौ तौ भूमि नै रेत रा डूंगर अर गढ देखण रौ चाव हौ । म्हाँरै चित्रकार सारू ई जैसलमेर रौ उमाव कमती कोनी हौ । उण ठौड़ तौ हवा ई रेत री चादर माथै भांत-भंतीला चितराम कोरबौ करै । जैसलमेर रै जगचावै जैन मिंदरां, हवेलियां अर किलै री भींता माथै मंड्योड़ा चितराम देख्यां जीव सोरौ हुय जावै ।

ओळूं रै केनवास माथै अेक उणियारौ

मरुभोम जुगां सूं कला री दीठ सूं घणी उपजाऊ रैयी है । चांदणी रात में लोक-संगीत री मैफिल सूं म्हाँरी आ धारणा औरू पुखता हुयगी । पीढियां सूं संगीत-साधना करण वाळी लंगा-मांगणियार जातियां रा कलाकार आपरै सखरै हुनर सूं रंग जमाय दियौ । ठंडी रात में वारौ सध्योड़ौ सुर रावणहत्थै सागै रळ'र इमरत बरसावै हौ, जिणनै सुण'र देसी पर्यटक तौ सुध-बुध बिसरणा ई हा, परदेसी ई चितबगना हुयग्या । म्हें तौ अेक-दो बार पैलां ई अैड़ी संगत रौ आणंद ले चुक्यौ पण भूमि सारू औ साव नुंवौ अनुभव हौ । उणरौ उणियारौ इण बात री साख भरै हौ । ढळती रात में 'काळ्यौ कूद पड़्यौ मेळे में.....' रै उतावळै सुर माथै पेट्टी, ढोलक अर झींझा जैडै वाद्यां सागै लोकनिरत री धमाकेदार प्रस्तुति हुई तौ परंपरागत पैरावै में तीन बिणजारी

बालावां आपरी कला सू जाणै बगत नै थाम दियौ। भूमि बांरै निरत नै आपरै मोबाइल में रिकार्ड करण सारू ऊभी हुयगी। चाणचकै म्हनै लाग्यौ कै जीवणै पासै नाचणवाळी छोरी, जिणरौ नाक-नक्स इत्तौ सांचै ढळ्योड़ौ हौ कै फुठरापै में बा तीनां में सिरै ही, फगत नाचै ही। उणरै उणियारै माथै गीत मुजब कोई भाव कोनी निगै आया। म्हारौ कलाकार जाग्यौ अर म्हें उण छोरी माथै निजरां टिकाय दी। सांचाणी बा छोरी फगत सुर-ताल मुजब हाथ-पग हिलावै ही, पण उणरौ उणियारौ साव सपाट हौ- भावबायरौ। म्हें उणनै इकलंग तकावै हौ। अक-दो बार उणसूं निजरां ई मिली तद म्हनै लाग्यौ कै उणरी आंख्यां में अक भांत री सून्याड़ पसस्योड़ी है। गीत पूरौ हुयां चौगड़दै ताळियां री गड़गड़ट गूंजी तौ म्हारौ ध्यान तूट्यौ। लोगां ऊभा हुय'र कलाकारां नै बधाई दीवी तौ ई उणरै उणियारै मुळक तकात को दीसी नीं।

जळसै रै समापन पछै म्हें अर भूमि होटल बावड़्या तौ ई म्हारौ मन उण अणजाण छोरी री उदासी री फिकर में घुळै हौ। सूवणै सू पैलां म्हें आ बात भूमि नै बताई तौ वा जोर सू हांसी, 'अ आर्टिस्ट अड़ा ई हुवै काई? अक चैरौ देख्यौ अर उणमें रमग्या।'

'थूं ध्यान राखजै। कदी कोई फूठरौ उणियारौ म्हनै सागै ई ले जा सकै।' म्हें उणनै छेड़ण सारू कैयौ।

'म्हनै पतियारौ है खुद माथै अर उणसूं बेसी ई थारै माथै।' वा छिड़णै री ठौड़ गंभीर हुयगी अर म्हारै नजीक आयगी।

आगलै दिन भखावटै म्हां किलौ देखण नै गया। किलै रा भाखर आपरै सखरै सिल्प रा बिड़द बखाणै हा। औ भव्य दरसाव म्हारै चित्त चढग्यौ तौ म्हें किलै रै अैन साम्हीं ड्राइंग स्टैंड लगाय'र कूची-कलम काढ लीवी। म्हें किलै रौ स्केच ई मांड्यौ हौ कै वा छोरी दीसगी। उणरै सागै अक बडेरौ मिनख हौ, जकौ थम-थम'र रावणहत्थै सू सुर काढै हौ। म्हें भळै उणरै उणियारै कानी जोयौ- सांवळौ रंग, काजळ काढ्योड़ी मोटी आंख्यां, काळा बाळ अर गोळ चैरौ। म्हें चित्रकारी छोड'र बड्डे सू कां सुणावण री अरज करी। उण सुर-ताळ रै सागै अक लोकभजन सुणायौ तौ म्हें सौ रौ नोट झिलाय उणरी कला रौ मान कर्यौ। चाणचकै म्हारी मगजी में अक आइडियौ आयौ अर म्हें बड्डे सू उण छोरी रौ चित्र बणाणै री इजाजत मांगी। वौ अेकर तौ आगै-लारै हुयौ पण पछै मैनताणै पेटै सौ रिपिया आगूंच दियां राजी हुय्यौ। म्हें उण छोरी नै साम्हीं चौकी माथै बैठाय दी अर कलम सांभ लीवी। कांई ठा क्यूं म्हें म्हारौ मत्तौ फोर लियौ अर स्केच री ठौड़ अक कार्टून कोर दियौ जिणमें उण छोरी री दोनूं चोटियां ऊंची ऊभी दीसै ही। इण कार्टून नै देख'र वा ई हांस पड़ी। उणरै उदास उणियारै माथै म्हें पैली बार मुळक देखी।

'कांई नांव है थारौ? थारौ नाच घणौ फूठरौ है।' म्हें कैयौ।

'घर रौ नांव इमरती है पण लोग मुस्कान रै नांव सू ओळखै।' वा बोली।

'म्हें थारौ उणियारौ जोय लियौ है। आगलै साल आसूं तद थारौ फोटू बणाय'र लाय सू।' म्हें उणनै जोवतां कैयौ।

'आगलै बरस तौ म्हें अठै कोनी मिलूं। म्हनै मुंबई जावणौ है- सिनिमा में। अठै नाच'र तौ पेट कियां भरीजै पण उठै रिपियां रा बा'ळा बगै।' उणरै बोल में सपनां सळसळवै हा।

इणरै पछै अेक महीनै में दसूं बार उणसूं मिलणौ हुयौ। भूमि री तौ वा भायली ई बणगी। हरेक मुलाकात में म्हें उणरी उदासी रा रंग ओळखतौ रैयौ। औ अकारण कोनी हौ क्युंके 'खुस चीजां' करता म्हने उदास दुनिया बेसी दाय आवै। स्यात इणी 'ज कारण उदास दुनिया री लूंठी चितेरी अमृता शेरगिल म्हने सै सूं ज्यादा चोखी लागै। म्हारै मांय कीं अैडै है के म्हें उदास दीसण वाळी चीजां सूं भच जुड़ जावूं। कॉलेज में भणतां ई म्हें पेंसिल सूं सपाट धूसर जर्मी, कच्चा टापरां अर बोदी झूपड़्यां वाळा गांव अर कांसै जैड़ा रंग वाळा टाबरां रा चितराम कोरबौ करतौ।

बंतळ सूं ठाह पड़्यौ कै वा छोरी आपरी जिनगाणी सूं बेराजी ही। उणरी चावना ही कै किणी मोटे म्हैर में जाय 'र आपरी निरत-कला सूं खूब धन कमावै।

'आ मुंबई जाय 'र काई करसी ?' अेक सिंझ्या भूमि म्हने पूछ्यौ।

'बार में नाचसी।' म्हें कैयौ।

म्हारै आभै रौ है औ चांद

इमरती तौ मुंबई पूगी का नीं पण चार बरस पछै म्हें अवस मुंबई आयग्यौ। देस रै नामी 'राज स्टूडियो' में आर्टिस्ट रै रूप में काम रौ मौकौ मिल्यौ तौ म्हें भूमि रै नीं चावता थकां ई केन्द्रीय विद्यालय में आर्ट टीचर री नौकरी छोड़ 'र मायानगरी आ पूग्यौ। म्हारै मोकळै दबाव रै बावजूद भूमि बैंक में क्लर्की कोनी छोडी अर आपरै पापा कनै लखनऊ रैवण लागगी।

मायानगरी री माया तौ निराळी ई है। सिनेमा, संगीत अर कला री दुनिया रौ तौ औ तीरथ ई है। मुंबई आवणौ म्हारै सारू अेक सपनै रौ साच में बदळणौ हौ। राज स्टूडियो में काम करतां छठे महीनै म्हारै चितरामां री अेकल प्रदर्शनी लागी तौ कला री दुनिया में म्हारी हाजरी मंडी। इण प्रदर्शनी में 'रेत राग' नांव सूं म्हारी अेक पेंटिंग खासी चरचा में रैयी जिकी म्हें मुंबई सूं बावड़ 'र बणाई ही। इण पेंटिंग में रेत रै अथाग समदर बिचाळै अेक लूटै गढ री पृष्ठभूमि में आभै में चांद-सितारां कांनी ताकती छोरी री तस्वीर ही। म्हें चेतै कर्यौ इण छोरी रौ चितराम बणावतां थकां म्हारै मन में कटैई वा बिणजारण अवस ही- वो ई नाक-नक्स, सांवळी रंग अर लांबा काळा बाळ। सै सूं खास बात उणरै उणियारै बापस्योड़ी उदासी ही, जिकी पेंटिंग में तो परतख दीसै ई ही म्हारै काळजै ई बसगी। कुदरत ई कलाकार नै अैड़ी खामचाई सूपै कै जिका चितराम उणनै दाय आय जावै, वै सदीव सारू उणरै हियै मंड जावै।

आं चितरामां नै म्हारी उम्मेद सूं बेसी सरावणा मिली। अेक चावा समीक्षक तौ 'कलम-कूंची री रेत-राग' सिरैनांव सूं अेक छापै में समीक्षा ई लिखी।

सरावणा किणनै कोनी सुहावै ? कला-जगत में म्हारी खेचळ नै मान मिल्यां म्हें घणौ हरखायमान हुयौ पण म्हारी आंख्यां तौ वां चितरामां री प्रेरणा नै सोधै ही। केई बार चावता थकां ई म्हें भळै जैसलमेर नीं जाय सक्यौ अर नीं मायानगरी में उणसूं भेंट हुयी।

भरोसै रौ नांव है धरती

बगत रै पगोथियां चढतां अेक-दो बरस भळै बीतग्या। स्टूडियो रै काम सूं म्हारौ

भुवनेश्वर जावणौ हुयौ। बटै म्हारा मेजबान हा असेस. सावण कुमार। कुमार भुवनेश्वर रै अेक ओड़िया अखबार में पत्रकारिता करै अर बांरी जोड़ायत प्रीतिधारा जवाहर नवोदय विद्यालय में आर्ट टीचर ही। बरसूं पैलां देहरादून में अेक ट्रेनिंग में प्रीतिधाराजी म्हारै भेळा हा। वारौ टाबर डेड बरस रौ हौ सो मदद सारू कुमार साब ई आगै आया। बटै कुमार साब सूं म्हारौ मिलणौ हुयौ जिकौ बगत परवाण तगड़े बेलीपै में बदळ्यौ। असल में वै ई म्हारै दाई घूंट रा सौकीन हा। लगैटगै अेक पखवाड़ै ताईं म्हां आथण सागै ई बैठता अर मोड़ै ताईं हथाईं घोटता। म्हारै ब्याह में ई धणी-लुगाईं दोनूं पूग्या अर दो दिन रुक्या। वां केई बार म्हनै जोड़ै सूं बुलायौ पण आवणै रौ जोग आज बण्यौ अर वौ ई अेकलौ।

कुमार साब दो दिन पैलां राजस्थान सूं बावड़्या हा। वै अेक ध्यान सिविर में आबू गयोड़ा हा। मुलाकात में सिविर री मोकळी बडाई करै हा।

म्हें दोपारां ताईं काम सलटाय लियौ। म्हारी वापसी री फ्लाइट आगलै दिन आथण री ही सो अबै हथाईं जोगौ हौ। बातां सरू हुयी तौ जूनी ओळूं नै अंवेरतां खासौ बगत निकळ्यौ। प्रीतिधाराजी आपरै बाळपणै री केई नुंवी बातां बताई। आथण सूखी जावतां देख 'र म्हारी आंख्यां उतर्यै सवाल नै बांचतां कुमार साब बतायौ कै आध्यात्मिक संस्थान सूं जुड़्यां पछै वां सौगन ई ले ली। वां दिनूगै म्हनै ई आश्रम में जावणै सारू नूततां कैयौ, 'कम विद मी तुमारो मोर्निंग। रियली बहुत सुकून मिलता है। दीदी का लेक्चर सुनकर सारा टेंशन दूर हो जाता है।'

'अरे मेरे जैसे नास्तिक का वहां क्या काम? फिर टेंशन दूर करने का अपना तरीका दूसरा है, वही पुराने वाला।' म्हें मुळकतां कैयौ अर दिनूगै री मीठी नौद बचावणै सारू वांनै टाळणौ चायौ।

'आई नो वैरी वेल, सालों तक मैंने भी तो वही तरीका अपनाया है। बट नो मोर, अब तो वो क्या बोलते हैं- आत्मा को जगाने की धुन लग गई है। अेनी वे, आप तो आर्टिस्ट हैं। क्या पता कोई अच्छा आइडिया मिल जाए। इसी बहाने से ही सही, मगर चलिएगा जरूर।' वारै इण तरक अर अपणायत साम्हीं म्हें ढीलौ पड़्यौ।

आगलै दिन भोरानभोर म्हें अर कुमार साब आश्रम में पूग्या तौ वटै लांबै-चवड़ै हॉल में सैकडूं लोग मून बैठ्या ध्यान करै हा। बारणौ ढकणै सूं हॉल में अंधारौ हुयग्यौ अर झीणौ बेकग्राउंड म्यूजिक ई गूंजण लागग्यौ। साम्हीं भींत माथै अेक मोटी फोटू टंग्योड़ी ही जिणमें लाल रंग रौ बिंदू पळकै हौ। फोटू रै हेठै अेक पाटै माथै दो लुगायां बैठी ही- धोळी झक्क धोती पैस्यां। बटै बैठतां ई कुमार साब ध्यान में मगन हुयग्या अर म्हें ताका-झाकी में। ध्यान पूरौ हुवतां ई हॉल में उजास पसरग्यौ। कुमार साब होळै-सी बतायौ कै अबै प्रवचन हुवैला। वारै मुजब औ प्रवचन परमात्मा रौ लिख्योड़ै है। इणनै लगोलग सुण्यां आपां खुद री आतमा नै ओळख सकां। आतमा नै ओळख्यां सगळ्या भरम दूर हुय जावै अर परमातमा सूं सीधौ गनौ बण जावै। सज्जै पासै बैठी लुगाईं जद ओड़िया भासा में प्रवचन सरू कर्यौ तौ म्हारै कां पल्लै कोनी पड़्यौ। म्हारौ ध्यान खंबै पासै बैठी लुगाईं कांनी गयौ। सांवळौ रंग, मोटी आंख्यां, सांचं में ढळ्योड़ै नाक नक्स। म्हनै लाग्यौ कै वा लुगाईं कठैई देख्योड़ी है। कठै कानपुर, मुंबई का बीजी किणी ठौड़? चाणककै म्हारै काळजै खड़कौ हुयौ। अरे, आ तौ इमरती है। जैसलमेर में नाचण वाळी बिणजारण, जिण माथै म्हें चितरामां री अेक पूरी सिरीज ई बणाय दी ही। इणरै

पछै काई प्रवचन हुयौ, म्हनै कीं ठाह कोनी पण म्हारौ ध्यान तौ उणरै उणियारै माथै ई थिर हुयग्यौ। म्हनै देख 'र अचंभौ हुयौ कै अजै ई उणरै उणियारै वा सागण उदासी पसस्त्योड़ी ही। पण वा अठै कीकर ? काई औ म्हारौ भरम है ? उणनै तौ जैसलमेर में हुवणौ चाइजै का मुंबई रै बार में। इण दिखणादै राज्य में वा कीकर आय सकै ? फेर वा तौ गाणौ-बजाणौ जाणै। अैड़ा प्रवचन सूं उणनै काई मतलब ? अै आतमा-परमातमा रा राज उण कीकर जाण लिया। सवालां सूं म्हारौ अंतस छुलग्यौ पण म्हें मर्यां ई आ मानण नै त्यार कोनी कै वा इमरती कोनी, कोई दूजी है।

प्रवचन पूरौ हुयां 'ओम' री गूंज सागै सगळ्ळ ऊभा हुयग्या। कुमार साब लोगां सूं मिला-भेटी में बिलमग्या अर म्हें मंच रै नैडै पूगग्यौ। सारै जावतां ई म्हारौ पतियारौ भाखर दाई ठोस हुयग्यौ।

'इमरती! आप इमरती ई हौ नीं ? ओळ्खौ म्हनै ?' म्हारै सवाल सूं अेकर तौ वा चिमकी पण म्हनै देख 'र धीरज धार लियौ।

'हां, इमरती ई हूं। जद आप इत्ता बरसां पछै ई कोनी भूल्या तौ म्हें कीकर कोनी ओळ्खूं। काई आज भळै म्हारी फोटू कोरस्यौ ?' उण पूछ्यौ।

'म्हारौ काम ई चितराम कोरणौ है। पण थूं अर अठै ? अै धोळ्ळ बागा कीकर धार लिया ? थूं तौ मुंबई जाय 'र नांव अर दाम कमावणौ चावती फेर..... ?' म्हारी उंतावळ हरफां में उतरगी।

'भोत लांबी कहाणी है आ। आप तौ फगत इत्तौ ई जाण लेवौ कै कदी तौ दुरभाग मिनख नै फोड़ा घालै, कदी खुद मिनख दुरभाग नै तेडौ देवै। काई कमी ही म्हारै जैसाणै में ! अम्मा-बाबौ, घर अर बगतसर रोटी स्सौ कीं हौ। अेवडियौ हौ तौ काई हुयौ, मोट्यार ई हौ, जिणरै सागै बाळपणै में म्हारौ ब्याव हुयौ। पण म्हें धरती रौ भरोसौ तोड़ दियौ तौ भटकणौ लाजमी हौ।' वा बोलती-बोलती थमगी अर छत कानी देखण लागी।

'पण कीकर ?' म्हें सवाल कर्यौ।

'मुकलावै री रात म्हें घर सूं भाज 'र मुंबई पूगगी। भाज्यां पछै ठाह पड़्यौ कै आ दुनिया किती छळगारी है। फेर पूना, नागपुर, औरंगाबाद कठै-कठै कोनी भटकी। आर्केस्ट्रा में गायौ, होटलां में नाची। काई-काई कोनी देख्यौ-कर्यौ। म्हारै धोरां में गरीबी तौ है पण अैड़ी भूख....।'

'तौ पछी क्यूं कोनी गई ?' म्हें बिचाळै ई पूछ्यौ।

'पाछौ जावणौ म्हारै मंजूर कोनी हौ, क्यूंके घरवाळां नै तौ आगै ई घणा फोड़ा घाल दिया, अबै फेर बांरै घावां सूं खरूंट उतारणै में काई सार है। कूवौ-खाड करणै री त्यारी में ही कै करुणा दीदी मिलग्या। वां धोळ्ळ गाभा ई नीं दिया, नुंवौ जीवण दे दियौ। अबै मुगती री साधना ई जीवण रौ मकसद है।' कैय 'र वा चुप हुयगी।

'पण कैड़ी मुगती ? अै तौ सै.....।' म्हारी बात पूरी हुयां सूं पैली ई वा बिचाळै बोल पड़ी।

‘म्हें मानूं आपरी बात। मुगती री ठाह नीं, पण आ जूण तौ सोरी कट जासी। खैर जावण दौ आं बातां नै, आज थे अेकला कियां? मैडमजी सागै कोनी आया काई? कदैई वानै ई ल्यावौ प्रवचन में।’ उण कैयौ अर किणी रौ हेलौ सुण र मांयनै गई परी।

उणरै गयां पछै ई म्हें सागण ठौड़ कोनी हौ। उण रा बोल घिर-घिर म्हारै मांयनै गूजै हा, ‘म्हें धरती रौ भरोसौ तोड़्यौ तौ पछै भटकणौ तौ लाजमी हौ।’ काई आ बात म्हारै माथै ई लागू कोनी हुवै? भूमि सागै आयोडै आंतरे, अणबोलै अर म्हारै कांनी सूं तलाक री कार्रवाई रा सगळा चितराम आंख्यां साम्हिं खिंचग्या। औ दुरभाग नै साम्हिं पगां नूंतौ नीं तौ पछै काई है? इमरती दाई म्हें ई तौ भटकै हौ ठौड़-ठौड़। क्यांरी तिरस ही आ- नांव का धन री? नीं म्हें धोळा नीं धार सकूं। म्हें अेक कलाकार हूं अर कलाकार तौ जीवण नै भोत प्यार करै। म्हनै पाछौ जावणौ है। मन में औ भाव जलम्यौ तौ आंगळ्यां मतै ई मोबाइल में भूमि रौ नंबर सोधण लागगी।



144, लढा निवास, महाजन, बीकानेर (राजस्थान)



राजस्थानी री तिमाही कथा पत्रिका

कथेसर

संपादक

रामस्वरूप किसान, सत्यनारायण सोनी

सुल्क : सालीणौ 100 रिपया, पांच बरसां रौ : 400 रिपिया

प्रकासक

कथेसर प्रकासण

परलीका, वाया गोगामेड़ी

जिला : हनुमानगढ़ (राज.)

राजस्थानी री तिमाही पत्रिका

राजस्थली

संपादक

श्याम महर्षि

सुल्क : पांच साल रौ 400 रिपिया, आजीवण : 1000 रिपिया

प्रकासक

राष्ट्रभाषा हिंदी प्रचार समिति

श्रीडूंगरगढ़, जिला-बीकानेर

राजस्थान

● कवितावां

कुमार अजय

कुंराणा सुपना

मती सोच हेटै जांवतै पांणी रै नाप पेटै
थारी सोच होयगी बोदी
इण माणस-मारणै बगत मांय
बुझै हाल तिरस मिनखां रै लोही सूं ।

मती सोच छीजतै डूंगरां पेटै
है इण बगत मांय अणभांतीला दुखां रा डूंगर
जिणां रै दूजै पसवाडै
ऊगै हरमेस सुखी जूण रौ
रातौ सूरज ।

रूखां री गिणत माथै मती कर चितार
नीं सोच छिया तावडै
इण माडै बगत मांय
कठै बिसाई लेवण सारू
दो छिण ।

मती चेतै कर सूखती नदियां नै
अर भूल उणरै आलै कांठै नै
क्यूकै
बसै रोजीना अक नुंवी नदी
आपणै नैणां
अर
आंसुवां रै ओळ्ळवै
करै आपणी आली पडळ ।

पून भलाई नीं चालै
क्यूँकै वा चालै जदै
आवै उणरै साथै
कुंराणा सुपना ।



सहायक जनसंपर्क अधिकारी
जिला सूचना एवं जनसंपर्क कार्यालय, चूरू



दुष्यंत जोशी

मिनखपणौ

थूं आपरी गरीबी सारू
मालक नै
ओळमों नीं
लखदाद बोल
स्यात
थारी गरीबी परोटे
थारौ
मिनखपणौ ।



चावना

थूं चावै
थारौ कदी नीं हुवे
निरादर
थूं
खुद बण
खुद रौ कदरदान ।



उप संपादक 'टाबर टोळी'
हाऊसिंग बोर्ड कॉलोनी
हनुमानगढ़ जंक्शन 335512

बोली इमरत, बोली ज्हरै

सींचौ चायै आठूं फैर,
फूलै नहीं पीपळी कैर।

कियां निभै बतावौ आप,
समदर बीच मगर सूं बैर।

बसी कसायां बीच मनाय,
बकरा की मां कद तक खैर।

तारा दीखै माझल रात,
विपदा में धोळा दोफैर।

मौत गादड़ा की जद आय,
भाग्यौ आवै सामौ स्हैर।

बगत पड़्यांज्युं आय न काम,
बां अपणां सूं चोखा गैर।

आवै जावै रीता हाथ,
कुण ल्यावै ले जावै लैर।

यार 'बिहारी' मीठौ बोल,
बोली इमरत, बोली ज्हरै।



61, गोपी गोविन्द, माधव नगर
दुर्गापुरा रेलवे स्टेशन के सामने
जयपुर-18 (राजस्थान)

छा बसंत जावतौ

पल-पल अणमोल-
इण बात नै सगळा जाणै
फेरुई
अणदेखी करता
सड़कां री भीड़ मांय
नित धक्का खावता रैवै
नीं जाणै-
कित्ता जनमां री
तिरसी जिग्यासावां री
तिरस-
बुझावण नै
अर-
धुंधला सुपनां मांय
रंग भरण रै वास्तै ।
पण अँ रंग
बरसाती इंदरधनुस री भांत
दीख र रैग्या ।
अबै पछतावै रै गेलै
पगथळ्यां रै छालां नै पंपोळता
सोच रैया है कै
जे इणरौ
मोल अर तोल जाण जावता
तौ जीवण बगिया मांय
छा बसंत जावतौ
सौरभ रै
सुरीलै सुरां सूं
भूलै-भटकां नै गेलौ
विकास रौ मिळ जावतौ ।

❖❖

पृथ्वीराज रौ थड़ौ, माळियां रौ बास
मेड़ताशहर 341510, जिला-नागौर, राज.

समरगाथा

● हिन्दी री लांबी कविता

राजेश जोशी ❖ उल्थाकार : पारस अरोड़ा

राजेश जोशी रौ जलम 18 जुलाई 1946 नै हुयौ। हिन्दी री सगळी चावी-ठावी पत्रिकावां में आप लगोलग छपता रैया है। मार्क्सवादी विचारधारा सूं जुड़ियोड़ा जोशी री अबार ताई केई पोथ्यां छप चुकी है, जिकां में पांच कविता संग्रै, दो कहाणी संग्रै, तीन नाटक, दो आलोचना री पोथ्यां अर अेक आख्यान- किस्सा कोताह। 'इसलिये' पत्रिका रौ संपादन ई कियौ।

पतौ : 11 निराला नगर, भदभदा रोड, भोपाल (म.प्र.) 642003

अेक

फौलाद उणरै लोही री आवाज सूं झणझणावै
गूजै है पाखाणी पगथळिया
रूखां री नसां झणझणावै
आकास गंगा रै गुंबद सरीसै नीलै कान में गूजै
परबत रै होटां सूं फूटती
नदियां री गतिशील कवितावां।

निरत करै है लैरां
हवावां गावै बली रौ उन्मादी गान।
आभै कानी मूंडौ उंचायां
दिसावां री रणभेरियां बाजै
बाजै है
बाजै है
डगर.....डगर.....डम.....डम.....डम
पिरथी रौ अधगोळ नगाडै ज्यूं बाजै है।

माटी रै आंगणै नौरता मांडै है
आदिवासी तावड़ी।

सात रंगां रा घोडां वाळो रथ दौडावतौ
फैरावतौ आपरी राती धजा
उत्तरायण व्हे रैयो है सूरज ।

निकळगौ है मुगती रौ जोधा
उणरै रगत री आवाज सूं झणझणावै है फौलाद

मां सूं अलग कर
जटै गाडी ही दाई मां उणरी आंवळ
जमीं री सतै नीचै
मीलां ताई धधकै है कोयलौ
माटी री म्यान में उत्तेजित है
अगनी री लपलपावती तलवार
धरती रा गरभ में दिन पूरा कर चुकौ है
अगनी रौ पूत !

ऊंदरां रा वां बिलां कनै
न्हाक्या हा जटै उण आपरा दूध रा दांत
अेक पूरी सेना ऊभी है
अटल इरादां रा सिरस्त्राण अर
साच रौ लोह कवच धार्यां
हथियारबंद जनवाहिनी !

औ सुभ-मौरत है
सुनैरी जुआं रै संहार रौ सुभ मौरत !

मैदानां कानी बधै है जातरू चिड़कलियां
केवड़ा री साखावां री ओट में उदै व्हे है
रोसणी री अेक नुंवी किरण !!
□ □

दो

दिसावां री आस्तीनां में घाल्या
गोडां सूं ई नीचै ताई जावती

आपरी भागसाळी भुजावां
ताण्या जिमनास्टिक री मुद्रा में
अर द्रिद्वता सू उंचायां
आभै सू अडतौ माथौ
अेक भाखर हौ सोना रौ ।

सिरजणा अर प्रकरती रौ पिता हिरण्यगरभ
सोनलिया इतिहास !

विसाल पंख खोल्यां अेक सोनेरी हंस हौ
चांच में मक्की रा दाणां ज्यूं चमचमावता
मोती लियां, लियां मोतियां रौ भंडार
पिरथी री परकमा करतौ
पारदरसी परसेवा री बूदा ऊपर
मोती चढावतौ
चढावतौ धोळा गुलाब
भर देवतौ हरेक देही नै
गंध अर गीत सूं ।

घर आंगणौ अर बरामदौ
गेला गळियां अर सडुकां
सिनानां करती सोनलिया तावड़ी सूं ।

पाकोड़ी फसल जिसी
सरबती गेंवां रा दाणा जिसी
मकिया रा बाळां जिसी
सोनलिया तावड़ी ।
सोनलिया तावड़ी गिन्नियां जिसी
भरीज जावती, खणखणावती ही
आतमा री जेब में !

●●

झूठ ! काई सैं कीं झूठ
बुढ़ी लुगायां री गपोड़ा भरती कहाणियां रौ संसार
अेक सेखचिल्लियाना सपनौ
काई कोरौ अेक सतरंगी गीत

भूलण सारू
कीं पलां ताई आपरौ त्रासद जथारथ ?

नीं-नीं प्रतीकां में बदळतौ, ढळतौ बिम्बां में
पौर-पौर आघौ व्हेतौ, व्हेगौ अणबिस्वासू
काल्पनिकता री हद ताई
वौ आखरौ-आखर साचौ अतीत
अतीत रौ जथारथ ।

चेतना रै साथै-साथै आया जिणरा चितराम
पीढी-दर-पीढी ताई लगौलग चलतौ रैयौ
जिणरौ गीत !

●●

‘रगत सूं ई वत्ती जूनी नदियां’
जिकी देख्यौ पैलौ सूरज
आपरी करोड़ ल्हैर आंख्यां सूं
देख्यौ फूटतौ थकौ पैलौ बीज
देख्यौ अक नुकीलौ भाठौ फेंकता
हिंसक जिनावरां रै खिलाफ
मिनख

जद पैलम-पैल मुगत किया हा
आपरा हाथ !

बरछै सूं कठोर अर बळवान हाथ
जिकां भाठां री आंधी जेळ सूं
मुगत करायनै लाया हा आग
अर पाणी री हथेळी माथै खोली ही
जिका आपरी पैली नाव ।

हाथ
सोध अर ईजाद में लाग्योड़ा
हाथ कीचड़ सूं लप्पालोळ
दलदल नै उलीचता, सुखावता अर पाटता
अकमेक कर माटी नै देता सरूप
बरतण अर मकान रौ !

लकड़ी रा लट्टा नै चीरता आरा
हाथ कुल्हाड़ी जिसा
हाथ कुदाळों जिसा
हाथ बरमां जिसा
उतरता धरती री अजाणी गुफावां मांय
काढनै लावता खनिज तत्त्व
ढाळता नुंवी दुनिया
तांबा पीतळ अर फौलाद री ।

हाथ गोताखोर
उतरता समदर रै गरभ में
लावता मोती तेल अर लूण ।

करड़ी मैणत में लाग्योड़ा, मगन अर धुनी हाथ
हाथ मधुमाख्यां जिसा
हाथ रेसम रा कीड़ां जिसा
हाथ कपास रा फूलां जिसा
हरेक देही सारू
कातता धुनता अर बुणता वसन
अै बुणकर हाथ !

हाथ अनेक आंगळियां वाळा सूरजमुखी जिसा
सूरज रै साथै चालता थका
हरेक आंगळी रै पेरवै माथै लियां आंख
सपना में डूब्योड़ी ।

मिनख रौ सै सूं सुंदर सपनौ
सपनौ स्वस्थ सजी-संवरी दुनिया रौ
सपनौ परी देस री कहाणियां जिसौ
सपनौ हाथी दांत रा रमेकड़ां जिसौ
सपनौ सरल लोक गीतां जिसौ
सपनौ सरोद री संगीत लैरियां जिसौ

सपनौ फूलां री नोंद जिसौ
सपनौ घास मैदान रै हरियळ गीत जिसौ
सपनौ सेव री गोळई रौ, नारंगी आग रौ, प्रेम रौ, लुगाई रौ
सपनौ द्रोब री झीणी लिपि रौ, कीताबां रौ, कसीदां रौ
कलाक्रितियां रौ ।

सपनौ निरत रौ, उमंग रौ, उत्सवां रौ
सपनौ घर रौ, फानूस रौ, चीजां रौ
सपनौ किलकारियां रौ, खिलखिलाहटां रौ, रमेकड़ां रौ
सपनौ डूंगियां रौ, नावां रौ, जहाजां रौ ।

लगातार गंध सूं गमकती दुनिया रौ सपनौ हौ
वां हाथां में ।

संन्यासी चिड़कलियां बांटती ही बीज
धरती री कोख नै
तितलियां पांखां माथै पराग केसर लियां
हरेक पल नुंवा फूलां नै जलम देवती
उडती ही अठी सूं उठी ।
सपनै अर मैणत में डूबा वां दो हाथां बिचाळै
जलम ले रैयी ही नुंवी दुनिया
अेक नुंवी कल्पना, अेक नुंवाँ विचार
लेवता हा आकार..... उठै ।

‘अेक कबूतर री पंख छांव में सूतौ हौ आकास’
जद कदैई टेढी होवती कुदरत री आंख
के अंधारै में कोई बनपसु जागतौ
निकळता लोग गुफावां सूं
सगळा लोग सगळा लोगां सारू ।
वै लोग हा
आभै जिसी आंख्यां अर आरसी जिसी आतमा वाळा लोग
अर सोना रौ अेक भाखर हौ
सोनल हंस
हिरण्यगरभ
जिकौ सगळां रौ हौ.....सगळां सारू हौ ।
□□

तीन

पंजा उलटा हा जादूगरणी रा
अर अेक हाथ री आंगळियां माथै चीतै जिंसा नुकीला नख हा

रात रा काळा जंगळ में वा जद परगट व्ही
धधकण लागा नखतर, सितारा सिलगण लागा
डागळै री भींतां माथै रोवण लागी मित्रियां
टाबरां री नींद रोवण लागी
अेक कुरज चीसळी पाडती
रात नै आरंपार चीरती निकळगी ।

अंधारी रात में आपरा लोही भर्या पग धरती
बधती रैयी जादूगरणी
पितरां अर देवतावां नै न्यूतण
आभै ताई भेजण नै पीळा चांवळ
लगायोडी निसरणी सूं उतरी
अेक अपसुगनी आवाज ।

उतर्यौ चमडै रा दस्ताना पैर्यां
ज्हेर सूं सनीज्योडै अेक नीलौ हाथ
पांसळियां में चक्कू ज्यूं धंसतौ थकौ !

चटक-चटकनै बळण लागौ
हाडकियां रौ फासफोरस
सितारां सूं तूटनै पडियौ अेक फानूस
अर स्हेद सरीसी गाढी अर मीठी नींद
किरची-किरची व्हेय र बिखरगी ।

सोनलिया नेजै ज्यूं थरथराई चांदणी
अर हत्यारी छांवळियां हींडण लागी चारूं कानी ।
आंख्यां बार-बार देख्यौ
अचरज सूं बेबिस्वास सूं
हाथां में हथकडी अर पगां में बेडियां ही ।
लोह सूं लोह टकरीजण री अपसुगनी आवाज सुणी

कान बार-बार सुणी
असह पीड़ा सूं बेबिस्वास सूं।

कोरी कतरणी मत बजा टोकै नानी
सूनौ सरोतौ बजावण सूं क्यूं टोकै मां ?

लड़ाई रौ अंदेसौ वा काळी कैवत
वा काळी आवाज
घात लगायनै बैठा चिड़ीमार रै जाळ ज्यूं पड़ी ही
मुरगियां माथै जिकी सेवती ही
अंडां में आगली सुबै ।
चिड़ियां माथै
जिकी नुंवा जलम्या टाबरां री चांच में चुगगौ दे रैयी ही !
कबूतरां माथै जिका गुणगुणाय रैया हा
पवनां नै किणी साज ज्यूं बजाय रैया हा
मोरियां माथै
जिका टेकरियां माथै चढ्योढ़ा बादळां नै बुलाय रैया हा
माछळियां माथै
जिकी ऊजळ्यौ अर वेगवान करती ही जळ नै
नदियां माथै
जिकी सींचती माटी री देही अर पाळती दरखतां नै
लीला घोड़ां रौ रथ दौड़ावता वरुण माथै
पड़ियौ वौ जाळ
अर पसरतौ गयौ सगळी पिरथी माथै
जिकी मां रौ हांचळ ही
जिणसूं दूध रा झरणा बैवता हा ।

फौलाद री काळी नसां वाळ्यौ वौ जाळ
जिणमें पासविक प्रवरती रौ काळ्यौ रगत बैवतौ हौ
पड़ियौ अर जकड़तौ गयौ परौ
हथोड़ा हळ अर कलम री कलाई नै
पसीनै रा मोरां नै
जातरा रा पगां नै

संवेदना नै, दीठ नै, अकल नै, स्याही नै
जकड़तौ गयौ परौ
रंगधनुसां नै, हिलता रूमालां नै
गिणतियां नै
सूरज चांद अर ग्रहनामी दिनां नै
दिन में सांस नै थकान मांय बदळता लोगां नै
जिका टिमकी तारां अर मिरदंग री तरंगा माथै
मगन हा निरत अर गीत में

तारां ज्यूं चमकीली पाणी सूं भरी तळावड़ी
जिणरी लैरां में बडेरां री ओळूं
हिबोळा लेवती ही
अर तट माथै हथेळियां खोल रैयौ हौ
अेक नवजात टाबर

वा काळी आवाज
भै री पड़छावळी ज्यूं पड़ी
उणरी निस्छळ आंख्यां मांय ।
□□

चार

हरेक मूडै सूं कान ताई । कान सूं मूडै ताई । मूडै सूं कान ताई
आवाज दर आवाज दर आवाज दर आवाज
आवाज रै हरेक चैरा लारै
उणरी अेक आतमकथा है !
धूड़ रा बग्गूळियां अर झाड़-झंखाड़ लारै छिप्योड़ी
तिलिस्म री पेचदार सीढियां अर अदीठ दरवाजा
निकळनै आई ही जिणसूं
इतिहास री सै सूं वत्ती चालाक
वा वारदात !

जहाज तट माथै आयनै रुक्यौ हौ
जिंदगानी रा नुंवा व्याकरण अर नुंवी दुनिया री
खोज रौ बखाण लियां जबान माथै
आंख्यां में लीलौ कांइयांपणौ अर हाथां में
जाळ अर रस्सियां लियां
औजारां अर हथियारां सूं लैस ।

अचाणचक अचाणचक अचाणचक
अंधारै नै बींधता थका ऊठ्या हजार-हजार भाला
ज्हैर बुझिया तीर अर सणसणावती गोळ्यां
अर चारूंमेर बिखरगी
अधनागी कत्थई ल्हासां, कत्थई ल्हासां टाबरां री ।

चकरघिन्नी ज्यूं घूमण लागौ आकास
दूणी तिगुणी रफ्तार सूं घूमण लागी घड़ी री सुइयां
पागलां ज्यूं चकरघिन्नी खावतौ
गूंजतौ रैयौ अेन नवजवान सैनिक रौ सवाल

व्हाय..... व्हाय..... व्हाय..... ?
अेक जंगळी लुगाई टाबर री ल्हास चेप्यां
जंगळी हवा ज्यूं दौड़ती रैयी
अठी-उठी !

उठै मारीज्यौ अेक बूढौ रींछ
चट्टान जिसी उणरी ल्हास काळी रात नै चीरती
चीरती थकी सगळी पवित्र मानतावां नै
अेक बारूदी धमाकै जिसी चिंघाड़ साथै पड़ी
पड़ती 'ज गई ।

जंगळ री काठ आंख्यां देखती रैयी सै कीं
अचुंभै सूं चुपचाप
कारण ?
कारण जाणणै सारू ऊठी सवालिया आंख्यां माथै
चढाय दीवी काळी पट्टियां
लंबी अंधारी सुरंग में
धकेलीजिया लोग
बांधीज्योड़ा, कैद कियोड़ा, देस निकाळौ दियोड़ा लोग !

ऊपर ढळवां अर ठंडौ काळी सीमेंट रौ आकास हौ
साफ हौ मैदान चालाक इरादां सारू

घंटाघर री चौमुखी घड़ी में
बज रैयौ हौ वारी इंछावां रौ बगत
तीखा मजबूत जबड़ा
चालाक लीली आंख्यां अर नुकीला पंजां वाळी जुंआं
रेंगनै निकळी
बाळां भरी मस्योडै रींछ री खाल सूं
अर चारूंकानी सूं घेरनै
चारूमेर सूं चढी
सोना रा भाखर माथै !

सै कीं नै कुतरणै अर गिटकणै में सिमरथ
जूट री मोटी अर लंबी रस्सियां जिसे आंत वाळी
जुंआं पूरै भाखर नै गिटगी ।
सोन-मिरग ज्यूं पळकण लागा वांरा सरीर
दैत्याकार व्हेती गई
व्हेती गई
दैत्याकार सुनैरी जुंआं !



काळजा माथै पत्थर राखनै भाखरां देख्यौ
औ दुखदाई दरसाव
सै कीं देखती वां गुफावां री आंख्यां में
ज्यूं री त्यूं चितराम सरीसी लिख्योड़ी है
आज ई वा त्रासदी !
आंक्वोड़ी है आज ई ज्यूं री त्यूं
सुनैरी जुआं री वा पैली तस्बीर
बगत री आंख में टैस्योडौ
थरथरावतौ वौ काळौ आंसू
तिड़कती काळी माटी
तरेडां में दफन व्हेती सुनैरी तावड़ी !
आज ई ज्यूं री त्यूं टंग्योड़ी है वा डरावणी सून्ध री तस्बीर !

ताड़ रा पत्ता वाळी छत सूं
फूटतौ धुआँ नीं हौ
अन्न-जळ री गंध नीं ही
नीं ही मिरच-मसालां री धांस

सिला-लोढी रौ संगीत नीं हौ
जबान कटिया रूख, पंख कटी पवनां
पाळौ खायोड़ी फसल जिसे काळी तावड़ी
भूख अर मौत री काळी छांवळी ही
माथां पर नाचती थकी ।

अर सुनैरी जुंआं ही जिकां रै जबाड़ां में
मिनख रै रगत रौ स्वाद लागग्यौ हौ !
□□

पांच

मैं अेक अंधारै जुग रौ दस्तावेज हूं
गुलाम जुग रौ काळौ इतिहास
अेक कूणौ फाटोड़ौ कागद काळी स्याही में लिख्योड़ौ
बेड़ियां, हथकड़ियां अर जेळां रौ निरमाता लवार
पैलौ खाती मैं
निरमाता सिंघासण रौ
जिकौ होळै-होळै कुंदौ व्हेगौ
बळदां नै नाथण रौ, गुलामां नै बांधण रौ
आजादी रै खिलाफ उण चौपायै रौ निरमाण
अेक खूंखार जिनावर री जलम-तिथी है ।

काई मैं अेक कमीण रचेता हूं ?
अंधांधुंध सोध री ललक में आंधौ
अेक अबोध अपराधी जिकौ
सपना अर ग्यान रै सत्यापन री उत्सुकता में
भेळी करी ही हाडकियां अर जलम दियौ हौ
उण बाघ नै
जिकौ सगळां पैली म्हारी इज हत्या करी ही ?

अेक क्रूर ठहाकौ गूंजै
रस्सियां उछाळ-उछाळनै हंसै जहाज माथै चढियौ
कोलम्बस
भाखर सूं उतरतौ वास्को डी गामा हंसै
अेक मक्कार हंसी !

मैं इज हू जनक उण आदमखोर चौपाया रौ
चीखै अक सफीट नागौ मिनख
हां मैं, मैं इज हू निरमाता उण सिंघासण रौ
आयनै बैठी ही जिण माथै वै सुनैरी जुंआं
खुद नै भगवान रौ दूत कैवती
भगवान रौ हुकम कैवती आपरी आवाज नै ।

भगवान ! चारूंकानी जिणरै
आंधी आस्थावां रौ अंधारौ हौ
जिणरा मौरां माथै हल व्है सोसण रौ गणित
अर पक्का व्है पाया सत्ता रा ।



मैं गवाह हू निजरां देखी बात रौ गवाह
हवा में लैरावतै कसाई रै छुरा रौ
तूटनै बिखरतै जळपात्र रौ
पूँछ वाळै सितारै री मौत रौ
मरुथळां अर दळदळ में बदळतै घास रै मैदान रौ
बांव तूटी दिसावां रौ, गोडा भागोडै भाखर रौ, नीलै चक्कू रौ
बांव माथै काळी पट्टी बांध्योड़ी सवार रौ, मुरगै री मौत रौ !

मैं गवाह हू
सांप रै विस-दंस रौ, चंदणबन री बेबगत मौत रौ
पर्सीपोलिस अर नालंदा सूं उठती नीली अगन जीभां रौ
जंगळ रा घावां रौ, रथ रा दागां रौ, उखल्योड़ी नालां रौ
हवा में हिरण री बली रौ, कुणाल री आंख्यां रौ
सुकरात री मौत रौ ।

गवाह हू मैराबदार ऊंचै म्हेल में
जुद्ध अर योनी रै उणमाद में डूबी
सुनैरी जुंआं रौ !

अक खूनी तलवार ज्यूं उतरी जिकी
अंकुरावती धरती रै लीलै धवन्यालोक में
बीजासय नै चीरती, भ्रूण री हत्या करती थकी
खाल उतारती बिरछ रै बिस्वास री

अंधारा होटां में गंदली दंत-ओळ ज्यू चमकती
 भूस्वामिता !
 अेक कटीलै कोडै ज्यू पड़ी
 फाल लारै चालतै बळदां नै हांकतै
 धोबां-धोबां बीज सूं माटी री कूख भरतै
 करसां रै मौरां माथै
 अन्न री आतमा माथै
 गन्ना रै हरख माथै
 चावळां री दूध मुंडाळी हंसी माथै !

खासै आंतरे ताई तिडकती गई परी जमीं
 खेत तरेड़-तरेड़ फाटतौ गयौ
 मरचोड़ी आंख्यां ज्यू धौळा-धट्ट व्हेगा बादळ
 पाखाण रै घरै रूठनै पाछी गई परी नदियां
 पाणी री सूखी पगथळियां में पड़ी
 ढोर-डांगरां री ल्हासां !
 रूख-उखड़नै पड़ियौ खाई में
 आदमी निरासा री सून्य में
 तारा भाखर माथै
 हळ
 अपंग व्हेयनै पड़ियौ खेत में !

पण नीं रुक्यौ, नीं रुक्यौ, नीं रुक्यौ सिलसिलौ
 नीली पड़ती रैयी देही, लपलपावता रैया, बिजळियां रा कोईड़ा
 गरदनां कटती रैयी, गिलोतिनां पड़ती रैयी
 क्रूरता रै मगजबिहूण माथै में ऊग्या नुंवा सींग
 पाछी टंटोळीजी पूंछ री हाडकियां मिनख री देही में !

अर हळ रौ जुओ चढाय दियौ
 उण किसान लुगाई री गरदन माथै
 जिणनै आगलै दिन रै बळीतै सारू छाणा थेपणा हा
 गूंदणी ही माटी अर छाबणी ही भींत
 तिडकणै सूं पैली
 नीपणौ हौ आंगणौ अर बसाळी

मांडणी ही रंगोळी
कूटणौ हौ धान अर अनाज पीसणौ हौ !

मानता सारू इंदर री
बांझ धरती रै गरभ धारण सारू
करीजी निरवसन !

●●

कोढी मानतावां री हजार आंख्यां
दुरगंध फेंकती रैयी चारू कानी
अर अेक निरवसन नारी
भाख फाट्यां खेत में हळ खींचती रैयी, खींचती रैयी
खींचती रैयी खेत में खपण ताई
तूटनै बिखरण ताई नाचती रैयी लुगाई
तलवार सूं खंडित मांग में रगत रेख लियां
रणवासां में भेळी करीजी लुगायां
जौहर करती रैयी !
नगाड़ां रा हाकां में चिरळावती रैयी
चितावां माथै चढती लुगायां !
बीमास्यां झेलती रैयी, धुंअै में घुटती रैयी लुगायां !

लुगायां लुगायां लुगायां
जीत री संपत्ती में, मांस री चीज में बदळीजी लुगायां
खुल्लै बजार में बेचीजी अर खरीदीजी लुगायां
आगलै सवाल सूं रोकीजी गागीं
व्यभिचार रै कळंक में त्यागीजी
दरसण अर न्याव सूं मोल-बिहूण करीजी लुगायां
स्तन अर योनी में अरथीजती विग्यापित लुगायां !

●●

अेक काळौ पानौ हूं, अेक काळी कहाणी हूं म्हें
अेक चीसळी
सईकां सरीसी लंबी, काळी रात रै आर-पार
बरछै ज्यूं गुजरती थकी
मादरजात नागी अर काळी चीसळी !

चीसळी उण आंधै राजा री
जिणरी पातळ में पुरस्योडै भोजन
झपटनै लेय जावती सरपदेह चीलां !

चीसळी उण काळै गुलाम री
जिणरा गळा में घालीज्यौ लोह रौ भारी कडौ
अर अेक मसक पाणी साथै भेजीज्यौ
सोना री खानां अर रेगिस्तानां में

गोरां रै मनोरंजन सारू
जिणरी पीडादाई मौत जरूरी ही !

चीसळी उण मिनख री
जिकौ इण सारू जीवतौ जळाईज्यौ कै वौ अछूत हौ
उणरी छीयां पड़ी ही अेक बामण री साल माथै
अर वौ पाणी पियौ हौ अेक सारवजनिक कुंवै सूं।

चीसळी !
लगोलग अकाळ में दम तोड़तै मिनख री
बाढ में बैयग्यै डोकै री चीसळी
चीसळी ! पीळौ सितारौ लगायां
उण यहूदी टाबर री
जिकौ ठंड अर भूख सूं ठिठरीजतौ थकौ
दम तोड़ण सूं पैली
आपरी आडी-तिरछी लिखावट में लिख्यौ हौ
.....हिटलर.....

□ □

छै:

रंग रोगन, रबड़ अर सेल्यूलाइड सूं प्लास्टिक सर्जरी री
दुनिया ताई
लगोलग चलतौ थकौ नाटक, निरत अर सासण
बदळता मुखोळीं री चालाक सूझ-बूझ है
दिमाग रा सांधां में राख्योडै चक्कू
जिणरा निरदेसां सूं आपरी कारवाई करै।

जूट अर कपास री कारोबार वाया बासवनां रै
रोटरी अर सिलेंडर मसीनां सूं गुजरतौ
अखबार री सिकल में पड़िया करै
रोजीना दिनुंगै आंगणै में !

बजार भाव सूं उपजी भासा
अर सैनिक समझौता में मिळियौ घुन खायोड़ौ गेऊं
रचै है पीळी फाइलां रौ जंतर-मंतर
उठै, बैठै स्याही री चिड़िया
सरपट भागै है कागद रा घोड़ा
अर भूल-भुलावां में भटकता-भटकता तोड़ै है दम

लाल फीतां सरीसी जीभ
चाट जावै सगळ्य सपना
चिड़ियां चुग जावै खेत
रेत इज रेत बिखरै
अेक मरुथळ रचती थकी !
साढी छै घंटां रौ तिलिस्म
गोळ गोळ गोळ घूमै घाणी ज्यूं
रस धोळा रवां में ढळतौ
धोळी इमारतां में पूग जावै
के धोळा देस में !
खालीपौ खिरै अेक धुंअै घिरी बस्ती में रोज सिंझ्यारा
गूंगौ रीढी झुकी हाडकां रै पिंजर जिसौ
धुप्योड़ा कपड़ां में बैठौ डर
देख्या करै
आपरा ऊजळा दाणां माथै काळौ डाकौ
मून धार्यां चुपचाप !

●●

औ सामरथ हीणता रौ बोध
घुन खायोड़ै गेऊं री उपज है के जूट भासा री

जिकौ चुण-चुणनै खाय जावै सगळी चिनगास्थां

अर पसरावै अंधारौ
मिनख रै अेडै-छेडै
ऊभौ कर देवै भै रौ कारागार !

वा भासा, भासा नीं अेक पळपळावतौ चक्कू है
जिकौ जूट काटतौ-काटतौ काटै
ग्यान अर संवेदना री नाडियां
बांटे मिनख नै टुकड़ां में
अर म्हांणै मांय उडती चिड़कल्यां चुराय ले जावै
अर बंद कर देवै हवा अर तावडै में खुलती
हरेक बारी !

●●

'वै' अेक वरग माथै भूख सूं
अर दूजै माथै भासा सूं वार करै
अर दिमाग रा सांधां नै चवड़ा करता थका
मिनख अर मिनख रै बिचाळै
अेक खाई में बदळ देवै !

प्रसासण री कुड़सी में राखी वारी देही
अर सिक्कै में राख्यौ माथौ
औ बंटयोडौ व्यक्तित्व
वारै जादू रौ सै सूं मोटौ करिस्मौ है ।
जिकौ कठैई चोट व्हेतां इज
चारूं कानी सूं सरू करै अेक सिलसिलौ
सूरज ग्रैण अर चंदर ग्रैण सूं मिनख ग्रैण ताई
पसार देवै अंधारौ, घटाटोप अंधारौ
कै हाथ नै हाथ नीं सूझै !

●●

दिन-रात खदबदीजै है बस्तियां
न्योन लाइट ज्युं लग-बुझ करै पल
पलांस में बदळै
सून्य टिलोड़ी री पूंछ में । पूंछ रस्सी में । रस्सी गीध में ।

गीध झपटै चारूं कानी

चारूं कानी जादू है ! करिस्मौ है ! चमत्कार है !!
 चमत्कार काच रा टुकड़ां रौ । रंग रोगन रौ । सैल्यूलाइड रौ ।
 टकसाळ रौ । छापाखाना रौ ।
 जिकौ हरेक बार बदळै
 सिक्का में राख्योड़ै सिर रौ सिणगार
 कदैई पैरावै सींग, कदैई पैरावै ताज
 महाराज मूछ गिरायनै बादसा बणै
 जनता रौ खिदमतगार !
 अर कदैई सफाचट चैरा अर बिना ताज
 अक लोकप्रिय जननायक
 जिणरै मौरां लारै
 अक तीन चैरां वाळै जिनावर री खूंखारी मौजूद है !

सांयती, जनतंत्र, स्वतंत्रता, देसप्रेम
 उत्पादन, उद्योग, करसण, कारोबार
 रोटी अर रोजगार
 चाबी वाळी तिजोरियां बोलै
 सिक्कै री खणखणावती, झिलमिलावती आवाज में
 अर आपरै नुकीलै नखां वाळै पंजां ताई अंकित
 तीन सेरां रा चार पग
 करै सावधान !

●●

देही कुड़सी में, माथौ सिक्कां में, कठै राख्योड़ौ है वारौ जीव ?
 मायानगरी री पग-पग पसरी माया में
 कठै राख्योड़ौ है वारौ जीव ?
 कोयल रौ अंडौ कागलै रै घोंसलै में
 कमेड़ी रा घोंसला में सांप
 सांप में है सुनैरी जुंआं रौ जीव
 जहैर भर्यौ है जिणरा आगला पोला दांत में
 आंख में
 आंत में
 जहैरीली है उणरी पड़छांवाळी
 चांदणी रात में उणरै उडण रौ मतलब
 अक भरी पूरी आबादी रौ लकवाग्रस्त व्हेणौ है

कुंडली मास्त्र्यां
 फण काढ्यां
 डस्चोडौ अर संकाळू
 वौ रात-दिन जागै
 जागै उणरी सुरक्सा पंक्तियां
 चाक चौबंद अर हथियारां सूं लैस !
 बंदूकां । तोपां । मसीनगन । अर टैंक
 जहाजी बेड़ा । पनडुब्बियां । अर मारक हवाई जहाज
 बम । नेपाम । हाइड्रोजन । अर अणुबम
 न्यारी-न्यारी ताकतां वाळा, न्यारा-न्यारा मोरचां माथै
 जळ-थळ अर हवाई सेनावां
 सजै है विसाळ जुळूस
 करीजै
 समुंदरी अर भूमिगत विस्फोट !
 तिलिस्म अर सुनैरी जुंआं री रक्सा सारू
 अठै सूं उठै ताई सज्यौ-धज्यौ
 हरेक खुडकै माथै कान टिकायां, आंख गडायां
 ट्रिंगर माथै हरदम आंगळी राख्यां
 चौकस
 ताम-झाम !
 अर अेक गुप्त तंतुआं रौ जाळ
 नसां ज्यूं पसर्यौ है हरेक घर में
 हरेक मिनख री पडछांवाळी में बैठौ है
 अेक गुप्तचर !

□□

सात

मिनख-मिनख भूखौ हौ अन्न कठै गयौ
 मिनख-मिनख तिरसौ हौ जळ कठै गयौ
 मिनख-मिनख नागौ हौ कपास कठै गयौ
 मिनख-मिनख लूलौ हौ हाथ कठै गयौ
 मिनख-मिनख धड़ हौ माथौ कठै गयौ
 मिनख-मिनख बेघर हौ घर कठै गयौ
 मिनख-मिनख निरधन हौ धन कठै गयौ

मिनख-मिनख हाळी हौ खेत कटै गयौ
मिनख-मिनख मजूर हौ मैणत कटै गयी
मिनख-मिनख चुप हौ सबद कटै गयौ
मिनख-मिनख बेहाल हौ सुख कटै गयौ

बच्चौ-बच्चौ बिलखतौ हौ दूध कटै गयौ
बच्चौ-बच्चौ उदास हौ गुब्बारौ कटै गयौ
बस्ती-बस्ती अंधारौ हौ उजास कटै गयौ
बाग-बाग सूनौ हौ फूल कटै गयौ
सिगड़ी-सिगड़ी टंडी ही अंगार कटै गयौ
लुगाई-लुगाई नागी है वस्तर कटै गयौ

किताबां कटै गई कागद कटै गयौ
चितराम कटै गया संगीत कटै गयौ
खुसी कटै गई निरत कटै गयौ
कटै गयौ कटै गयौ
कटै गयौ कटै गयौ
सवाल दर सवाल जबाब कटै गयौ ?
□□

आठ

खित्तिज रै आकास पर उगै है अेक उग्रतारौ
ज्वाळा रौ सबद बोलतां खुलियौ पत्थर रौ होठ
पवनां जंगळ में मिरतु री घंटियां बजावै है
चिणगारियां उडै है
नागा रूखां री खुरदरी, कथई हथेळियां सूं उपजती ।
गूजै है बरफ सूं ढकी पगध्वनियां
पहाड़ी रस्तां अर पगडांडियां माथै
सिलावां रै गरभ सूं जलम ले रैया है
नुंवा झरणा अर नदियां !

करोड़ां हाथ अर करोड़ां पग
ऊभा है
अेक बार फेर तणनै अर ऊठनै

मुगत
करोड़ां हाथां अर करोड़ां पगां री तरै !

मुगती रै जोधा रौ जहाज आवै है

लैरां नै चीरती
चीरती कुहांसै अर अंधारै नै
बध रैयी है उणरी भुजावां
सुडौळ, आकुळ, उल्लासी !
उणरी गति, उणरै वेग नै सुणौ
लैरां री उत्तेजना नै सुणौ
धमनियां में रगत रै प्रवाह नै सुणौ
रगत प्रवाह में इस्पात री गूज सुणौ !
सुणौ वां घंटियां नै
जिकी सुनैरी जुंआं री मौत री घोसणा है !

●●

विस्फोटित व्हे रैयौ है काळै परबत रौ सीस
अंधारै रौ दैत डरपनै दहाडै है
उणरा अजेय, क्रूर अर बळवान घोड़ा
पाताळी सांयत में मेख टोकता
आपरी नाळ जड़ी टापां सूं रूंदता सरणाटौ
ऊंचा सिखरां कानी बधै है

लगातार बधै है, बधै है उण ऊंचाई कानी
जठै वारी मजबूत जांघां
माछली-सी चंचळ मांसपेसियां अर उणमाद
वारी आंख्यां में मिरतु-पटल लटकाय देवै

वै इण कुबेर तंत्र रा
सै सूं बळवान अर सजीला जिनावर है
अठै वै सै सूं बडी ऊंचाई माथै पूग रैया है

सै सूं बडी ऊंचाई
जिकी सै सूं बडी खाई व्हे !

अबै वै अेक क्रूर उछाळ भरैला
 उणमाद अर अभिमान सूं भरी
 नदी फलांग उछाळ!
 पण नदी लांगणै री कोसिस में
 वै कदैई जीवता बच्या व्हे अैडै कठैई
 इतिहास में नीं मिळै!
 कमर तूटतां ई सगळौ वातावरण
 वांरी दम तोडती चीखां सूं भरीज जावैला
 अर उठै तूटी तलवारां बिचाळै
 पडैला वांरी ल्हास!
 कीं बगत पछै इज सुणीजैला
 हत्यारां सैनिकां री गोळी री आखरी आवाज
 जिकी वै आपरी इज कनपटी पर दग्ग्या करै !

बस कीं बगत पछै
 उडता निजर आवैला
 लोह रा चींथरा हवा में
 वांरा लोह बंकरां रा अस्थी-पिंजर !

अर चौरायां माथै झूलता निजर आवैला सरीर
 सुनैरी जुंआं रा !
 लंबी गरदन अर लुंज-पुंज हाथ
 वांरा रगत भर्च्या हत्यारा हाथ
 झूल जावैला असहाय !

इतिहास री वा इज जाणी-पिछाणी तस्वीर !
 □ □

नऊ

सिलावां माथै मुक्का बरसावै है
 समंदर री भाठा तोड़, लंबी कठोर बावां
 लैरां
 चमकीला, कत्थई समंदरी घोड़ां माथै सवार
 बोलै धावौ गुफावां में
 पत्थर रा मजबूत दरवाजां माथै !

अक पछै अक खुलती जावै
गुफावां अर खंदकां !

गोळ-गोळ घूमतौ भंवर
समंदर री देवी रौ घर है
के घट्टी है
करोड़ां बरस जूनी लुगाई री
लूण पीसती थकी
लगातार-लगातार !

उठै अक भळै लंबी सुरंग नै पार करतौ थकौ
आगै औरूं आगै बध जावै जहाज
उण मुगती रै जोधा रौ !

●●

उणरै फगत अक पग में जूतौ रैयग्यौ है
तार-तार व्हेगी है उणरी कमीज
बावां अर कांधा
ठौड़-ठौड़ सूं छुलग्या है !
उणरा सरीर सूं रस्तां अर परसेवै री गंध आवै
जाणतां ई जलम अर हक रौ रहस्य
नदी-नाळां नै लांघतौ
भाखरां अर जंगळां नै पार करतौ
साथै व्हेगौ वौ
आपरै हक री लड़ाई में !

उणरौ ऊठ्योड़ौ लीलाड़ अर चैरौ
आतम-बिस्वास सूं खिल्योड़ौ है
तावडै रै ऊजळै पुसप ज्यूं

प्यार अर निस्चै सूं भरी आंख्यां सूं
फेंकतौ नीली रोसणियां वौ बध रैयो है ।

बध रैयो है
उणमाद सूं लबालब समंदर नै साथै लियां

आभै सू आंख्यां मिलावतौ
संगीतमयी ओजस्वी आवाज में
जगावतौ, पुकारतौ लोगों नै
वौ लगौलग बध रैयौ है

हवा अर माटी रै कण-कण माथै लिखतौ
आजादी रौ गीत !

आवौ अर गावौ म्हारै साथै
म्हैं थां सगळ्यां साथै गावण नै आयौ हूं
थांरौ म्हारौ आपां सगळ्यां रौ गीत !

ऊठौ जागौ
सईकां सू सोसित मनुज री संतानां
कुचल्योड़ी आंगळियां वाळा
भाखर काटता, कांकरी कूटता आदिवासियां
कपास घरां में खून थूकता जुलायां, पिंजारां
काळा हीरां री सुरंगां में दफन हुयोड़ी आतमावां
अबरक खान में लोही बाळता पुस्त कांधां, मजबूत सरीरां
जल्लाद जमीदारां रा कोड़ां सू पिस्योड़ा, तूटोड़ा किसानां
कारखानां में फेंफड़ा गमावता मजूरां
खेत मजूरां, लुहारां, खातियां, हमालां
गोंड, भील अर संथालां
डाकियां, करमचारियां, कामगारां
आवौ अर गावौ म्हारै साथै
आपरी गैंती, कुदाळ, बरछौ, हंसियौ अर हथोड़ौ उंचायां ।

पत्थर माथै धार देय 'र उठावौ आपरी कुल्हाड़ी
अर आजादी री आग सिळगावौ
लकड़हारां !

दुनिया रौ मैल धोवता धोबियां
मैलौ उंचावता अर कचरौ बुहारता मैतरां
हड्डियां रौ ढांचौ बण चुकी
दधीचि री संतानां !

जागौ !

अंधारी कोटड़ियां सूं मुगत करौ
आपरी आतमा अर आपरी आंख्यां !

थारै रगत रौ खारास
थारी रगां में समंदर री मौजूदगी है
बगत री अतळ गैरायां मांय
पत्थरां में दफन व्हेग्यौ हौ जिकौ गीत
जिकौ गमग्यौ हौ
बूढा रूखां री ओळूं री सुरंग में
महैं उणरौ अक-अक सबद
अक-अक ओळी
सोधनै लायौ हूं
थारै सारू
आवौ अर गावौ
अक बार फेरूं स्वतंत्रता रौ गीत ।

●●

स्वतंत्र व्हेणौ है, व्हेणौ है
आपां नै, आपां सगळां नै
चिड़कलियां ज्यूं स्वतंत्र व्हेणौ है
जीवणौ है, जीवणौ है
आपां नै, आपां सगळां नै
रूखां ज्यूं जीवणौ है
गरब सूं सीस उंचायां
तावड़ा, पाणी, हवा अर माटी साथै
लहैलावता थकां, झूमता गावता थकां
महां दुनिया नै फूलां अर फळां सूं लाद देवांला !

सुगंधां सूं भर देवांला पवन रौ पेट
बादळां ज्यूं उमड़ांला
अर आपरै सनेव सूं भिजोय देवांला धरणी नै
रितुवां ज्यूं छावांला
अर रंग-बिरंगी कर देवांला
दसूं दिसावां नै !

सूरज ज्युं निकळांला
चीरता सगळी रातां नै !

म्हां जुगनुआं रा बिरछ
म्हां धरती री कवितावां
म्हां करोडूं दाणां वाळी गेऊं रा बाळियां
भूख सबद मिटाय देवांला भासा सूं !
आसा म्हां कालै रै मिनख री
म्हां पइड़ा बगत री रफतार रा
कारखानां री आभै अडती चिमनियां
फूठरी-फूठरी चीजां सूं भर देवांला
हरेक घर रौ आंगणौ !
दरवाजै हाथी झूलैला
पडदां में रुणझुणावैला चांदी री घंटियां
दूधांमुंडाळी आंगळियां रमैला आंगणै
सतरंगी कंचिया !

मैणत री पवित्र थकान अर रात रा गीत व्हेला
व्हेला म्हांणी दुनियां में व्हेला
विचारां रै जोत-कमलां सूं भर्या सरोवर
संवेदना रा परिलोक
परीलोक रा बादळ-म्हैल
बादळ-म्हैल प्रेम गीतां सूं भर्या !

कविता जिंसी जीवंत अर संगीत जिंसी आणंदमयी
ग्रंथां जिंसी ग्यान सूं भरी-पूरी दुनिया
अेक दुनिया बणावांला म्हां
नारंगी जिंसी गोळ अर सुनैरी
इण दुनिया नै
सजावांला म्हे !

●●

गावतौ, लगातार गावतौ
पवनां, रूंखां, चिडियां अर
लाख-लाख लोगां सूं बतियावतौ

बधतौ आवै है
बधतौ आवै है
वौ मुगती रौ जोधा ।
□□

दस

वौ मुगती रौ जोधा मुगती रौ दरसण
नित नुंवौ चिरंजीवी व्हेतौ
मुगती रौ विचार !

अेक रोसणी रौ हाथ
काटतौ थकौ अंधारा नै
चमकतौ बार-बार !

आकास सूं नीं उतर्यौ, नीं निकळ्यौ
फाड़नै हवा रौ पेट
वौ कोनी सूरज री मनगढ़ंत संतान !

खेत-खेत जायनै पोटली भर धान में
फसल काटता मजूरां री टोळी में ही
उणरी मावड़ी
अेक सूनमून दोफार जिण
खेत में जणियौ हौ उणनै
चिमनियां सूं निकळतै
काळै धुंअै री धुंधळक में
पळियौ अर बधियौ हौ वौ !

बारंबार तोड़ीजती झुगियां सूं बेदखल
बेदखल कियौ बाढ़ उणनै बार-बार
अकाळ धकेलियौ गांवां सूं
नगरां ताई केई-केई बार !
कोपरिया तोड़तां, काटतां भाखर
पत्थरां रा दिमागां नै बांचतां
जाण्यौ उण स्रिस्टी रौ कार्यांतरण
रूपांतरण बांदरां सूं मिनख ताई रौ

वरण री आजादी रौ अरथ
पंछियां सूं पढियौ

हथोड़ां सूं वार करणौ
पड़ड़ां सूं रफ्तार
रूखां सूं बगत
दीठ जीवण सूं लेयनै बधियौ

बगत नै सरुआत सूं भविस में बांचतौ थकौ
वौ अेक पगांजायौ है
सीरसासण लगावता चिंतनां नै
सीधा खड़ा करतौ थकौ ।

वौ अेक गणितग्य अंक-अंक हल करतौ
गणित मैणत अर धन रौ
आत्मा में उतारतौ माटी रै कण-कण नै
अरथ नै पान-पान खोलतौ
हवा अर तावड़ै में
वौ अेक कद्दावर रूख !

वौ अेक सबद
म्हाणै बगत रौ समाज रौ
आपरी संपूरण आवाज में ध्वनित व्हेतौ साचौ सबद !

नीं व्हेला, नीं व्हेला, कीं नीं व्हेला
नीं तूटैला भीतां भूरा भाठां रै कारागार री
लोह री नसां, जंजीरां रा जाळ
अजगर री देही रौ फंदौ
नीं तूटैला !
सुनैरी जुंआं रै संहार बिना
नीं व्हेला इण निरंतर गुलामी री मौत !
रूं-रूं में रम्योड़ी हिंसा
बूटां नै रूख नीं होवण देवै
भट्टियां में गळै है लोह

बढै है लोही
हाडका बढै है ।

कटे है फसल रे साथीसाथ
हाथां-पगां री आंगळियां !
वां सरीरां री पीड़ नै
पीड़ री टीस नै
जाणै है वौ

उण मानचित्रां जिसे धारीदार
आपरा बाप रे मौरां माथै
सुनैरी जुंआं रौ दाग देख्यौ है

सुण्यौ है रात रा चमकनै जागती
मां गैरी नींद में
रोया करै मित्रियां री गळई !
किण अपसुगन री सूचना है आ ?
किसौ भयानक सपनौ
जिकौ इण गत घोदै है, डरावै है
अर रुदन में बदळै रोजीना रात रा ?
वौ जाणै है
जाणै कैवै बार-बार
अकलै नै फगत गुलामी मिळै
मुगती सगळं रे साथै है ।
□□

इग्यारै

ओस ज्युं पडै हरेक रात री आतमा
अर तेजाब सूं झीर-झीर व्ही तावडै री आंगळियां
पतंगां रा जाळीदार पंख जिसे
उदई खायोड़ा कागदां जिसे
पीपळ री झरघोड़ी सूखी हथेळियां जिसे
मसाण री राख में चुगै है
तारीखां री हाडकियां !

रात-दिन तड़बड़ीजै है
सिक्कां अर सबदां रौ दळदळ

घट्टी पवन चक्की में बदळीजै
बळद घरघरावता थका ट्रैक्टर रा चक्कां में
घोड़ा जीपां में
लोह रा कागलां में
अर कोइड़ा बन्दूकां में
चालाक लोमड़ियां में बदळीज जावै सिंघ रा माथा !

संबंध बदळै है
बदळै है कीमत
घर री आंख्यां आदमी री जेबां टंटोळै
पड़दौ बदळै है
आंख बदळै है
रगत उतरी लाल आंख
लीली रेडियमी चालाकी में !
टिमटिमावती रोसणियां रौ जाळ चीरती
निकळै है आभौ फाड़
अेक धोळी इमारत
हाकां में डूबोड़ी !
फोन घणघणावै
खड़खड़वै टेलिप्रिंटर
कूका करै चिरळ्वावै है
हीरा री अंगूठियां पैस्योड़ी आंगळियां

खुल्लौ । बंद । चौकौ । नौकौ । उछळ्यौ । पड़्यौ । सोनौ ।
मंदी । चांदी । तिलन । स्टाप । तेज । उठी । पड़ी । स्टाप ।
अल्जीरिया । काटन । जूट । काटन । हलो । न्यूयार्क । काटन ।
चार । तीन । डालर । गोरो । काळौ । मिंडी । रिपियौ । येन । केन ।
प्रकारेण । सी.आई.अे. । सी.आई.अे. । अमरीका । गन । जूतौ ।
कमीज । टाबर । कवितावां । चिली । मौत । मौत । टेलिस्कोप ।
गन । प्रेसिडेंट । स्टाप । प्रेसिडेंट । स्टाप । हल्या ।
सट्टौ । तस्कर । हीरौ । कोयलौ । चसनाला । हलो । हलो ।
वाटरगेट । दुबई । लोह । प्रधानमंत्री । बांगला देश । सेंसर ।

मुद्रास्फीती। स्टाप। बाढ। स्टाप। अकाल। स्टाप। चेचक।
 स्टाप। मलेरिया। तेल।
 तेल। तेल री धार। स्वेज। आपातकाल। हड़ताल। लेबनान।
 कांड। हलो। पाकिस्तान। हलो। जुद्ध। जुद्ध। इजराइल। कुंभ
 कास्मीर। न्यायालय। अखबार। विस्फोट। फिलीस्तीन।
 हवाई जहाज। क्रिकेट। फिल्मां। ब्लू फिल्मां। स्टाप। कांड।
 चिन्दा। टाटपट्टी।
 स्टाप। भारत। स्टाप। कोरिया। स्टाप। संविधान। बैस। हलो।
 हलो। पुलिस। मिलिट्री। भुखमरी। हलो। भुखमरी। भुखमरी।
 स्टाप। नोबल प्राइज। हलो। भूख। भूख। स्टाप। भूख। स्टाप।
 यू.एन.ओ.। स्टाप। यू.एन.ओ.। स्टाप। जुद्ध। जुद्ध। स्टाप। जुद्ध।
 ●●

रोहू ज्युं उछळती-पड़ती अेक काळी लकीर
 पगोधिया चढै काळी लबादौ पैर्यां अेक पादरी
 अेक काळी सांप चढै ऊंचै जावतै ग्राफ माथै।

जेळर आंकड़ा पर टिकावै
 आपरौ काळी डंडौ
 अर लंबी नीली वेन आपरै जाळीदार मुंडै सूं
 उगळै अपराधियां री भीड़
 रस्सी सूं बंधिया। बेड़ियां अर हथकड़ियां पैर्यां
 नैना हाथ, सूखा चैरा
 माटी में भरीजी, साड़ियां में लिपटी पोटलियां!

दरज करै अेक खाकी रजिस्टर
 बसां में जेब काटतां। रोटी चुरावतां। ताळ तोड़तां
 पकड़ीज्यौ, पकड़ीज्यौ, पकड़ीज्यौ रंग्यै हाथां
 झूपड़ी में धंधौ करतां। होटल रै कमरै सूं। बिना लाइसेंस
 पकड़ीजी, पकड़ीजी, पकड़ीजी रंग्यै हाथां

वारदा वारदात
 दंगौ फसाद
 सीखचां रै लारै सूं ऊठै है हाकौ
 रात-दिन दिन-रात
 बधै है आमदनी राजस्व में तादाद

दारूखाना, बार, जुआघर, वेस्यालय पंजीकृत
आंकड़ा भेळ्य करै समाज-सास्तर रौ छात्र
पंजीकृत वेस्यावां
अेक महानगर में पचास हजार
बीमार महाजनी कारोबार!

भूख रौ अेक बडौ दरवाजौ खुलै
नुंवी लुगायां सूं भरीज जावै
मांस रौ गरम बजार!

कबर सूं हाडकियां चोरी व्है
काळ आपरै जूतै री नोक गडावै पेट में। आंत में
मिदनापुर बजार में
बोली लगावै लुगाई आपरा टाबरां री। टाबर
अेक मरुचोड़ा कुत्ता री ल्हास माथै झपटै। तेल
सूं अपंग होवै है बस्तियां। अर जंगळी घास
संतानां रा बाळ मुंडवावै। गावै रसूलन बाई
बाजै है सितार। कतार दर कतार
कालेज पैदा करै बेरुजगार
ठेकेदार मजूर री जवान पत्नी नै अडाणै राखै!

गूजै झींगरां री अेकण सागै भेळी आवाज
माखियां सगळ्य मूंडौ देखण रा काच माथै आपरा गंदा पगां रा
दाग छोड जावै। भिणभिणावै।
अेक काळै उजास में चालै
डरावणौ नाटक आटूं पौर
जलम लेवै है स्हैर
अेकण सागै ऊंची इमारतां अर झूपडियां में
रातूरात नदियां कादै में अर
खेत रेगिस्तान में बदळ जावै
कीं बंगलां रा हत्थां में ऊभा लीला दरखतां रै सिवाय
तावडै रै उकळलै कढाव में न्हाकीजै सगळी छींया
अचाणचक
मीलां ताईं रूखां सूं खाली करीजै
जर्मी!

महामारियां आपरा भयानक जबाड़ा खोल्यां
पग धरै है
पढै है
गरुड़ पुराण!!
□□

बारै

जगरै सू उचटै राती-राती तिणगां
सांझी सू जागै जया जेता
जागै है आदम-कद ग्रीक मूरतां
अजंता री आंख्यां
गुफा रै अंधारै में
गेरू सू लिखी चित्र-लिपियां सू
जागै है अधनागौ गुफावासी करै सवाल
साच री जबान माथै सिलगै है सवाल
स्याही रा पग-मंडणां नै ताकती
रुक जावै निब री आंख अकस्मात
ऊठै सवाल सारू आतुर

नफरत अर नफरत रै अलावा
काई कैयौ जा सकै वारै सू
जिका चिड़ियां नै मनबिलमावण अर तोतां नै
बेमतलब बातां करण सारू
आपरा पींजरां में बंद कर लिया है ?

जिका चुरायनै लेयग्या है जिंदगानी री भासा सू
प्रेम, चिड़िया अर चांदणी जिसा सबद ?
चमकीला पानां री नागी कटार सू
जिका साची पोथियां नै मार नाखी है

वै दिल बैलावण रौ काम लेवै कविता सू
अर कैनवास माथै उभरती रंग-पीड़ावां सू
लेवै है नैण सुख
वै संगीत नै संसार सू काटनै
पंखौ झळता गुलाम ज्यूं

आपै सिराणै बैठायां राखै है हरेक बगत !

वै म्हानै म्हाणा गीत नीं गावण देवै

“वै म्हानै आपरा गीत नीं गावण देवै रोबसन

वै चावै कै म्हां आपरा गीत नीं गा सकां

डरै है रोबसन

वै पौ फाटण सू डरै है

म्हाणा गीतां सू डरै है रोबसन”

जेळ री अंधारी तंग कोटड़ी सू लिखै है नाजिम हिकमत

चिरळावै है गळियां अर सड़कां रौ गायक

‘वै म्हानै आपरा गीत नीं गावण देवै’

उमर री इक्कीसवीं मंजिल सू पड़ जावै सुकांत

अंधारै तिलिस्म सू चिरळावै ओरांग उटांग

चटकनै तूटै है दिमाग री नसां

अंधारै भंवर में डूबै

मास्टर मदन री आवाज

वै म्हानै आपरा गीत नीं गावण देवै

वै म्हानै आपरा गीत नीं गावण देवै

खोसनै लेय जावै वै

म्हांणी किताबां, म्हांणी कवितावां, म्हांणा गीत

म्हांणा गायक

गायक जनता रै गीतां रा

गायक बादळ राग रा, सगती पूजा रा

गायक धरती री कवितावां रा, नुंवी जातरावां रा

गायक चाय बागानां रा, परबतां रा, मीत रै नांव पाती रा

गायक रगत डूबा स्वर रा, छिप्योड़ा सुनैरी आखरां रा

बाकै मुंडै वाळै चांद रा ।

खोसनै लेय जावै वै

वै खोसनै लेय जावै म्हांणा फूल

अर सड़कां माथै बैवावै टाबरां रौ रगत.....

●●

बतावौ-बतावौ साबरमती रै संत री सूक्तियां

वैदिक रिचावां, लाल गुलाबां

बतावौ-बतावौ बुद्ध रा अस्थी कळसां
सांयती रा कबूतरां
धोळा पिरामिडां

प्यानो री धुनां में लटकती सूळियां
बतावौ-बतावौ
रूं-रूं में बस्योड़ी इण हिंसा रौ इलाज काई है ?
आखी दुनिया री रगां में टंडै ज्हरै ज्यूं
उतारीज रैया इण ज्हरै रौ इलाज काई है

काई इलाज है मिनख नै मिनख सूं
अेक दरजौ कम करण वाळी
इण साजिस रौ ?

इण अरथ-सास्तर रौ
जिकौ निकम्मां री अंटी में पइसौ
अर मैणतियै री जेब में भूख न्हाकै है ?
जिकौ चालाकी री वत्ती
अर पसीनै री कीमत कम आंकै है ?
जिकौ नपीणै ज्यूं लपकनै ऊभौ व्हाे जावै
बजार सूं निसरतै मिनख रै पाखती
अर जेब रौ भार तोलतौ थकौ बतावै
आपरी औकात री ऊंचाई काई है
हैसियत सूं तै करै
झूठ काई है, साच काई है ?

जंग लागोडै अंधारै नै खोलण वाळी चाबियां कठै हौ ?
गुलाब रा जंगळां कांनी जावण वाळी पगडांडियां कठै हौ ?
अगनी रा पिता पत्थरां कठै हौ ?
कठै हौ औसधियां, जड़ी-बूटियां
नासूर है चीरौ लगावणिया चक्कुवां कठै हौ ?

●●

सवाल सिलग रैयौ है
सवाल सिलग रैयौ है

पलास रै फूल में, आखर रै कंठ में, धूड़ में
कुम्हार रा आवा में, करसै रा जगरा में
सहैर में गांव में
हरेक जबान सूं ऊटै है सवाल
हरेक आंगळी हरेक आंख मांय
सिलगै है सवाल.....
पथराई आग री मसाल उंचायां
चिरळावै स्वतंत्रता री धोळी मूरत

परबत री चोटी माथै
जंजीरां सूं जकड़ीज्योड़ौ प्रमथ्यूस
चिरळावै
समंदर री बेटी म्हनै अक बेटौ दै
जिकौ काट सकै म्हारी बेड़ियां
अर आग नै लेजाय सकै
मिनख ताई

हरेक चीसळी अर सवाल रै जबाब में
लेयनै उटै है
आग अर उजास रौ घोसणा-पत्र

वौ मुगती रौ जोधा
वौ मुगती रौ विचार
कैवै है बार-बार

तोड़ देवौ
तोड़ देवौ गुलामी री जंजीरां
तोड़ देवौ दरवाजौ अंधारै री कारा रौ
मोड़ देवौ रुख बगत री धारा रौ
रोसणी में बदळतौ पाणी
अर फौलाद री नसां माथै ऊठती दुनिया
बगत है सरवहारा रौ ।
□□

(8 फरवरी 76)

गौरीशंकर निमिवाल

प्रदेस स्तरीय राजस्थानी छात्र युवा पंचायत अर महारैली संपन्न

मायड़ भासा राजस्थानी छात्र मोरचा, राजस्थान रै आह्वान माथै प्रदेस स्तरीय छात्र युवा पंचायत अर रैली 7 सितंबर, 2013 नै जोधपुर में संपन्न व्ही। राजस्थानी भासा री संवैधानिक मानता, स्कूलां मांय खाली पड़्या राजस्थानी स्कूल व्याख्याता रा पद भरणै, राजस्थानी भासा विकास बोर्ड रै गठण अर राजस्थानी भासा विश्वविद्यालय रै गठण, स्लेट मांय राजस्थानी विसय जोड़णै सेती 14 सूत्रीय मांगपत्र नै लैयनै आखै प्रदेस सू छात्र मोरचै रा कार्यकर्ता, भासा हेताळू, युवा बुजुर्ग इण रैली मांय सामल व्हिया।

सुबै-सुबै ईज रैली सारू छात्र मोरचै रा कार्यकर्ता सूरतगढ, गंगानगर, टिब्बी, नोहर, हनुमानगढ़, बिसाऊ, नागौर, मेड़ता, बालोतरा, बाड़मेर, जालौर, मथानिया, भोपालगढ़, जयपुर, बीकानेर, मंडोर, बालसमंद सू आपरा निजू वाहनां सू जोधपुर रै राजीव गाँधी चौक, नई सड़क भेळा होवणा सरू व्हेगा। रैली नै लेयनै युवावां रौ जोस देखणजोग हौ। मंडोर क्षेत्र अर मथानिया रा कार्यकर्ता नई सड़क ताई 150 सू भी बेसी वाहन रैली लेय र पूर्या।

छात्र मोरचै रा जोधपुर जिला महामंत्री जितेन्द्र सिंह साठिका रैली मांय आयोड़ा छात्र-युवा, भासा हेताळूआं, सामाजिक, राजनीतिक अर व्यापारिक संगठणां रै पदाधिकारियां रौ मोरचै री जोधपुर इकाई कानि सू सुवागत आपरै सुवागत भासण सू कर्यौ। वै बतायौ के रैली री त्यारी सारू जोधपुर रै केई मोहल्लां अर स्कूलां मांय 40 सू बेसी सभावां, जोधपुर इकाई करी है अर लारला पंद्रह दिनां सू प्रदेस रा केई जिलां मांय पोस्टर अर स्टीकर रै मारफत जन-जागरण अभियान चलाईज्यौ है। रैली रौ उद्घाटण करता थकां अखिल भारतीय राजस्थानी भासा मान्यता संघर्ष समिति रा प्रदेश महामंत्री राजेन्द्र बारहठ कैयौ के औ खाली राजस्थानी भासा री मान्यता रौ सवाल नीं है, औ राजस्थान रै युवा रै पेट सू जुड़्योड़ौ मुद्दौ है अर जै सरकार अजै नीं चेती तौ राजस्थान रौ युवा आगला विधानसभा अर लोकसभा चुणाव मांय सरकार सू हिसाब चूकतौ करैला।

उद्घाटण भासण मांय छात्र मोरचै रा प्रदेस अध्यक्ष डॉ. अशोक गहलोत कैयौ के आपां नै संगठित होयनै चुणावां मांय वोट री ताकत दिखाणी है। 'भासा नीं तौ वोट नीं' रौ नारौ आखै राजस्थान मांय चावौ करणौ है। उद्घाटण सभा मांय जयनारायण व्यास विश्वविद्यालय रा पूर्व अध्यक्ष डॉ. गजेन्द्रसिंह राठौड़ कैयौ के आ आपां री आन-बान-शान अर अस्मिता रौ सवाल

है। वै मारवाड़ जागरण मंच रै मारफत आंदोलन नै तेज करणै रौ भरोसौ दिरायौ। जयनारायण व्यास विश्वविद्यालय रा वर्तमान छात्रसंघ अध्यक्ष महेन्द्र जाखड़ कैयौ के सगळौ छात्रसंघ अर विश्वविद्यालय रौ हर विद्यार्थी राजस्थानी री मान्यता सारू अेकजुट है अर मोरचै रै हर कार्यक्रम मांय सक्रिय भूमिका निभावतौ रैवैला। संघर्ष समिति रा जिलाध्यक्ष रामसिंह राठौड़ युवा वरग सूं आंदोलन नै सड़क ताई लेजाणै री अपील सागै झंडी दिखायनै रैली रवाना करी। नई सड़क सूं आ रैली कलेक्ट्रेट ताई पैदल रैली रै रूप में गई। रैली रै मांय हाथ मांय पीळी झंडियां, तखियां, बैनर अर माथै पीळी पट्टी बांध्योड़ा छात्र कार्यकर्ता पूरै जोस सूं सामल व्हिया। रैली मांय सै सूं आगै छात्रावां अर महिलावां रौ जत्थौ हौ। रैली जद सड़कां माथै पूगी तौ डेढ़ किलोमीटर लांबी इण रैली नै देखण सारू सगळौ ट्रैफिक रुक्यौ। आम लोग जगै-जगै रैली मांय जुड़्य्या। जोधाणौ 'पैली भासा-पछै वोट', 'जै राजस्थानी-जै राजस्थान' रै नारै सूं गूंज्यौ। रैली कलेक्ट्रेट पूग र सभा मांय बदळगी जिणनै संघर्ष समिति रा प्रदेश मंत्री मनोज स्वामी (सूरतगढ़), प्रदेश प्रचार मंत्री विनोद स्वामी (परलीका), मोट्यार परिषद रा सुनील राजपुरोहित, छात्र मोरचै रा संरक्षक डॉ. सुखदेव राव, चैनपुरा महाविद्यालय अध्यक्ष उमेश देवड़ा, अेस.अेफ.आई. री नेहा गौराणा, किशन खुडिवाल, महिपाल चारण, वरिष्ठ रंगकर्मी दलपत परिहार, पूर्व छात्रसंघ अध्यक्ष जयनारायण पूनिया, पूर्व संयुक्त महासचिव इन्द्राकुमारी, भावना सोलंकी आद संबोधित कर्यौ।

इणी बिचाळै मोरचै रा प्रदेश संयोजक गौरीशंकर निमिवाल री आगीवाणी मांय 15 सदस्यां रौ प्रतिनिधि मंडल कलक्टर रै मारफत मुख्यमंत्री अर केंद्रीय गृह राज्यमंत्री रै नाम ज्ञापन सूंय्यौ। समापन मांय मोरचै रा प्रदेश संयोजक डॉ. उम्मेदसिंह सेतरावा सगळा लोगां रौ आभार जतायौ। रैली रो संयोजन अर संचालन मोरचै रा प्रदेश महामंत्री गौतम अरोड़ा कर्यौ।

रैली सूं पैलां प्रदेश भर मांय सभावां व्हि। पोस्टर अभियान चलाईज्यौ अर जोधपुर मांय मोरचै रौ राज्य सम्मेलन आयोजित करीज्यौ। इण दबाव रौ नतीजौ भी सांम्ही आयौ जद आरपीअेससी रैली पछै स्लेट मांय राजस्थानी जोड़णै अर राज्य सरकार व्याख्यातावां रा 22 पदां सारू विज्ञप्ति जारी करी। इण भांत युवा-सगती री जीत व्हि। मोरचै रा प्रदेश अध्यक्ष डॉ. अशोक गहलोत, मुख्यमंत्री राजस्थान श्री अशोक गहलोत, डॉ. हबीबखां गौराण (चेयरमैन आरपीअेससी) समेत आंदोलन नै सफल बणावण सारू मुकेश गोदारा (जयपुर), रामरतन लटियाल, जितेन्द्र मेघवाल (मेड़ता सिटी), सवाईसिंह चारण (बाड़मेर), राणीदान रावल (बालोतरा), सावित्री देवी स्वामी, तोलाराम स्वामी (सूरतगढ़), चंपालाल पटेल (जैतारण), दिनेश सैनी, रामपाल साहरण (भोपालगढ़), भैराराम भाद्राजून (जालौर), धर्माराम प्रजापत (नोखा), सुनील राजपुरोहित (ऋषभदेव), रणजीत डांगी, कमल डागा (मथानिया), सर्वेश चारण, इंद्रदान चारण, कप्तान बोरावड़, डॉ. भवानीसिंह पातावत, डॉ. रणजीत, प्रशांतसिंह राठौड़, जसवंतसिंह इन्दा, दलपत परिहार, संतोष राव, विजयसिंह पंवार, रामनिवास खेभादा, विनोद गहलोत, सुरेश प्रजापत, पवन सोलंकी, राजकुमार जोशी, नंदकिशोर गहलोत, जितेन्द्रसिंह कड़वासरा, खेमराज टाक, पपू सैन, सेवाराम देवड़ा, कविता चौहान, कुसुम गहलोत, हेमा अरोड़ा समेत सगळा मायड़ भासा हेताळुवां रौ आभार व्यक्त कर्यौ।

चौपासनी में मनाईजी डॉ. नारायणसिंह भाटी री जयंती

राजस्थानी भाषा, साहित्य एवं संस्कृति अकादमी, बीकानेर अर राजस्थानी शोध संस्थान, चौपासणी री भेळप में संस्थान रा संस्थापक निदेशक अर राजस्थानी रा ख्यातनांव कवि डॉ. नारायणसिंह भाटी रो 84वों जयंती जळसो 7 अगस्त नें चौपासणी में मनाईज्यौ। जळसै रा खास वक्ता डॉ. आईदान सिंह भाटी कैयौ के डॉ. नारायणसिंह भाटी री कविता रोमांस सू रगोबग है क्यूकै डॉ. भाटी खुद अंग्रेजी रै रोमांटिसिज्म सू प्रभावित हा। रोमांस जीवण री खास इधकाई है। उणनै डॉ. भाटी आपरी कविता में परोटियौ। जळसै रा सिरै मिजमान जयनारायण व्यास विश्वविद्यालय जोधपुर रा कुलपति प्रो. भंवरसिंह राजपुरोहित अर सिरै पांवणा पृथ्वीराज रतनू (बीकानेर) हा। चौपासणी शिक्षा समिति रा मानद सचिव प्रहलादसिंह राठौड़ अर डॉ. भवानीसिंह पातावत राजस्थानी शोध संस्थान री गतिविधियां री जाणकारी दीनी। इण मौकै लक्ष्मणदान कविया अर डॉ. गजेसिंह राजपुरोहित काव्य पाठ प्रस्तुत कर डॉ. भाटी नें काव्यांजळी अरपित करी। जळसै रौ बडेरचारौ चौपासणी शिक्षा समिति रा अध्यक्ष ठा. मानवेन्द्रसिंह रोहित कर्यौ। प्राचार्य आर.डी. सिंह, पार्षद रामसिंह जोधा, दुर्गादाससिंह राजवी, डॉ. अर्जुनसिंह राठौड़, फतेहसिंह मालूंगा, गिरधर गोपाल सिंह भाटी, चन्द्रसिंह पातावत, लोकेन्द्रसिंह, भूपेन्द्रसिंह, परमवीरसिंह, अजयपालसिंह बरजांसर, डॉ. जगदीश जुगतावत ई आपरा विचार राख्या। संचालन 'अपरंच' रा संपादक गौतम अरोड़ा कर्यौ।

पद्मश्री कन्हैयालाल सेठिया री 95वीं जयंती मनाईजी

जयनारायण व्यास विश्वविद्यालय, जोधपुर रै राजस्थानी विभाग कांनी सू पद्मश्री कन्हैयालाल सेठिया री 95वीं जयंती समारोह साथै मनाईजी। समारोह री सरुआत शोधार्थी पुष्पा भाटी, लक्ष्मी भाटी री सरस्वती वंदना सू व्ही। कार्यक्रम में पद्मश्री जोडा अतिथियां रौ सुवागत कार्यक्रम संयोजक डॉ. गजेसिंह राजपुरोहित, डॉ. धनंजया अमरावत अर डॉ. मीनाक्षी बोराणा स्मृतिचिह्न देयनै कर्यौ। शोधार्थी हाकम अली कन्हैयालालजी रै व्यक्तित्व अर कर्तृत्व माथै पत्रवाचन कर्यौ। कार्यक्रम रा खास पांवणा प्रो. नरेन्द्र अवस्थी डीन, कला संकाय, आपरै उद्बोधन में भागवत पुराण रौ उदाहरण देवता थकां कवि कन्हैयालाल सेठिया रै रचनाधरम नै रेखांकित कर्यौ। सिरै पांवणा विश्वविद्यालय रा कुलपति भंवरसिंह राजपुरोहित कैयौ के कविता रै माध्यम सू मिनख मांय मिनखपणौ बच सकै अर सेठियाजी मिनखपणो बचावण सारू ई कविता रचता रैया हा। समारोह रो बडेरचारौ करता थकां विभागाध्यक्ष डॉ. अर्जुनदेव चारण कैयौ के कवि कन्हैयालाल सेठिया री कवित्व दीठ राजस्थानी साहित्य मांय नुंवा प्रतिमान थापित करै। भासा ही मिनख री पिछांग है। शिक्षा रो उद्देश्य विवेक जाग्रत करणौ है। वां युवा वरग रौ आह्वान कर्यौ के राजस्थानी भासा री संवैधानिक मान्यता रौ संकल्प पूरौ व्ही आ इज कन्हैयालालजी सेठिया नै साची श्रद्धांजलि हुवैला। इण मौकै विश्वविद्यालय रा न्यारा-न्यारा विभागां रा शिक्षक, पढेसरी, सोधार्थी मौजूद हा। समारोह रौ संचालन युवा कथाकार, संपादक, सोधार्थी दुलाराम साहरण कर्यौ। डॉ. मीनाक्षी बोराणा आगंतुकां रै प्रति आभार जतायौ।

● आपरा कागदां सूं

श्री बैजनाथ पंवार चूरू

अपरंच रौ अप्रेल-जून , 13 रौ अंक मिल्यौ। घणै कोड अर चाव सूं बांच्यौ। 'पंचामरत' सारू आपनै लखदाद अर पांचू साहित्यकारां नै म्हारी सरधांजळी।

राजस्थानी आंदोलन री खबर मांय छात्र मोरचै कांनी सूं आयोजित ग्यान-गोठ मांय परम पूज्य आचार्यश्री महाश्रमणजी रा उद्गार घणा दाय आया। आपरै मारफत मोरचै नै लखदाद अर आचार्यश्री नै निवण। राजस्थानी नै संवैधानिक मान्यता नीं मिलण सूं लगैटगै दस करोड़ राजस्थानियां री भासा गूंगी है, औ आपणौ घणौ लूठौ अपमान है। आपणा केई साहित्यकार मान्यता री मन मांय लियां इज सुरगवासी व्हेगा।

म्हें नब्बै बरसां मांय हूं, लकड़ी मुसाणां मांय पड़ी है, ठाह नीं कद 'राम नाम सत' हुय जावै। राजस्थानी री मान्यता री जे खबर सुण ल्यूं कै बांच ल्यूं तौ सांसां घणी सोरी नीसरै। जै राजस्थानी, आपनै फेरूं लखदाद।

श्री राजाराम भादू जयपुर

समानांतर द्वारा जयपुर में आयोजित लघु पत्रिका सम्मेलन (25 मई, 2013) के लिए भेजी गई 'अपरंच' की प्रतियों में से एक प्रति पढ़ने के लिए रख ली थी। वो अब पढ पाया हूं। मुझे पत्रिका का यह रुख अच्छा लगा कि आप राजस्थानी सृजन को आधुनिकता के परिप्रेक्ष्य में देख रहे हैं। यह एक जरूरी कार्यभार है। जैसा कि इस अंक के लेखों से पता लगता है कि आधुनिकता बोध से लेखन, सृजन की धारा एक बार शुरू होकर अवरुद्ध हो गई है। यह भी सही है कि इस अवरोध को तोड़ने का कोई गंभीर उपक्रम इधर नहीं किया गया। वैसे तो राजस्थान का हिंदी साहित्य भी ठीक से आधुनिकबोध में दीक्षित नहीं हुआ, राजस्थानी तो इसमें काफी पीछे है। यह एक विडंबना ही है कि भानु भारती एवं अर्जुनदेव चारण के नाटक जितने आधुनिक हैं वैसी साहित्य की अनन्य विधाएं नहीं हैं।

आधुनिकता कोई फैशन नहीं है, यह समय के चलते बदलाव है जिसने हमारे सोचने के तरीके और जीवन-शैली को बदला है; एक उदाहरण के जरिये बात करें तो चन्द्रप्रकाश देवल ने युद्ध और हिंसा को उत्प्रेरित करने वाली कविताओं के विरुद्ध शांति और अहिंसा को प्रेरित करने वाली कविताओं को अपने लेख में रेखांकित किया है। यह रचनाकार की अंतर्दृष्टि में परिवर्तन का द्योतक है। 'अपरंच' के पास ऐसी संपादकीय अंतर्दृष्टि है, आप यह ऐतिहासिक कार्य कर रहे हैं, बधाई।

श्री बी. एल. माली 'अशांत' जयपुर

प्रिय बंधु, अपरंच मिळ्यौ, संकलन आछौ। राजस्थानी री नुंवी कविता री सुरुआती दीठ शीर्षक नै बदळनै री जरूरत संपादन कर्म नै ही। औ आखौ आलेख राजस्थानी री आधुनिक कविता रै परंपरागत कविता रूप माथै है, नुंवी कविता माथै नी। 'आधुनिक कविता' अर 'नुंवी कविता' अलग-अलग शीर्षक है। 'नुंवी कविता' शीर्षक परंपरागत कविता माथै चेष्यौ नीं जा सकै। आधुनिक कविता में नुंवी कविता अर परंपरागत कविता दोनू है। औ साहित्य रै इतिहास रा पख है। शीर्षक 'राजस्थानी री नुंवी कविता री सुरुआती दीठ' भरम भर्यौ है, औ आपरै अर 'पीथळ' रै भीतर रैयो हुवैला। पण आपरौ कथन 'पैन स्टैंडर्ड' माथै, पैन स्टैंडर्ड नै इंगित करवावण वाळै सबदां रै प्रयोग साथै होवणौ जरूरी है।

साहित्य रौ इतिहास मांय राब-राबड़ी भेळी नीं है, बात है। जिका नै पढ्यां बात बणै। कोरौ लेखन तौ कोरौ व्हे। संपादन मांय आखी बात पर निजरां जरूरी है। इण वास्तै कहीजै-संपादन टाबरां रौ खेल नीं है। सबदां सू सृजनात्मक खेल बात बीजी है।

डॉ. विनोद सोमानी 'हंस' अजमेर

अपरंच रौ जून, 13 रौ अंक मिळ्यौ। म्है ई अंक नै अेक-दो बैठकां में ही पढग्यौ। संपादकीय घणौ आछौ लागौ। पंचामरत सारू घणी बधाई। औ प्रयास सोनै में सुहागौ है। नुंवा-जूनां नै अेक मंच माथै लावणौ अर रचनावां रै मारफत वारौ परिचै करवावणौ घणौ लूंटौ काम आप कर रैया हौ। अेकल काव्यपाठ में चेतन स्वामी री रचनावां घणी धारदार। चैनसिंह परिहार री गजलां अर काव्य-गोष्ठी जोरदार। डॉ. तारालक्ष्मण गहलोत, मनोज स्वामी री कहाणियां, पूजाश्री अर शिवचरण सेन 'शिवा' री रचनावां उल्लेखजोग।

अंक रै लारै आपरौ उछाव अर जूझारपणौ देख नै मन घणौ राजी है। आपनै अर सैयोगी बंधुवां नै बधाई।

श्री हरदान हर्ष जयपुर

'अपरंच' अेक साहित्यिक पत्रिका रौ सांतरौ रूप लेय रैया है। विगत रौ पानौ इणरी साख भरै। संस्मरण, डायरी, आलोचना, आत्मकथा, जात्रा-वृत्तांत, साक्षात्कार अर समीक्षा आद नै भी इब-तिब लियां इणरौ रूप और बधसी। सुभकामनावां।

श्री मुकुट मणिराज कोटा

अपरंच राजस्थानी री अेक स्तरीय अर संग्रहणीय तिमाही है। आपका संकल्प वास्तै म्हारा जिस्या छोटा-सा रचनाकार खनै सबद कम पड़ता लाग र्या छै। आपका इण मेहताऊ काम नै आगै लेजाबा को बीड़ो उठायो भाई गौतमजी, बांकी हिम्मत नै भी लखदाद। आज इण भौतिकवादी जुग में छोटी साहित्यिक पत्रिका खाडबो डूंगर सू बाथ्यां पड़वा जिस्यौ छै। आपनै बधाई।

श्री राजेश अरोड़ा श्रीगजसिंहपुर

अपरंच रौ अप्रेल-जून, 13 अंक मिळ्यौ। पंचामरत, राजस्थानी री नुंवी कविता री सरुआती दीठ (लेख), अकेल काव्यपाठ (चेतन स्वामी), कहाणी 'धरम री जड़', गजलां, काव्य-गोष्ठी, नारी रै संदर्भ में- 'काल, आज अर आपां', लघुकथा 'अप्रेल अर भूत-प्रेत', कवितावां अर मनोज स्वामी री कहाणी 'कागोळ' पढ 'र आतमा तृप्त व्हेगी। चयनित सगळी सामग्री घणी सांतरी-सागीडी, सांगोपांग अर सरावणजोग है। लेखक, कवियां अर संपादक नै लखदाद।

ओमप्रकाश गर्ग 'मधुप' बाड़मेर

नवै रूप-सिणगार में बदळियौ-बदळियौ अपरंच मिळियौ, घणौ दाय आयौ। संपादकीय में आपरी आ बात खरी-खरी लागी के 'इण लेखक अर भासा आंदोलन नै बचावण अर बधावण री जिम्मेवारी राजस्थानी पत्र-पत्रिकावां री है।' आप इणमें पैल करी है, आ सरावणजोग बात है। लिखारां नै भी इण हकीकत सूं रूबरू होयनै आज री नुंवी पीढी सारू लेखन करणौ पड़सी। ताकि पढणिया इण भासा सूं जुड़े, आपां रौ मिशन कामयाब व्हे, इण आस सागै राम-राम।

डॉ. तारालक्ष्मण गहलोत जोधपुर

'अपरंच' रौ अप्रेल-जून '13 रौ अंक मिळियौ, पूरै मनोयोग सूं पढियौ। संपादक जी री बात घणी मैताऊ अर मननजोग है। 'पंचामरत' मांय चावा-ठावा, टणका, मायड़ भासा रा साहित्यकारां रै जीवण-परिचै सागै वारी कवितावां देय 'र घणौ सांतरी काम कर्यौ है। डॉ. नारायण सिंह 'पीथळ' रौ शोधपूरण आलेख 'राजस्थानी री नुंवी कविता री सरुआती दीठ' भी घणौ दाय आयौ। लेखक नै इत्तै सांगोपांग, सांतरी आलेख लिखणै री आफळ सारू घणा-घणा रंग।

अंक री सगळी रचनावां- कविता, कहाणी, आलेख, लघुकथा, सै कीं सरावणजोग है। सांतरी, संपूरण अर टैमसर पत्रिका काढण सारू आपनै अर आपरी पूरी टीम नै बधाई।

'या बणजारी जूण' रौ लोकार्पण

राजस्थानी रा ऊरमावान लेखक जितेन्द्र निर्मोही रै राजस्थानी संस्मरण-संग्रै 'या बणजारी जूण' रौ लोकार्पण 18 नवंबर 2013 नै भारतीय वन सेवा रा अधिकारी राकेश शर्मा कोटा में कर्यौ। इण मौकै वां कैयौ कै आं संस्मरणां में गांधीजी रै 'सत्य के प्रयोग' जैड़ा खुला विचार है। खास पांवणा अरविंद सोरल कैयौ के जितेन्द्र निर्मोही रा संस्मरण मैक्सिम गोर्की रा संस्मरणां री याद दिरावै। औ आपरै छोटै सूं छोटै पात्र नै बडौ अर चरचित बणा देवै। संस्मरणकार री दीठ ऊंडी है। बडेरचारौ करता थकां कमला कमलेश कैयौ के निर्मोही री रचनावां मूंडै सूं बोल 'र कैय देवै कै वै कित्ता बडा लिखारा है। समारोह में राधेश्याम मेहर, प्रो. डॉ. प्रेम जैन, विजय जोशी, लोकार्पित कृति रा लेखक जितेन्द्र निर्मोही, श्यामा शर्मा ई आपरा विचार राख्या। संचालन आनंद हजारी कर्यौ।